

San Lucas

De riidz nap nu rniiñ nu nac

Jesuuz dub gal mod nu mnii Luc

Riidz nu loga la ni Luc

¹ Zigy mbecy gush dey riiñ nu caay de coz nu guc lat den ² dub gal nu na de riidz nu bzeen de yu nu bzac urlo la de coz ze' nese nu bzub la gyi'ñ, de riidz nu bzeen de yu nu bzu riiñ nu tush las yu de riidz ze'. ³ Nde' nu ru, shi Tioj, como ya nap bdugyi' nu nac dela coz ze', orze' ya rzeē nu nap benu caa dela coz ze' lo gyicy, tub ga la riidz nu lugaar niñ. Orze' zeeda ñii nir. ⁴ Gun orze' gad lagy ru nu rishli dela coz nu bdulyuu nir.

Tub anc ni Ñgyoozh biid niy nu gal Waa nu griib nis mbecy

⁵ Orze' tiem nu guc Herodes rey ni de gyedz nu yu' lo yu ni Judea, bzu tub uz nu la Zacarí. Orze' yu ze' byeen yu lo tub nac uz nu rnii dey uz ni Abías. Ze' mñaay lam Bee. Gaza' mi ze' nac mi nez Aroong. ⁶ Orze' rup laa dey bicy dey coz nu se'ñ par lo Ñgyoozh. Bicy dey dela coz nu mniim lo leey nim. Orze' ni tub la mbecy wangac nii dey nu yu' falt niy. ⁷ Tees sac i'ñ dey, gun Bee wangac chu' i'ñ mi. Nunu rup laa dey bi gubel yu.

⁸ Orze' tub tiem de uz nu nac nu Zacarí briic dey sman niy. Orze' gaza' Zacarí bzuy riiñ lo Ñgyoozh. ⁹ Orze' de uz blooy cuen ich cushtom ni dey, nunu laaba' Zacarí bdugyiy nu chu'y nañ yu' nu driib

zily mbecy Ñgyoozh, Shuaan na, par nu zu dzeen yaal yu. ¹⁰ Na lat nu rzu dzeen yaal yu, orze' dela mbecy nu rca Ñgyoozh lugaar ze' byatublaazh dey ich yu' ze' nu nii nu dey mi. ¹¹ Orze' lat ze' bruu zac tub anc ni Ñgyoozh lo Zacarí gusuy par bee mez ze' nu zub psi'ñ yaal. ¹² Orze' ornu bzaac Zacarí anc ze', orze' lorgut lay. Orze' tona' la gudzib yu. ¹³ Tees anc ze' nay rab yu Zacarí:

—Cue' dzib ru Zacarí, gun Ñgyoozh “O” mniim gush mi de riidz nu mniir lom, nunu mñaar, Bee, gaal mi tub mdoo. Ze' mdoo ze' co lar yu Waa. ¹⁴ Orze' tona' la chesu cyit lagy ru nu nac yu, nunu zigy mbecy gyet lagy yu nu nac nu gal mdoo ze'. ¹⁵ Gun yu ze' gac yu tub yu lily par lo Ñgyoozh. Orze' rila wo'y ñup ni urbyay. Ni wo'y mashcaly. Ni wo'y ni tub la loñ. Nunu Espiriit Yon ni Ñgyoozh bi riib ic za' lam nañ lardooy nese anzir nu gal yu. ¹⁶ Orze' yu ze' gyicy yu nu zigy mbecy Israeel ca dey Ñgyoozh, Shuaan dey. ¹⁷ Orze' yu ze' chay riiñ ni Ñgyoozh anzir nu cyid Shuaan na. Fert gyicy yu riiñ nim gal nu bicy Elías, yu nu mnii por cuen nim. Gun orze' gyicy yu nu gyanap riidz ni de mbecy nuy i'ñ yu, nunu gyicy yu nu sya' de mbecy nu rnid ru' lo de mbecy nap. Orze' ni mod gac par nu zu lily yu de mbecy par ornu cyid Shuaan na —na anc ze'.

¹⁸ Orze' na Zacarí rab yu anc ze':

—¿Lac mod gad lagya nu gac ñii gal nu mniir? Gun ya dzi byabela. Nunu ni' zi'l mñaḗ —nay.

¹⁹ Orze' na ga' anc ze':

—Ya naca Gabriel. Ya zu lo Ñgyoozh. Nunu mi ze' bzuu nez mi ya nu yap nee du ru nunu rica nu

gad lagy ru de riidz nap nu mneē ze'. ²⁰ Orze' na, como wancheña lagy ru de riidz nu mneē lor, de riidz nu segur la gac, orze' nde' nu gyac ru mbecy gop. Wac niir gashtal shuub la dzi nu gyu' ni de riidz nu mneē —na anc ze'.

²¹ Lat ze' yu' de mbecy rbez yu Zacarí ich yu'. Gush dey shcab ben lagu dzi blaay nañ yu' ni Ñgyoozh. ²² Na ornu bruuy nañ yu' ze', wangaca' niy. Orze' gud lagy dey nu bde' loy nañ yu' ze', gun bicy yaay lo dey. Nunu ni la mod nay byeeñ yu. Wangaca' niy.

²³ Na ornu pshuub dzi niy bruuy sman, orze' yay yu'y. ²⁴ Orze' despuees ni de nu nde', orze' gu' i'ñ mñaay Bee. Orze' nañ gaay beey wancyuu lam yu'm. Orze' mnii toom: ²⁵ “Ni bicy nu Ñgyoozh ya, gun orze' na cue' güii naañ mbecy lo par nu sac i'ña”, mnii toom.

Tub anc mniim nu gal Jesuuz

²⁶ Na ornu bi bza' shuup beey nu yu' i'ñ Bee, orze' Ñgyoozh bzeed mi Gabrieel, yu nu nac anc nim, zay Nazaret, tub gyedz nu ri lo yu ni Galilea. ²⁷ Zay lo tub fiñ feñ nu nigul dzeel yu gyeey. Fiñ ze' lañ Li. Fiñ ze' bi guc nap niñ nu chelaañ See, tub mbecy nu bruu lat nez rey Dabi. ²⁸ Orze' gu' anc ze' ze' nu zub ñi. Orze' nay rab yuñ:

—¡Shnur! —nay—. Ñgyoozh nac num ru, nunu tona' la nap gyicy mi num ru —nay.

²⁹ Orze' ornu bzaac ñi anc ze', tona' la deet guc nañ lardooñ nu nac riidz nu mniy. Orze' gush ñi shcab ben lac mod yaruu riidz nu mniy loñ.

³⁰ Orze' na anc ze' rab yuñ:

—Li, cue' dzib ru, gun Ñgyoozh bi psa' lagy mi nu nap gyicy num ru. ³¹ Ru chu' i'ñ ru. Orze' gaal ru tub mdoo gyeey. Orze' co lar mi Jesuuz. ³² Mi ze' gac mi tub biñ lily. Nii dey nu “Mi ze' i'ñ Ñgyoozh biñ nu gya zir zu”, nii dey. Orze' Ñgyoozh gyicy mi nu gac mdoo ze' nir rey lugaar ni gyitoo bel nim Dabi, ³³ gun orze' gyub ic mi de nez Israeel tub la, nunu rila wayeca nu gyub ic mi den —na anc ze'.

³⁴ Orze' na ga' Li:

—¿Lac mod chu' i'ñ ze' rila nigul dzeela biñ gyeey? —nañ.

³⁵ Orze' na ga' anc ze':

—Espiriit Yon ni Ñgyoozh gyet mi nu gac num ru. Nunu Ñgyoozh, biñ nu gya zir zu, tona' la coz ily gyicy mi lat nu gac num ru. Nde' nu mdoo nir nu gal gac mi mbecy yon, tub mbecy nu nii dey “I'ñ Ñgyoozh”, nii dey. ³⁶ Ni' nis ru, Bee, gaal mi tub mdoo mas byabel mi. Biñ nu rnii dey nu wagac chu' i'ñ, mi ze' bi bza' shuup beey nu yu' i'ñ mi, ³⁷ gun Ñgyoozh gac gyicy mi dela coz —na anc ze'.

³⁸ Orze' na Li:

—Ya nacā tub fiñ feñ nu ricy de coz nu rlagy Ñgyoozh. Orze' Ñgyoozh gyicy num ya gal nu mniir —naañ.

Orze' laab nde' la bruu anc ze' yay.

Li chañ cha güiñ Bee

³⁹ Laab tiem ze' bruu Li ze' nu rcyiiñ ñi zañ carer tub gyedz nu ri tub logyi' ni Judea. ⁴⁰ Na ornu bru'ñañ, orze' gu'ñ nañ yu' Zacarí. Orze' mnii nuñ Bee ñgyoozh. ⁴¹ Na ornu güeñ Bee riidz nu mnii

Li, orze' pcueñ mdoo nañ mi. Orze' briib ic za' la Espiriit Yon ni Ñgyoozh mi. ⁴² Orze' ye la mniim:

—¡Nap zir gyicy nu Ñgyoozh ru gaze' de' zir biñ mña! ¡Nunu ni' zi'l nap gyicy num mdoo nir!

⁴³ ¿Cyu guc ya par nu cyid güii ñaa Shuaana ya?

⁴⁴ Cuanzir nu güeña nu mnii nur ya, orze' pcueñ mdoo naña nu dzi bet lagy ñi. ⁴⁵ Dzi nir nu guña lagy ru nu gyu' niñ gal nu mnii Ñgyoozh, Shuaan na—na Bee.

⁴⁶ Orze' na Li:

Ya gyabica gyel mbecy ni Ñgyoozh nu dutuub la lardoq.

⁴⁷ Tona' la yet lagya nañ lardoq nu nac Ñgyoozh, biñ nu co mbañ ya.

⁴⁸ Gun mi ze' bdu' cuen mi ya, tub fiñ feñ nu ricy coz nu rlagy mi.

Bzaac mi nu naca tub mbecy shni.

Orze' zigy mbecy nu yad par lo nii dem nu ya naca tub fiñ feñ nu dzi ni.

⁴⁹ Gun Ñgyoozh, biñ nu gac gyicy dela coz, mi ze' tona' la coz ily ricy num ya.

¡Mi ze' tona' la yon mi!

⁵⁰ Dub laa tiem nap ricy num de mbecy nu rca lagy lom.

Tant de mbecy ze' nap ricy num, tant i'ñ dem nu gruu zac par lo nap gyicy num.

⁵¹ Coz ily ricy mi nu nac nu dzi fert mi.

Mas la zi'l coz nu rboo ic mbecy le', tees ptush las mi dem.

⁵² Mi ze' bloom riiñ nu zu biñ nu nac rey.

Tees laagy nañ mi de mbecy shni.

⁵³ Cuic mi coz nap gow mbecy ran gashtal dzaa la nañ dem.

Ze' mbecy guani'ñ,
zuu nez mi dem gyam ñgyi'ñ yaam.
Ni wabic lam coz nu gow dem.

⁵⁴ Blocyuub mi de mbecy Israeel, de biñ nu ricy coz
nu rniim.

Nunu wanit lagy mi nu nap gyicy num dem
par nu rashni lagy mi dem.

⁵⁵ Bicy num Abraham gal nu dela nez mi gal nu
mniim lo de gyitoo bel ni den nu segur la
gyicy mi.

Ni mnii Li.

⁵⁶ Orze' Li pcyiñ nuñ Bee tub chon beey. Orze'
bruuñ yaañ yu'ñ.

Gul Waa nu griib nis mbecy

⁵⁷ Na ornu pshuub dzi nu gaal Bee mdoo, orze'
gul tub mdoo gyeey. ⁵⁸ Orze' ornu de mbecy nu
rcyiñ num garee ga, gal nu dela famil nim bzaac
dey nu nap bicy nu Ñgyoozh mi, orze' bet lagy
dey nuy mi. ⁵⁹ Orze' ornu bza' shuñ dzi nu gul
mdoo ze', orze' pcaa dey beey sircunsision cuerp
ni mdoo ze'. Orze' bicy pee dey mboo la dey yu
laaba' gal nu la uz yu, Zacarí. ⁶⁰ Tees ñaa mdoo ze'
nam:

—¡Cue'! Rlagy ñi loo lan ñi Waa —nam.

⁶¹ Orze' na dey rab yum:

—Sac ni tub la famil nir nu ni lay —na dey.

⁶² Orze' bicy yaa dey lo Zacarí par nu gad lagy
dey lac rlagy yu gruu la mdoo niy. ⁶³ Orze' bdiñ
yu tub la' yala nu caay loñ. Orze' dela mbecy tona'
la za nu ic dey ornu bzaac dey nu pcaay: “Yu ze'
gruu lay Waa”, pcaay. ⁶⁴ Orze' laab or la ze' briib
rishniy tuuba' tir. Orze' brugyi' ryabic yu gyel

mbecy ni Ñgyoozh. ⁶⁵ Orze' dela de mbecy nu yu' nuy garee tona' la gudzib dey. Orze' dutuub la logyi' ni Judea bzu riidz de coz nu guc. ⁶⁶ Orze' dela mbecy nu güeñ riidz ze' gush dey shcab nu nac ñii. Orze' na dey rab yu losa'y:

—¿Ben cyu gac yu nguzh ze'? —na dey—. Gun rishli gaal rabee nu ricy Ñgyoozh coz ily num yu —na dey.

⁶⁷ Orze' Espiriit Yon briib ic za' lam Zacarí, uz mdoo ze'. Orze' brugyi' rniiy por cuen ni Ñgyoozh. Orze' nay:

⁶⁸ ¡Rlagy ñi gyabic na gyel mbecy ni Shuaan na, biñ nu nac Ñgyoozh ni de mbecy Israeel!

Gun biid mi nu co mbañ mi dela mbecy nim.

⁶⁹ Bzuu nez mi tub biñ fert nu co mbañ de ub na. Mi ze' laaba' nez Dabi, yu nu bicy de coz nu rlagy mi.

⁷⁰ Gulas mniim nu ni gyicy mi nu nac de riidz nu bzeeñ de yu nu mnii por cuen nim.

⁷¹ Nunu mniim nu com de ub na yaa losa' yuun nu yaa de yu nu rzi lagy lon.

⁷² Ni bicy mi par nu mniim nu nap gyicy num de too bel ni den.

Gun wannit lagy mi trat yon nim.

⁷³ Nunu trat ze', nde' riidz nu mniim lo gyitoo bel ni den Abraham nu segur la gyicy mi.

⁷⁴ Riidz ze' rniñ nu gyicy mi nu glan lo de losa' yuun,

gun orze' wadzib la den gyicy den coz nu rniim,

⁷⁵ nunu gun orze' cuin lom como nac naa mbecy nu nac nim,

nunu mbecy nu bi byanap lom.

Orze' cuin lom dutuub la lo yun.

⁷⁶ Ze' ru, i'ña, mbecy gnii dey nu ru nac ru tub yu
nu gnii por cuen ni Ñgyoozh, biñ nu gya zir
zu,

gun ru cha gar par lo Shuaan na.

Gyicy nap ru nañ lardoo de mbecy

gal nu ricy nap dey tub nez ornu ded tub yu lily.

⁷⁷ Gun orze' gad lagy dela mbecy ni Ñgyoozh nu
gyicy sulagy mi de cyi dey.

Nunu co mbañ mi dey.

⁷⁸ Gun Ñgyoozh ni den, nu nac nu tona' la rashni
lagy mi mbecy nim, nde' nu ni gyicy num
dey.

Gyicy mi nu cyid biñ nu co mbañ mbecy gal nu
driib doo.

⁷⁹ Orze' dzi ze' cuic mi yaa ni de mbecy nu yu' ze'
nu cow, de mbecy nu ca lo cuen nu gat,
gun orze' lyuun ni dey ca par gash yu par nu che
ti ri añ ni dey,

na Zacarí.

⁸⁰ Orze' yu nguzh ze' zaab raly yu, nunu byafert
yu nu nac de coz ni Ñgyoozh. Orze' pcyiñ yu tub
lugaar ub zi gashtal pshuub la dzi nu blyuuy ub
yu lo de mbecy Israeel.

2

Gul Jesuuz

¹ Tiem ze' Augusto, yu nu riib ic de nasyoong,
pshes nañ yu tub acta nu mniy lo dey nu cha boo
dey ña'n mbecy dutuub la lugaar nu riib ic yu.

² Nde' tir loga la gua loo dey ña'n mbecy lat nu zu
Cirenio riiñ nu riib ic yu de gyedz nu yu' lo yu ni
Siria. ³ Orze' dela mbecy bya dey ledz yu nu cuic
yu ña'n yu.

⁴ Nde' nu See bruuy tub gyedz ni Galilea nu la Nazaret. Orze' yay Beleeng, tub gyedz ni Judea, gun gyedz ze' gul rey Dabi, nunu See nac yu nez Dabi. ⁵ Orze' ze' yay nu cuic yu ña'n yu. Nunu ya nuy Li, fiñ nu bi ca lo cuen nu chelaay. Nunu fiñ ze' bi yu' i'ñ ñi. ⁶ Orze' lat nu rcyiiñ dey Beleeng, orze' pshuub dzi nu gal mdoo. ⁷ Orze' ze' gul mdoo loga niñ. Orze' ptiish ñi mdoo ze' negy. Orze' briñ mdoo ze' nañ tub cano, ze' nu row bañcyug gyizh, gun wangada' lugaar nu ndri dey nañ yu' ni mbecy.

De anc gal nu de mbecy nu rña shily

⁸ Na gaab ga Beleeng yu' la be mbecy nu rña shily. Gua la rel rña dey shily niy lat gyish. ⁹ Orze' bruu zac tub anc ni Ñgyoozh lo dey. Orze' pca yaa nu bruu lo Ñgyoozh dub yub la ze' nu yu' dey. Orze' tona' la gudzip dey. ¹⁰ Orze' na anc ze' rab yu dey:

—Cue' dzib der. Ya yap nee tub riidz nu tona' la nap. Nu nac riidz ze' tona' la gyet lagy dela mbecy. ¹¹ Dzi na la gul tub mdoo ledz Dabi. Nunu mi ze' biñ nu co mbañ der. Mi ze' nac mi Mesías, Shuaan na, biñ nu ca lo cuen nu cyid. ¹² Mod nu gad lagy der nu laab mi, nde' nu gyap der mdoo ze' mbish mi negy rim nañ cano ze' nu row bañcyug gyizh —na anc ze'.

¹³ Orze' laab or la ze' bruu zac tub nac anc zigy nu bruu gal gyibaa lo tuuba' anc ze'. Orze' ryabic dey gyel mbecy ni Ñgyoozh. Orze' na dey:

¹⁴ Rlagy ñi gyabic mbecy gyel mbecy ni Ñgyoozh gal gyibaa lugaar nu gya zir zu. Ze' gyishlombecy ii rlagy ñi nu chu' dela mbecy nu gyel ri zu, de mbecy nu gyedzu' lagy mi,

na de anc ze'.

¹⁵ Na ornu de anc ze' ya dey gyibaa, orze' de yu rña shily ze' na dey rab yu losa'y:

—Yaa chan Beleeng, cha güiñ de coz nu guc, de coz nu mnii Ñgyoozh Shuaan den —na dey.

¹⁶ Orze' bicy lal la dey zay. Na ornu bru'ña dey, orze' bzaac dey Li, nu See, gal nu mdoo ze' rim nañ cano. ¹⁷ Orze' ornu bzaac de yu nu rña shily ze' mdoo ze', orze' byoo dey rishlo dela mbecy de coz nu mnii anc ze'. ¹⁸ Orze' dela mbecy nu güeñ riidz nu mnii de yu nu rña shily ze' gush dey shcab nu nac ñii. ¹⁹ Orze' Li pcaa ic ñi dela riidz ze' nunu gush ñi shcab nu nac ñii. ²⁰ Orze' de yu nu rña shily ze' yay ryabic dey gyel mbecy ni Ñgyoozh nu nac de coz nu güeñ dey nunu nu nac de coz nu bzaac dey. Gun guc ñi gal nu mnii de anc ze' lo dey.

Gua nu dey Jesuuz nañ yu' nu driib zily mbecy Ñgyoozh

²¹ Na ornu bza' shuñ dzi nu gul mi, orze' pcaa dey beey nu la sircunsision cuerp nim. Orze' bloo la dey mi Jesuuz. Bloo la dey mi gal nu mnii anc ze' lo Li anzir nu chu' i'ñ ñi.

²² Na ornu pshuub dzi nu gyicy dey gal nu rnii leey ni Moisees par nu gyacaacy mbecy lo Ñgyoozh, orze' za nu dey mdoo ze' Jerusaleeng par nu lyuu dey mi lo Ñgyoozh, Shuaan na. ²³ Ni bicy dey gun lat de riidz ni leey ni Ñgyoozh Shuaan na bi cañ: “Dela de i'ñ gyeey dey, benu mdoo loga la, orze' rlagy ñi zu chu dey yu nu gac yu ni Ñgyoozh, Shuaan na.”

²⁴ Orze' briic dey tub gun gal nu bi cañ lo leey ni

Ñgyoozh, Shuaan na. Gun ze', nde' cyup begy o cyup culmbu feñ.

²⁵ Na tiem ze' zu tub mbecy nu la Simyoo Jerusaleeng. Yu ze' tub mbecy nap, nunu tona' la rca lagy yu lo Ñgyoozh, nunu blez yu par ornu shuub dzi nu gruu mbañ de mbecy Israeel. Nunu Espiriit Yon ni Ñgyoozh guc num yu, ²⁶ nunu mniim loy nu wat yu anzir nu gzac yu Mesías, biñ nu zuu nez Ñgyoozh nu cyid. ²⁷ Orze' mniim loy nu chay nañ yu' nu driib zily mbecy Israeel Ñgyoozh. Orze' ornu de mbel ni Jesuuz bru'ña nu dey mi nañ yu' ze' par nu gyicy dey gal nu rniñ lo leey, ²⁸ orze' Simyoo bdu' yaay mdoo ze'. Orze' briic yu gras ni Ñgyoozh. Orze' nay:

²⁹ Ñgyoozh, Shuaan de, na bi bicy yac ru nu de riidz nu mniir nu segur la gyicy ru.

Na ya, yu nu ricy coz nu rniir, bi guti ye lagya nu gata.

³⁰ Gun ya bi bzaac urlə la biñ nu bzuu nez ru nu co mbañ mbecy,

³¹ biñ nu bzur nu bzaac lo de lo la mbecy.

³² Mi ze' nam gal nu na tub yaa nu gyicy nu nap zac de mbecy nu walab mbecy Israeel.

Nunu nu nac mi ze' gabe gyel lily ni de mbecy nir, de mbecy Israeel,

na Simyoo.

³³ Orze' uz Jesuuz nu ñaam za nu la ic dey coz nu mnii Simyoo nu nac mi. ³⁴ Orze' Simyoo bdiñ yu lo Ñgyoozh ni dey. Orze' nay rab yu Li, ñaa Jesuuz:

—Mdoo ii bi zuu lam nu gyicy mi nu nit lo zigy mbecy Israeel nunu gyicya'm nu zigy dey gruu mbañ yu. Mi ii tub miesht nu bruu lo Ñgyoozh.

Nunu zigy mbecy cha dey contr nim. ³⁵ Gun orze' gabe coz nu rlagy zigy dey gyicy yu nañ lardooy. Tees de nu nde' gyicy nuñ ru gal nu ricy tub mandzicy ri'ñ nu gzub ñi gashtal nañ lardoor —na Simyoo.

³⁶ Nunu bzu ga' tub biñ mñaan nu rnii por cuen ni Ñgyoozh nu la An. Mi ze' i'ñ Fanuel, tub mbecy nez Aser. Mi ze' tona' la gubel mi. Dzi feñ mi pchelaam. Nunu gagy zi ña'n pcyiiñ num ñgyeem.

³⁷ Orze' gut yu. Ze' ochent zub tap ña'n rac nu byeeñ byud mi. Orze' mi ze' rila wancyuum nañ yu' nu driib zily de mbecy Israeel Ñgyoozh. Sinu dzi rel la briib zily mi Ñgyoozh. Nunu pcam ni ub mi nu wangow mi gyit nu rnii num Ñgyoozh.

³⁸ Orze' laab or la ze' briic mi gras ni Ñgyoozh. Nunu bzat mi Jesuuz lo dela mbecy nu rbez nu co mbañ Ñgyoozh de mbecy Jerusaleeng.

Bish cya dey Nazaret

³⁹ Na ornu bi bicy yac dey leey ni Ñgyoozh Shuaan na na, orze' bish cya dey yay Galilea. Ya dey gal ledz gaal yu, tub gyedz nu la Nazaret.

⁴⁰ Orze' Jesuuz zaab raly zir mi, nunu yafert zir mi, nunu ral zir shcab nim. Nunu Ñgyoozh nap guc num mi.

Jesuuz rim lugaar ze' nu driib zily mbecy Israeel Ñgyoozh

⁴¹ Na de mbel ni Jesuuz de ña'n la rza dey Jerusaleeng rza dey sa' ni Pas. ⁴² Orze' ornu bi yu' Jesuuz tub ña'n trocyup, gua dey sa' ze' gal mod nu nil ricy dey. ⁴³ Na ornu bi bded sa' ze', orze' gush nez dey yay. Ze' Jesuuz byeeñ gam Jerusaleeng.

Nunu wangad lagy de mbel nim. ⁴⁴ Guzii dey nu ya Jesuuz lat de' zir mbecy. Bi bza' tub dzi nu zu dey nez. Orze' brugyi' nu ryub dey mi lat de famil nim, nunu lat de mbecy nu yu' lom. ⁴⁵ Tees wangyad mi ni dey. Orze' bish cya ga' dey yay laaba' Jerusaleeng nu yub dey mi.

⁴⁶ Na ornu bza' dzi chon, orze' byad mi ni dey zub mi nañ yu' nu driib zily mbecy Ñgyoozh nu de yu nu rlyuu leey ni de mbecy Israeel. Rzuub gyidag mi ni dey, nunu rgugyi'm lo dey. ⁴⁷ Nunu dela de yu nu reñ de riidz nu rniim za nu la ic dey nu nac nu dzi lily rniim. ⁴⁸ Ornu bzaac de mbel nim mi, za nu la ic dey. Orze' ñaam nañ rab ñim:

—Fiñ nguzh, ¿lagu ni bicy nur de? Uz ru nu ya tona' la deet guc nañ lardoō de nu ryub de ru —nam.

⁴⁹ Orze' na Jesuuz rab mi ñaam:

—¿Lagu ryub der ya? ¿A wagad lagy der nu ya rlagy ñi nu cui nañ yu' ni Ñgyoozh uza? —nam.

⁵⁰ Tees wangyet lag dey cuen de coz nu mniim.

⁵¹ Orze' Jesuuz bish cya ga'm num dey yam Nazaret. Ze' pcyiñ mi nunu bzuub gyidag mi dela coz nu mnii dey. Orze' ñaam pcaa ic ñi dela coz nu guc ze'. ⁵² Orze' Jesuuz zaab raly zir mi. Raly cuerp nim, nunu ral shcab nim. Orze' Ñgyoozh bet lagy mi nu nac mi, nunu ni' zi'l mbecy bet lagy dey nu nac mi.

3

Waa nu griib nis mbecy pshaal yu riidz nu bruu lo Ñgyoozh

¹ Na bi bza' tiiñ ña'n nu riib ic yu nu la Tiberio de nasyoong. Ze' Poncio Pilato byub ic yu Judea por cuen ni gubier. Nunu Herodes byub ic yu por cuen ni gubier Galilea. Nunu bicy yu, Lip, byub ica'y por cuen ni gubier Iturea nu Traconite. Nunu Lisantias byub ic yu por cuen ni gubier Abilinia.

² Orze' Anás nu Caifás byub ic dey de uz Israeel. Orze' tiem ze' Ñgyoozh mniim lo Waa, iñ Zacarí, tub lugaar ub zi. ³ Orze' Waa gusay dela lugaar nu ri gaab ga gyooow Jordaang. Orze' nay rab yu de mbecy:

—Mne' der dela cyi nu ricy ru nunu bzu nis der, gun orze' Ñgyoozh gyicy sulagy mi de cyi der —nay.

⁴ Gun Isaías, yu nu mnii por cuen ni Ñgyoozh, laab Waa bzat yu ornu pcaay:

Zaab ti' tub mbecy rbish tiy tub lugaar ub zi.

Orze' nay:

“Nañ lardoo der nañ gal nu na tub nez.

Orze' bicy nap der nez ze' par ornu cyid Shuaan ru.

Pshaal der tub nez nu li par nu ded mi.

⁵ Dela nez nu a' tub ru' gyicy tub ru' der ñii.

Nunu de ze' nu zub bicy ily gyicy lacy der ñii.

Nunu de nez nu a' li gu' li der ñii.

Nunu dela de nez nu dzi wech zu, gyicy tub ru' der ñii.

⁶ Orze' de lo la mbecy gzac dey biñ nu bzuu nez Ñgyoozh nu co mbañ den”,

nay, na Isaías.

⁷ Orze' tona' la mbecy zigy bruu dey nu yad yu par nu rlagy dey nu griib nis Waa dey. Orze' Waa nay rab yu dey:

—¡Der mbecy shiñ ricy! ¿Cyu mnii lo der nu gac gla der lo cashtig ily ni Ñgyoozh nu bi yad gaab? ⁸ Bicy der tub mod nu nap gabe nu bi mne' der de cyi nu ricy ru. Cue' gnii too der nu gla der ni de cashtig ze' nu nac nu rnii der: “De ub na nac naa nez gyitoo bel nin Abraham”, rnii der, gun ya rishli rnee lo der nu Ñgyoozh gac gyicy mi nu mas gashtal de gyita' ii gyac ñi nez Abraham. ⁹ Gun cashtig ni Ñgyoozh nañ gal na tub gyibag. Bi zu lily ñii par nu shi'ñ ñi dela yag gashtal lyu lañ. Dela yag nu wacuic uugy nap gyi'ñ ñi. Orze' chañ lo gyi —na Waa.

¹⁰ Orze' na de mbecy rab yu Waa:

—¿Lac mod gyicy de beni? —na dey.

¹¹ Orze' na Waa rab yu dey:

—Benu tub mbecy mbish cyup shab yu, orze' rlagy ñi cuic yu tub ni yu nu sac ni, nunu benu yu' nu row tub mbecy, orze' rlagya'ñ nu cuica'y ñuu gow yu nu sac nu row —na Waa.

¹² Gaza' de yu nu rboo tiñ por cuen ni gubier Rom za ga' dey lo Waa par nu griib nis yu dey. Orze' na dey rab yu Waa:

—Masht, ze' de ya, ¿la coz rlagy ñi nu gyicy de? —na dey.

¹³ Orze' Waa nay:

—Rlagy ñi nu co der tiñ gal nu ca lo cuen nu co der, nunu cue' nu sheñ zir co der —nay rab yu dey.

¹⁴ Ni' zi'l de soldad nu yu' ze' bdugyi' ga' dey lo Waa. Orze' na dey:

—Ze' de ya, ¿lac mod gyicy de? —na dey.

Orze' na Waa rab yu dey:

—Cue' co der tiñ ni mbecy por fers la, nunu cue' riib der gyidza too dey. Bzu la der conform ca na la i der nu ricy ru gan —na Waa rab yu dey.

¹⁵ Orze' de mbecy brugyi' rgyish lo dey nu zac lo dey tub coz ily, nunu brugyi' rgugyi' dey lo losa'y ben a walab Waa nac yu Mesías, biñ nu ca lo cuen nu cyid. ¹⁶ Orze' Waa nay rab yu dey:

—Ya rishli griib nis̱a der nu nis, tees cyid tub biñ nu cuic Espiriit Yon ni Ñgyoozh ni mbecy, nunu cuic mi cashtig nu na gal nu na gyi ni dey. Mi ze' tub biñ nu gya zir zu par ya. Ya ni wayapa nu shagya gyid nu zub gyid lab mi. ¹⁷ Mi ze' nam gal na tub mbecy nu bi zu lily nu tub yag ru' biiz par nu com dela mbigy trig, nunu gyicy tublaazh mi ñii par nu cu' choow mi nañ ye. Ze' de gyid ich ñi zeed mi ñii chañ lo tub gyi nu rila wayu —na Waa.

¹⁸ Orze' ni mod nunu zañ zir mod Waa pshaal yu de riidz nu sac nu bruu lo Ñgyoozh lo de mbecy.

¹⁹ Orze' pshuu nuy Herodes, yu nu riib ic por cuen ni gubier nu nac nu gush yu Herodías, mña̱a bicy yu Lip. Nunu yu' zir coz a' nap nu bicy yu. ²⁰ Nunu shiñ zir bicy yu ornu bicy yu mandaar nu pshet lag mbecy Waa nañ yu' gyiib.

Bzu nis Jesuuz

²¹ Tiem ze' ornu Waa griib nis yu de mbecy, orze' ni' zi'l Jesuuz briic yu nu winis mi. Na lat nu rnii num Ñgyoozh, orze' byaal la baa. ²² Orze' bruu zac Espiriit Yon ni Ñgyoozh nu na gal na tub beg. Orze' bet mi toom. Orze' zaab ti' Ñgyoozh. Gal gyibaa rniim. Orze' nam:

—Ru nac ru i'ñā nu tona' la rca, nunu tona' la yet lagya —na Ñgyoozh gashtal gyibaa.

De gyitoo bel ni Jesuuz

²³ Ornu bzuub Jesuuz gyi' riiñ nu ricy mi, orze' yu'm ña'n gal rup tii. Orze' de mbecy guzii dey nu mi ze' i'ñ See. Ze' See yu ze' i'ñ Elí. ²⁴ Orze' Elí guc yu i'ñ Matat. Orze' Matat guc yu i'ñ Leví. Orze' Leví guc yu i'ñ Melqui. Orze' Melqui guc yu i'ñ Janai. Orze' Janai guc yu i'ñ See. ²⁵ Orze' See guc yu i'ñ Matatías. Orze' Matatías guc yu i'ñ Amós. Orze' Amós guc yu i'ñ Nau. Orze' Nau guc yu i'ñ Esli. Orze' Esli guc yu i'ñ Nagai. ²⁶ Orze' Nagai guc yu i'ñ Maat. Orze' Maat guc yu i'ñ Matatías. Orze' Matatías guc yu i'ñ Semei. Orze' Semei guc yu i'ñ Josec. Orze' Josec guc yu i'ñ Judá. ²⁷ Orze' Judá guc yu i'ñ Joanán. Orze' Joanán guc yu i'ñ Resa. Orze' Resa guc yu i'ñ Zorobabel. Orze' Zorobabel guc yu i'ñ Salatiel. Orze' Salatiel guc yu i'ñ Neri. ²⁸ Orze' Neri guc yu i'ñ Melqui. Orze' Melqui guc yu i'ñ Adi. Orze' Adi guc yu i'ñ Cosam. Orze' Cosam guc yu i'ñ Elmadam. Orze' Elmadam guc yu i'ñ Er. ²⁹ Orze' Er guc yu i'ñ Jesuuz. Orze' Jesuuz guc yu i'ñ Eliezer. Orze' Eliezer guc yu i'ñ Jorim. Orze' Jorim guc yu i'ñ Matat. ³⁰ Orze' Matat guc yu i'ñ Leví. Orze' Leví guc yu i'ñ Simyoo. Orze' Simyoo guc yu i'ñ Judá. Orze' Judá guc yu i'ñ See. Orze' See guc yu i'ñ Jonam. Orze' Jonam guc yu i'ñ Eliaquim. ³¹ Orze' Eliaquim guc yu i'ñ Melea. Orze' Melea guc yu i'ñ Mena. Orze' Mena guc yu i'ñ Matata. Orze' Matata guc yu i'ñ Natán. ³² Orze' Natán guc yu i'ñ Dabi. Orze' Dabi guc yu i'ñ Isaí. Orze' Isaí guc yu i'ñ Obed. Orze' Obed guc yu i'ñ

Booz. Orze' Booz guc yu i'ñ Sala. Orze' Sala guc yu i'ñ Naasón. ³³ Orze' Naasón guc yu i'ñ Aminadab. Orze' Aminadab guc yu i'ñ Admin. Orze' Admin guc yu i'ñ Arni. Orze' Arni guc yu i'ñ Esrom. Orze' Esrom guc yu i'ñ Fares. Orze' Fares guc yu i'ñ Judá. ³⁴ Orze' Judá guc yu i'ñ Jacob. Orze' Jacob guc yu i'ñ Isaac. Orze' Isaac guc yu i'ñ Abraham. Orze' Abraham guc yu i'ñ Taré. Orze' Taré guc yu i'ñ Nacor. ³⁵ Orze' Nacor guc yu i'ñ Serug. Orze' Serug guc yu i'ñ Ragau. Orze' Ragau guc yu i'ñ Peleg. Orze' Peleg guc yu i'ñ Heber. Orze' Heber guc yu i'ñ Sala. ³⁶ Orze' Sala guc yu i'ñ Cainán. Orze' Cainán guc yu i'ñ Arfaxad. Orze' Arfaxad guc yu i'ñ Sem. Orze' Sem guc yu i'ñ Noé. Orze' Noé guc yu i'ñ Lamec. ³⁷ Orze' Lamec guc yu i'ñ Matusalén. Orze' Matusalén guc yu i'ñ Enoc. Orze' Enoc guc yu i'ñ Jared. Orze' Jared guc yu i'ñ Mahalaleel. Orze' Mahalaleel guc yu i'ñ Cainán. ³⁸ Orze' Cainán guc yu i'ñ Enós. Orze' Enós guc yu i'ñ Set. Orze' Set guc yu i'ñ Adaang. Orze' Adaang guc yu i'ñ Ñgyoozh.

4

Jesuuz guc preb mi

¹ Orze' Jesuuz brugyi' riib ic za' la Espiriit Yon ni Ñgyoozh mi. Gaze' nu bruum gashtal gyoow Jordaang zam. Orze' Espiriit Yon ni Ñgyoozh za num mi tub lugaar ub zi. ² Ze' brim cyuu dzi. Orze' ze' bicy nuras preb mi. Dub laa lat nu brim ze' wangow lam gyit. Na despuees, orze' briib nu ran mi. ³ Orze' na nuras rab yum:

—Benu ru rishli gaal nac ru i'ñ Ñgyoozh, orze' mnii lo de gyita' ii nu gyac ni gyishtily —nay.

4 Orze' Jesuuz nam rab mi nuras:

—Lat de riidz ni Ñgyoozh rniin: “Walab gyishtily zi'l gyicy ñi nu cui mbañ mbecy”, rniin —nam.

5 Gaze' nu nuras gua nuy mi tub ze' nu gya. Orze' nañ tub miiñ zi'l blyuuy dela lugaar ni gyishlombecy lom. **6** Orze' nay:

—Ya gyicya nu gac gyub ic ru dutuub la gyishlombecy ii, nunu grica dela gyel nap nu yu' loñ nir. Ya bi guud ñi ne, nunu gac grica ñii ni cyu zi'l mbecy nu rlagya. **7** Ya grica nde' nir benu zu tib ru lo nu griib zily ru ya —nay.

8 Orze' Jesuuz nam rab mi nuras:

—Gun lat de riidz ni Ñgyoozh rniin: “Briib zily Shuaan ru, biñ nu nac Ñgyoozh nir, nunu se coz nu rlagy zi'l mi gyicy ru”, rniin riidz nim —na Jesuuz.

9 Gaze' nu za nu nuras mi par Jerusaleeng. Orze' pshup yum ze' nu gya zir ni yu' nu driib zily de mbecy Israeel Ñgyoozh. Orze' nay rab yu Jesuuz:

—Benu rishli gaal nac ru i'ñ Ñgyoozh, orze' bzut yeñ gashtal lo yu la re. **10** Gun lat de riidz ni Ñgyoozh rniin:

Ñgyoozh cu'm riiñ yaa de anc nim nu ña dey ru, nunu wazaan dey nu shiñ gzac ru.

11 Orze' lagy yaa dey ru, gun orze' cue' nu gad güii par ni gyi'r lo de gyita', rniin, nay.

12 Orze' Jesuuz nam rab mi yu:

—Ni' zi'l rniin lat de riidz nim: “Cue' gyicy ru preb Ñgyoozh, Shuaan ru”, rniin —na Jesuuz.

¹³ Orze' nuras wangada' mod nu ñgyicy yu preb Jesuuz. Orze' bruu chuy lom par la be tiem.

Jesuuz brugyi' ricy mi riiñ Galilea

¹⁴ Orze' Jesuuz ya ga'm par lo de yu ni Galilea, nunu riib ic za' la Espiriit Yon ni Ñgyoozh mi. Orze' brush las riidz ni de coz nu bicy mi dela lugaar nu yu' gaab ga ze'. ¹⁵ Orze' rlyuum nañ de yu' nu rsya' de mbecy Israeel riidz ni Ñgyoozh de ga la lugaar ze' nu rded mi. Nunu dela mbecy ryabic dey gyel mbecy nim.

Jesuuz yam Nazaret

¹⁶ Orze' Jesuuz yam Nazaret, gyedz ze' nu guul mi. Na ornu pshuub sab, dzi nu rzu lagy de mbecy Israeel, orze' bicy mi gal mod nu nil ricy mi. Orze' gu'm nañ yu' ze' nu rsya' dey riidz ni Ñgyoozh. Gaze' nu wes sum nu lab mi riidz ni Ñgyoozh. ¹⁷ Orze' briic dey libr ni Isaías, tub yu nu rnii por cuen ni Ñgyoozh, par nu lab mi. Na ornu pshaal mi looñ, orze' byap mi ze' nu cañ nu rniiñ:

¹⁸ Espiriit Yon ni Ñgyoozh Shuaana riib ic mi ya, gun bzum ya nu cha nee de riidz nu sac lo de mbecy zi.

Nunu bzuu nez mi ya par nu gyicya nu cue' gyub ic reña' coz nañ lardoo de mbecy.

Nunu bzuu nez mi ya nu gyicya nu zac de mbecy nu wacsac.

Nunu bzuu nez mi ya par nu gyicya nu gruu nap de mbecy nu rzac zi nu nac nu shiñ ricy nu de losa'y yu.

19 Nunu bzuu nez mi ya nu nee lo dela mbecy nu bi
pshuub ña'n nu nap gyicy nu Ñgyoozh dela
mbecy,
rniiñ, nam.

20 Laab nde' la. Orze' Jesuuz ptub mi gyicy ze'.
Orze' byabic mi ñii ni yu nu zu riiñ nañ yu' ze'.
Orze' gusub mi. Orze' mbi la bgüii de yu nu yu' nañ
yu' ze' lom. 21 Orze' brugyi' rniim. Orze' nam rab
mi dey:

—Lat nu blaba de riidz ze' lo der, orze' byu' niñ
—nam.

22 Orze' dela mbecy nap mnii dey nu nac Jesuuz,
nunu bet lagy dey de riidz cyit na nu mniim. Orze'
na dey rab dey losa'y:

—Ze', ¿a walab yu ii i'ñ See? —na dey.

23 Orze' na Jesuuz rab mi dey:

—Ya rad lagya nu segur la nii der tub riidz cyit.
Riidz ze', nde': “Ru nac ru tub mbecy nu ricy
guñaa. Orze' gyicy yac ru ub ru. Orze' gal nu bicy
ru gyedz Capernaum, ni' zi'l gyicy ru ledz ru ii”,
nii der lo. 24 Ya rishli rnee lo der nu ni tub la
mbecy nu rnii por cuen ni Ñgyoozh, de mbecy ledz
yu wagyicy cuen dey yu. 25 Gun rishli gaal tona'
la yu' byud Israeel tiem ni Elías, yu nu mnii por
cuen ni Ñgyoozh, tiem nu wangyet gyey chon nañ
nu. Nunu tona' la byan mbecy dutuub la lugaar
ze'. 26 Tees Elías wanchay lo ni tub la byud nu yu'
Israeel, sinu guay lo tub byud nu rcyiiñ Sarepta.
Nde' tub gyedz nu ri gaab ga Sidón. 27 Ni' zi'l tiem
ni Eliseo, yu nu mnii por cuen ni Ñgyoozh, tona' la
zigy de mbecy Israeel gurat yu gyedz nu la lepra.
Tees ni tub la dey wangyac yu. Nomaas byac tub

mbecy nu la Naamán. Yu ze' tub mbecy nu bruu lo yu ni Siria —nam.

²⁸ Ornu güeñ dela mbecy nu nguaa nañ yu' ze' de riidz nu mniim, orze' tona' la pcha' ic dey. ²⁹ Orze' wes su dey, nunu gua nu dey Jesuuz por fers la par ru' gyedz ze'. Gaze' nu pshup dey mi too tub bicy ze' nu ri gyedz ze', gun bicy pee dey nu nshet lag dey mi gal ze' nu gya ni bicy ze', gal lo yu la.

³⁰ Orze' bded mi lat dey yam.

Tub mbecy nu bicy ni nuras byac yu

³¹ Orze' Jesuuz yam tub gyedz nu ri lo yu ni Galilea nu la Capernaum. Orze' sab, dzi nu rzu lagy mbecy Israeel, gu'm nañ yu' ze' nu rsya' de mbecy Israeel riidz ni Ñgyoozh par nu lyuum ni dey. ³² Orze' de mbecy za nu la ic dey nu nac coz nu rniim, gun rlyuum ni dey gal nu rlyuu tub mbecy nu riib ic za' la.

³³ Na nañ yu' ze' ri tub mbecy nu bicy ni nuras. Orze' ye la rbish tiy. ³⁴ Orze' nay rab yu Jesuuz:

—Bruu chu. ¿Lagu yad ru lat de, Jesuuz, biñ nu bruu Nazaret? ¿A yad ru par nu za' lor de ya? Ya rad lagya nu ru nac ru mbecy yon ni Ñgyoozh—nay rab yu Jesuuz.

³⁵ Orze' Jesuuz bdza'm ni nuras ze'. Orze' nam rab mi yu:

—Dzi chel, nunu bruu chu lo yu ii —nam.

Orze' nuras ze' mne'y mbecy ze' lo yu lo rgüii la dela mbecy. Orze' gaze' nu bruu chuy lo mbecy ze', nunu se la la bicy yu. ³⁶ Orze' dela mbecy nu yu' ze' gudzib dey. Orze' na dey rab dey losa'y:

—¿Lac yaruu nu nii? ¡Mbecy ii ricy cup yu rish-beey, nunu ricy cup yu mod nu ricy yu mandaar

gashtal nuras, nunu orze' druu chu dey lo mbecy! —na dey.

³⁷ Orze' lueg la bzu riidz ni de coz nu bicy Jesuuz dela lugaar nu yu' gaab ga.

Jesuuz bicy yac mi ñaa gud Bed

³⁸ Orze' Jesuuz bruum nañ yu' ze' nu rsya' de mbecy riidz ni Ñgyoozh. Orze' yam yu' Simoō. Ze' ñaa gud Simoō riib rat mi. Tona' la pcaañ zig nim. Orze' mnishbaa dey lo Jesuuz nu nac mi. ³⁹ Orze' gaze' nu gua Jesuuz bzaab tily mi lom. Orze' bicy mi mandaar nu gruu zig ze'. Orze' bruu zig mi. Gaze' nu lueg la weshtem, nunu brugyi' rzu bich mi nu nac dey.

Jesuuz bicy yac mi zañ mbecy rat

⁴⁰ Na ornu bi za doo na, orze' dela mbecy nu ricy cup famil ni nu rat zañ lo güii, orze' gua nu dey yu lo Jesuuz. Orze' mi ze' briib yaam too tub ga la dey. Gaze' nu byac dey. ⁴¹ Nunu bruu chu zañ nuras nu bicy ni mbecy nu yu' lat de mbecy rat ze'. Orze' nuras ze' rbish ti dey. Orze' na dey rab yu Jesuuz:

—¡Ru nac ru i'ñ Ñgyoozh! —na dey.

Orze' Jesuuz bdza'm ni de nuras ze'. Orze' wansaan mi nu nii zir dey, gun yu' lo dey mi nu nac mi Mesías, biñ nu ca lo cuen nu cyid.

Jesuuz pshaal mi riidz ni Ñgyoozh Galilea

⁴² Na or bza' yu tuuba' dzi na, orze' Jesuuz bruum lat gyedz zam tub lugaar ub zi. Orze' de mbecy brugyi' nu ryub dey mi. Orze' bru'ña dey ze' nu zum. Orze' bicy pee dey nu wazaan yu nu gruum lat dey. ⁴³ Orze' nam rab mi dey:

—Tees ni' zi'l rlagy ñi cha shaala de riidz nap ni gyel gubier ni Ñgyoozh de reña' gyedz, gun par nde' bzuu nez Ñgyoozh ya —nam.

⁴⁴ Orze' Jesuuz gusam pshaal mi de riidz nu bruu lo Ñgyoozh nañ de yu' nu rsya' de mbecy riidz ni Ñgyoozh nu yu' de lo yu ni Judea.

5

Jesuuz bredz mi tap de yu nu rub bel

¹ Guc ñi tub tiem nu Jesuuz brim ru' nisyudoo tub gyedz nu la Genesaret. Orze' de mbecy rcyi'ñ su laa dey mi, gun rlagy dey gyeñ dey de riidz ni Ñgyoozh nu rniim. ² Orze' Jesuuz bzaac mi cyup barc zuñ ru' nisyudoo. Nat laa nañ ñi, gun de yu nu rub bel bruu dey nañ ñi nu za tiib dey gyish niy. ³ Orze' Jesuuz gu'm nañ tub barc ze'. Orze' barc ze', nde' barc ni Simoo. Gaze' nu mniim lo Simoo nu gyicy zet zir yu barc ze' par ru' nisyudoo. Orze' gusub mi, nunu brugyi' rlyuum ni mbecy gal nañ barc ze'. ⁴ Na ornu blazh blyuum ni dey na, orze' nam rab mi Simoo:

—Gua nu barc nir ze' nu gyi ni nisyudoo. Orze' ne'r gyish nir lo nis par nu cub ru bel —nam.

⁵ Orze' na Simoo rab yum:

—Masht, gua la rel ricy de riiñ nu rdub de bel. Ze' ii rila wangad la ma ni de. Tees na como ru mniir, orze' ya ne' gyish ne' lo nisyudoo —nay.

⁶ Na ornu mne' dey gyish niy lo nisyudoo na, orze' tona' la guud bel ni dey. Gashtal ri'ñ la gyish ni dey tanta' nu yu' bel nañ ñi. ⁷ Gaze' nu bicy yaa dey lo losa'y, de yu nu yu' nañ reña' barc par nu cha locyuub dey yu. Gaze' nu gua nu de yu ze'

barc niy. Orze' bdzaa la nañ rup laa barc ni dey nu yu' bel. Se nu ches ti zi'l barc ni dey lo nisyudoo tanta' nu yu' ma nañ ñi. ⁸ Na ornu Bed bzaac yu de nu nde', orze' gusu tib yu lo Jesuuz. Orze' nay rab yum:

—Bruu chu lo Shuaana, gun ya naca mbecy cyi —nay.

⁹ Ni mniy gun gudzib yu, nunu ni' zi'l gudziba' de' zir mbecy nu nac de bel zañ nu guud ze'. ¹⁰ Gaza' Santiag nu Waa, de i'ñ Zebedeo, gudzib dey. De yu ze' losa' Simoo. Orze' Jesuuz nam rab mi Simoo:

—Cue' dzib der, gun nese na la gal nu rub der bel, ni' zi'l te' der de mbecy, gun orze' cyid ca dey icha —nam.

¹¹ Gaze' nu gua zeeñ dey de barc niy par lo yu bigy. Orze' ze' bzeeñ dey barc niy. Orze' za ca dey ich mi.

Jesuuz bicy yac mi tub mbecy nu ta' tub lo gyedz nu la lepra cuerp ni

¹² Tub dzi Jesuuz zam tub gyedz. Orze' ze' bru'ña tub mbecy nu rat tub lo gyedz nu la lepra. Na ornu bzaac yu Jesuuz, orze' wes saa tiily yu gashtal lo yu la. Orze' mnishbaay lo Jesuuz. Orze' nay rab yum:

—Benu rlagy ru, ru gac gyicy yac ru ya —nay.

¹³ Orze' Jesuuz gul yaam yu. Orze' nam:

—Rlagya. Orze' na byac ru —nam.

Orze' lueg la mnit la gyedz ze' cuerp niy. ¹⁴ Orze' na ga' Jesuuz rab mi yu:

—Cue' niir lo ni tub la mbecy, sinu gua lo uz cha lyuur ub ru loy. Orze' cuic ru gun nu rlagy ñi par nu gyacaacy ru par lo Ñgyoozh gal nu mnii Moisees

nu gyicy na, gun orze' gad lagy dela mbecy nu bi byac ru ni güii nu rat ru —nam.

¹⁵ Mas ni mniim, tees de coz nu bicy mi bzu zir ñi. Nunu tona' la mbecy zigy byatublaazh dey lom par nu zuub gyidag dey nim, nunu par nu gyicy yac mi de güii nu rat dey. ¹⁶ Tees Jesuuz bruu chum lo dey zam tub lugaar ub zi nu nii num Ñgyoozh.

Jesuuz bicy yac mi tub mbecy cḥi

¹⁷ Tub dzi zub Jesuuz rlyuum ni de mbecy. Lat ze' nguaa la be mbecy fariseo nu de yu nu rlyuu leey ni Ñgyoozh. De yu ze' bruu dey dela lugaar ni Galilea, nu de lugaar ni Judea, gal nu de lugaar ni Jerusaleeng. Nunu rabee nu Ñgyoozh ricy mi coz ily nu nac Jesuuz nu nac nu bicy yac mi de mbecy rat. ¹⁸ Orze' bru'ña nu dey tub mbecy cḥi lom riib yu lo tub nuun. Bicy pee dey nu chu' nu dey mbecy cḥi ze' nañ yu' ze' nu zub Jesuuz par nu cyish dey yu lom. ¹⁹ Tees wangad mod nu chu' nu dey mbecy cḥi ze', gun dzi yu' mbecy. Gaze' nu gup dey par too yu'. Gaze' nu blaas dey tub gyeegy lat de tej. Gaze' nu pshet dey nuun nu riib mbecy rat ze' lat de mbecy zigy ze' nu zub Jesuuz. ²⁰ Na ornu gud lagy mi nu ricy cup dey consuel lom na, orze' nam rab mi mbecy cḥi ze':

—Ru, de cyir bi byecy ñi —nam.

²¹ Orze' de yu nu rlyuu leey ni Ñgyoozh, nu de mbecy fariseo brugyi' nu rnii too dey: “¿Cyu mbecy yu ii? ¿Lagu rniy coz nu za contr ni Ñgyoozh? Tub zi la Ñgyoozh gac gyicy sulagy mi de cyi nu ricy mbecy”, rnii too dey.

²² Tees Jesuuz gud lagy mi nu ni rnii too dey. Gaze' nu nam rab mi dey:

—¿Lagu ni rnii too der? ²³ Dzi zir a' biigy par nu nee nu bi bicy sulagya de cyir gaze' nu nee wes su nunu bza —nam—. ²⁴ Tees ya nee lo yu re nu gyes suy nunu gzay, gun orze' gad lagy der nu ya, biñ nu byac mbecy, ricy cupa rishbeey nu gyicy sulagya de cyi mbecy gyishlombecy ii —nam.

Gaze' nu nam rab mi mbecy chi ze':

—Ya nee du ru wes su, gush nuun nir nunu yaa yu'r —nam.

²⁵ Orze' lueg la wes suy lo rgüi la de mbecy zigy ze'. Orze' bdu' yaay nuun nu byub yu lo ze'. Orze' yay yu'y. Nunu ryabic yu gyel mbecy ni Ñgyoozh.

²⁶ Orze' dela yu nu nguaa ze' za nu la ic dey. Orze' byabic dey gyel mbecy ni Ñgyoozh, nunu tona' la gudzib dey. Orze' na dey:

—Dzi na bzaac na tub nusuriidz ily —na dey.

Jesuuz bzum Leví nu gac nuy mi

²⁷ Ornu bded ni de nu nde', orze' bruu Jesuuz zam. Orze' bzaac mi tub yu nu rboo tiñ por cuen ni gubier Rom. Yu ze' lay Leví. Zub yu ze' nu rboo dey tiñ. Orze' na Jesuuz rab mi yu:

—Da ca icha —nam.

²⁸ Orze' wes suy. Bzeen ga lay de yu nu nguaa nuy ze' za cay ich mi.

²⁹ Na despuees, orze' Leví bicy yu tub sa' ily yu'y nu nac Jesuuz. Nunu ze' nguaa ga' de yu nu rboo tiñ por cuen ni gubier Rom, gal nu zigy zir de mbecy. Tublaazh la nguaa dey lo mez row dey gyit. ³⁰ Tees de mbecy fariseo, gal nu de yu nu

rlyuu ley ni Ñgyoozh, brugyi' nu zi ga la rnii dey nu de yu nu rsya' lo Jesuuz. Orze' na dey:

—¿Lagu row der, nunu lagu ro' der nis nu de mbecy nu rboo tiñ por cuen ni gubier Rom, gal nu nu de mbecy cyi? —na dey.

³¹ Orze' Jesuuz nam rab mi dey:

—Par de mbecy ruub walagy ñi doctoor, tees par de mbecy rat rlagy ñi. ³² Gal nu doctoor wagyicy nuy mbecy ruub guñaa, ni' ya a' yapa nu redza mbecy nu sac cyi, sinu dredza de mbecy cyi par nu ne' dey de cyiy —nam.

De yu nu rsya' lo Jesuuz waca dey ni ub yu nu goy gyit

³³ Orze' na dey rab yu Jesuuz:

—De yu nu rsya' lo Waa rca dey ni ub yu nu cue' goy gyit lat nu rzu bich dey nu nac Ñgyoozh. Nunu cya' rnii nu dey mi. Nunu ni' zi'l ricy de yu nu rsya' lo de mbecy fariseo. Ze' de yu nu rsya' lo ru de dzi la row dey nunu ro' dey —na dey.

³⁴ Orze' Jesuuz nam rab mi dey:

—Ya na gal nu na tub nob. ¿Walab gaal gac ca de yu nu yu' lo fandang ni ub yu nu cue' goy gyit lat nu gabee rded nob lat dey? ³⁵ Tees shuub tub dzi nu co mbecy nob ze' lat dey. Orze' gaze' nu gac ca dey ni ub yu nu cue' goy gyit par nu gyicy shni dey.

³⁶ Orze' Jesuuz mniim tub riidz tiily lo dey. Orze' nam:

—Gun mod nu bicy de gyitoo bel, nde' nañ gal nu na tub negy gush. Ni tub la mbecy washi'ñ mi tub negy cub nu gad tub la' negy nu gyicy mi rumien negy gush, gun nis gash beñ negy cub ze'. Orze' gyicy ñi nu shaa negy cub ze'. Nunu negy

cub ze' wagyap ñi negy gush ze'. ³⁷ Nunu mod nu ricy de gyitoo bel, nde' nañ gal nu na tub gyid gush nu rgu' choow dey ñup ni urbyay. Ni tub la mbecy wac cu' choow dey ñup ni urbyay cub nañ gyid gush, gun nis cyich ñiñ. Orze' shu dela ñup ni urbyay ze', nunu nit lo gyid ze'. ³⁸ Nde' nu rlagy ñi cu' choow dey ñup ni urbyay cub nañ gyid cub, gun orze' rup laañ wanit lom. ³⁹ Nunu ni tub la yu nu ro' ñup ni urbyay gush walagy yu go'y ñup ni urbyay cub, gun rnii dey nu “Nap zir ro' ñup ni urbyay gush”, rnii dey —nam.

6

De yu nu rsya' lo Crisht rcyug dey za' ni trig sab, dzi nu rzu lagy mbecy

¹ Na tub dzi sab, dzi nu rzu lagy mbecy Israeel, orze' Jesuuz bded mi nu de yu nu rsya' lom lat tub nac trig. Orze' de yu nu rsya' lom brugyi' nu rcyug dey za' ni trig ze'. Gaze' nu brugyi' nu rzuub dey ñi nu yaay. Orze' gaze' nu bdow dey ñi. ² Orze' la be mbecy fariseo na dey rab yu Jesuuz:

—¿Lagu ricy de ru riiñ nu a' yad ñi nu gyicy mbecy dzi nu rzu lagy den? —na dey.

³ Orze' na Jesuuz rab mi dey:

—¿Walab gaal nigul sya' der lat de riidz ni Ñgyoozh ze' nu rniiñ de coz nu bicy Dabi lat nu byan yu nu de losa'y nu gusa nuy? ⁴ Orze' gu' dey nañ yu' ni Ñgyoozh. Bloo dey de gyishtily nu nguaa ze'. Nde' de uz nu zu riiñ lo Ñgyoozh zi'l gac gow yuñ. Tees Dabi bdow yu gyishtily ze', nunu briica'y gow de yu nu gusa nuy —nam—. ⁵ Gun

ya, biñ nu byac mbecy, riib icā sab, dzi nu rzu lagy mbecy —nam.

Jesuuz bicy yac mi tub mbecy yaa gush beñ

⁶ Na tuuba' dzi sab, dzi nu rzu lagy mbecy, orze' gu'm nañ yu' ze' nu rsya' mbecy riidz ni Ñgyoozh. Orze' brugyi' rlyuum ni dey, nunu nañ yu' ze' ri tub mbecy nu gush beñ tub la' yaa beey. ⁷ Orze' la be de yu nu rlyuu leey ni Ñgyoozh, gal nu la be mbecy fariseo psiiñ dey nim, ben a gyicy yac mi mbecy rat ze' sab, dzi nu rzu lagy mbecy, gun dzi ga gad tub mod nu riib dey cyi ic mi. ⁸ Tees Jesuuz gud lagy mi la coz rnii too dey. Orze' nam rab mi mbecy nu gush beñ yaa ze':

—Wes su. Da lō gashtal gazel ii —nam.

Orze' mbecy nu gush beñ yaa ze' wes suy. ⁹ Orze' Jesuuz nam rab mi de' zir de mbecy:

—Na ya dugyi' tub coz lo der. ¿Ca na coz nu nap zuñ par lo leey ni Moisees nu gyicy na sab, dzi nu rzu lagy mbecy? ¿A nap nu gyicy na coz nap, o ti nap nu gyicy na coz a' nap? ¿A nii tub dzi nu gloo mbañ naa mbecy, o ti nii tub dzi nu gnit lon mbecy? —nam.

¹⁰ Orze' bgüim lo de yu nu yu' lom. Gaze' nu nam rab mi mbecy yaa gush beñ ze':

—Bzaab yaar lō —nam.

Orze' mbecy ze' bzaab yaay lom. Orze' byanap la yaay. ¹¹ Ze' de' zir de mbecy tona' la pcha' ic dey. Orze' brugyi' nu ro dey riidz ben lac mod gyicy nu dey mi.

Jesuuz pcuim trocyup aposht nim

¹² Orze' laab tiem ze' Jesuuz zam tub logyi' nu nii num Ñgyoozh. Orze' gua la rel nu rim ze' rnii num Ñgyoozh. ¹³ Na ornu bza' yu na, orze' bredz mi de yu nu rsya' lom. Orze' lat de yu ze' bloo sum trocyup dey. Orze' bloo lam dey aposht. ¹⁴ Orze' nii nu la de trocyup de yu nu bloo sum ze'. Gush lañ: Simoo, yu nu bloo lam Bed, nu bicy yu Ndrees, nu Santiag, nu Waa, nu Lip, nu Bartol, ¹⁵ nu Mateo, nu Tomaas, nu Santiag, i'ñ Alfeo, nu Simoo, yu nu nac partid nu la celote, ¹⁶ nu Judas, bicy Santiag, nu Judas Iscariote, yu nu bish cya ich mi.

Jesuuz rlyuum ni zigy mbecy

¹⁷ Orze' Jesuuz bruum logyi' bet mi nu de yu nu bloo sum ze'. Gaze' nu gucua dem tub ze' nu lacy. Orze' ze' bi nguaa zigy de yu nu rsya' lom. Nunu nguaa zigy zir mbecy, de yu nu bruu lo yu ni Judea, nu de yu nu bruu Jerusaleeng, nu yu nu bruu Tiro nu Sidón, cyup gyedz nu ri ru' nisyudoo. Dela dey ze' yad dey par nu zuub gyidag dey de riidz nu rnii Jesuuz, nunu par nu gyicy mi nu nit de güii nu rat dey. ¹⁸ Nunu ni' zi'l bicy yac mi de mbecy nu bicy ni nuras. ¹⁹ Nde' nu dela de mbecy rlagy dey nu gal yaa dey Jesuuz, gun gyicy yac mi dey nu nac fers nu gruu nim.

Dzi ni de mbecy

²⁰ Gaze' nu Jesuuz bgüim lo de yu nu rsya' lom. Gaze' nu nam rab mi dey:

—Dzi ni de ru mbecy nu gyel zi zu, gun de ru gzac ru lo gyel gubier ni Ñgyoozh.

²¹ 'Dzi ni de ru mbecy nu ran na, gun orze' gad nu gyel ni der.

'Dzi ni de ru mbecy nu ruun na, gun par lo orze' gyigy der.

²² 'Dzi ni der ornu rzi lagy mbecy lo der, nunu ornu cyuu nu dey der, nunu ornu rnii zi dey ni der, nunu ornu rnii dey nu nac der mbecy a' nap nu nac ya, biñ nu byac mbecy. ²³ Orze' tona' la bet lagy der dzi ze', nunu gal briich la gyi' der lo yu, gun gyibaa gyad tub i der nu tona' la coz ily, gun ni' zi'l mod de gyitoo bel ni den pshet zi dey de mbecy nu rnii por cuen ni Ñgyoozh.

²⁴ 'i'Tees cuaa de ru mbecy guani'ñ, gun bi bicy der gusht ni der!

²⁵ 'i'Nunu cuaa de ru mbecy nu dza nañ, gun par lo gyan der!

'i'Nunu cuaa de ru mbecy nu dzi rigy na, gun par lo gun der nu gyicy shnir!

²⁶ 'i'Cuaa ga' der ornu dela mbecy ryabic dey gyel mbecy nir, gun ni' zi'l de too bel ni dey byabic dey gyel mbecy ni de mbecy nu mnii fals por cuen ni Ñgyoozh gulas!

Jesuuz rlyuum ni de mbecy nu ca dey de losa' yuuy

²⁷ 'Tees ya rnee lo der mbecy nu rzuub gyidag ne ya: Pca der losa' yuur, nunu nap bicy nu der de yu nu rzi lagy lor. ²⁸ Nunu nap mnii der ni de yu nu shiñ rnii rab de ru. Nunu bdiñ der lo Ñgyoozh ni de yu nu rnii zi ni der. ²⁹ Benu tub mbecy shet yu zig tub la' ya lor, orze' zaaba' der tub la' ga' loy nu shet yu. Nunu benu ca na mbecy rbooy chicyet ni der, orze' briic la niy, nunu briica' yaag ru niy. ³⁰ Nunu benu ca na mbecy cyiñ yu la coz lor, orze' cuic ru ñii niy. Nunu benu ca na mbecy rbooy la coz nir,

orze' cue' niir loy nu gyabic yu nir. ³¹ Nunu bicy nu der de' zir mbecy gal mod nu rlagy ub der nu gyicy nu dey der.

³² 'Nunu benu de ru ca zi'l der de yu nu rca zi'l ru, ¿a dzi coz ilya' ricy der rziir? Gun mas gashtal de mbecy cyi rca dey losa'y benu ni' rca losa'y ub yu. ³³ Nunu benu nap gyicy der nu de mbecy nu nap zi'l gyicy nu ru, ¿a nde' la nu dzi coz ilya' ricy der, rziir? Gun mas gashtal de mbecy cyi ni ricy dey. ³⁴ Nunu benu rbic der de coz nu rboo mbecy nu rzii der nu gyabica'y nir, ¿a dzi coz ilya' ricy der rziir? Gun ni' zi'l de mbecy cyi rbica' dey de coz rboo losa'y. Nunu rgyish lo dey nu gyabica' losa'y niy. ³⁵ Orze' pca der losa' yuur, nunu nap bicy nu der dey, nunu briic der coz nu co losa'r. Nunu cue' cyish lo der nu gyabic yu ni tub la coz nir. Orze' gyad tub i der nu tona' la coz ily. Nunu orze' gyac der iñ Ñgyoozh, biñ nu gya zir zu. Gun mi ze' nap mi num de mbecy nu sac graseer, gal nu de mbecy a' nap. ³⁶ Guc der mbecy nu rashni lagy losa', gal nu Ñgyoozh uz der rashni lagy mi mbecy.

Cue' nii mbecy nu yu' falt ni losa'y

³⁷ 'Cue' nii der nu yu' falt ni losa'r, gun orze' Ñgyoozh waniim ti yu' falt ni der. Cue' nii der nu rlagy ñi nu cha losa'r lo cashtig, gun orze' Ñgyoozh waniim nu de ru rlagy ñi char lo cashtig. Bicy sulagy der ni losa'r. Orze' Ñgyoozh gyicy sulagya'm ni der. ³⁸ Briic der coz nu galagy losa'r, gun orze' Ñgyoozh cuica'm de coz nu galagy der. Nunu cuic za' lam ñii ni der. Gun dub gal nu gyicy nu der losa'r, dub ni gyicy num de ru —nam.

³⁹ Orze' Jesuuz mniim tub riidz tiily lo dey. Orze' nam:

—¿Walab gaal gac tub lo ca' lyuuy nez ni tuuba' mbecy lo ca'? ¿A walab orze' rup laa dey gyet lag yu nañ tub zi'l gyeegy? ⁴⁰ Sac ni tub yu nguzh scuel nu zily zir nac yu par moscuel niy. Tees ornu lazh sya' dey, orze' gaze' nu saap yu moscuel niy.

⁴¹ 'De ru na der gal na mbecy nu rgu' cuen toop mi' nu ri urlo losa', ze' yabicy nu ri urlo ub der, nde' wagyicy cuen der ñii. ⁴² Ze' benu ri tub yabicy urlo der, ze' wayicy cuen ru ñii, ¿orze' lagu rnii ga' der lo losa'r: “Doo urlor, gun loo toop mi' ze'”, rnii ga' der? ¡A mbecy rzuu lo! Bloo yabicy ily nu ri urlor loga la, gun orze' nap zir zac ru cor toop mi' nu ri urlo losa'r.

Jesuuz rlyuum ni de mbecy nu dub gal nu na mbecy dub ni na coz nu ricy yu

⁴³ 'Sac ni tub la yag nap nu cuic ñi uugy shiñ na, nunu ni' sac tub yag a' nap na nu cuic ñi uugy nap. ⁴⁴ Tub ga la yag rad lagy den la nañ nu nac de uugy nu rbic ñi, gun tub ya gyech wac cuic ñi urlas mni. Nunu ni' tub gyish gyech wac cuic ñi urbyay. ⁴⁵ Benu tub mbecy nap, yu ze' rniyy coz nap, gun coz nap yu' nañ lardooy. Benu tub mbecy a' nap, rniyy coz a' nap, gun yu' coz a' nap nañ lardooy. Dub gal lac na coz nu yu' nañ lardooy dub ni na coz nu rniyy.

Jesuuz rlyuum ni de mbecy nu rlagy ñi gyicy yac dey nu de riidz ni Jesuuz par nu zu fert dey

⁴⁶ '¿Lagu rnii der ya, “Shuaana, Shuaana”, rnii der ze' wagyicy der gal nu rnee? ⁴⁷ Benu tub mbecy cyid yu lo, nunu gyeñ yu riidz nu rnee,

nunu gyicy yac yuñ, orze' ya rnee lor la nay.
⁴⁸ Orze' yu ze' nay gal na tub mbecy nu bzaa tub yu'. Gyi bduuñ yu simient niñ. Orze' bzuub yu simient niñ lo gyita'. Na ornu bet gyey, orze' guuly gyooow. Orze' bdugyiñ ich yu' ze'. Tees wangyes saañ, gun nap byaañ. ⁴⁹ Tees dela mbecy nu rzuub gyidag coz nu rnee, ze' wayicy dey gal nu rnee, de yu ze' nay gal na tub mbecy nu bzaa tub yu'. Ze' ni wansu lay simient niñ. Na ornu bet gyey, orze' guuly gyooow. Orze' bdiñ yeeñ yu' ze'. Orze' wes saañ. Orze' mnit lo dutuub la yu' ze' —na Jesuuz.

7

Jesuuz bicy yac mi tub moz ni tub yu nu riib ic tub gaynal soldad Rom

¹ Na ornu blazh mniim lo de mbecy, orze' zam tub gyedz nu la Capernaum. ² Orze' ze' rcyiiñ tub mbecy nu riib ic tub gaynal soldad Rom. Ze' zu tub moz niy nu dzi rcay. Orze' moz ze' mbish rat yu. Se nu gat zi'l yu. ³ Na ornu mbecy nu riib ic ze' güeñ yu riidz nu rnii mbecy ni de coz nu ricy Jesuuz, orze' bzuu nez yu la be yu bel ni de mbecy Israeel nu cha nishbaa dey lo Jesuuz, gun orze' cham gyicy yac mi moz niy. ⁴ Orze' de yu bel ze' gua dey mnishbaa dey lo Jesuuz. Orze' na dey rab yum:

—Yad ñi nir nu locyuub ru mbecy ze', ⁵ gun dzi rcay de mbecy Israeel. Nunu laab yu bicy yu nu byaa yu' nu rsysa' de riidz ni Ñgyoozh —na dey.

⁶ Orze' Jesuuz za num dey par yu' mbecy nu riib ic ze'. Na ornu bi ya gaab dem ze' nu zub yu'y, orze'

yu nu riib ic ze' bzuu nez yu amig niy nu cha nii dey lo Jesuuz. Orze' na dey rab yu Jesuuz:

—Jesuuz, yu nu riib ic de soldad mniiy nu yap nee lor nu walagy yu gyicy seed yu ru, gun wangyap yu nu char yu'y. ⁷ Nunu nde' nu ni wancyiid cheel ub yu ru. Nomaas nu nii zi'l ru nu gyac moz niy. Orze' gyac yu nay. ⁸ Gun ni' yu ze' ricy yu de coz nu rnii de yu nu gya zir zu par ub yu, nay. Nunu ni' yu' ga' soldad nu gash zir zu par ub yu, nay. Na ornu niy lo tub yu nu chay, orze' chay. Na ornu rbedz yu tuuba'y nu chay loy, orze' rzay. Na ornu rniiy lo moz niy nu gyicy yu tub riiñ niy, orze' ricy yuñ —na amig ni yu nu riib ic ze'.

⁹ Na ornu güeñ Jesuuz de riidz ze', tona' la za nu ic mi. Orze' bish cyam bgüim lo de mbecy nu za ca ich mi. Orze' nam rab mi dey:

—Ya rishli rnee lo der nu lat de mbecy Israeel nigul gyapa ni tub la mbecy nu ricy cup consuel lo gal nu na consuel nu ricy cup yu ii —nam.

¹⁰ Orze' de amig ze' niy bish cyay yay. Na ornu bri dey na, orze' bi byac moz ni yu nu riib ic tub gaynal soldad ze'.

Jesuuz bicy mi nu byabañ i'ñ tub byud

¹¹ Na ornu bded de nu nde' na, orze' Jesuuz zam tub gyedz nu la Naíñ. Orze' de yu nu rsysa' lom, gal nu zigy de mbecy za nu dey mi. ¹² Na cuanzir nu brim ru' gyedz na, orze' bzaac mi nu yad de mbecy nu yad cach dey añ. Añ ze', yu ze' tub zi lay zuy ni ñaay. Nunu ñaay, mi ze' tub byud. Orze' zigy mbecy gyedz ze' yad nu dey añ ze'. ¹³ Na ornu Shuaan na bzaac mi, orze' gushni lagy mim. Orze' nam rab mim:

—Cue' gun ru —nam.

¹⁴Orze' becha'm lo gyiñ ni añ ze'. Orze' gul yaam ñii. Orze' de mbecy nu za nu gyiñ ze' guchu' ri la dey. Orze' na Jesuuz rab mi añ ze':

—Yu feñ, ya rnee dū ru: “¡Wes su!” —nam.

¹⁵Orze' mbecy nu gut ze' gusub yu nañ gyiñ ze'. Orze' brugyi' rniy. Orze' Jesuuz byabic mi yu ni ñaay. ¹⁶Orze' dela mbecy nu bzaac de nde' tona' la gudzib dey. Orze' brugyi' nu ryabic dey gyel mbecy ni Ñgyoozh. Orze' na dey:

—Bi bruu zac tub yu lily nu rnii por cuen ni Ñgyoozh lat de ub na —na dey.

Orze' rnii ga' dey:

—Ñgyoozh yad mi nu locyuub mi de mbecy nim —na dey.

¹⁷Orze' brush las de coz nu bicy Jesuuz par dutuub la lo de yu ni Judea gal nu de lugaar nu yu' gaab ga.

Waa nu driib nis mbecy rzuu nez yu mbecy nu cha nuy rasoo lo Jesuuz

¹⁸Orze' mnii de yu nu rsya' lo Waa nu driib nis mbecy dela coz nu ricy Jesuuz. Orze' bredz yu cyup de yu ze'. ¹⁹Orze' bzuu nez yu de yu ze' nu cha tugyi' dey lo Shuaan na Jesuuz ben a laab mi biñ nu ca lo cuen nu cyid, o ti cuez dey nu cyid reña'm. ²⁰Orze' de yu ze' za dey lo Jesuuz. Na ornu bru'ña dey na, orze' na dey rab yum:

—Waa nu driib nis mbecy bzuu nez yu de ya nu yap tugyi' lor ben a laab ru biñ nu ca lo cuen nu cyid, o ti lez de nu cyid reña'm —na dey.

²¹Orze' laab or la ze' bicy yac mi zigy mbecy rat. Ricy yac mi mbecy nu rzac zi nu nac güii. Nunu ii

rboo chum nuras nu bicy ni mbecy. Nunu ricy mi nu zigy lo ca' rzac yu. ²² Gaze' nu lueg la mniim lo cyup yu nu bzuu nez Waa ze'. Orze' nam:

—Yaa nii der lo Waa dela coz nu bzaac der, gal nu dela coz nu güeñ der. Nii der nu de lo ca' bi rzac dey. Ze' de mbecy coj rac rza nap la dey. Ze' de mbecy rat nu ta' gyedz nu la lepra bi byac dey. Ze' de mbecy go' bi reñ dey. Nunu de mbecy nu bi gut byabañ dey. Nunu dunii de riidz nu sac ni Ñgyoozh lo de mbecy zi. ²³ Dzi ni mbecy nu wayeca nu ricy cup consuel lo —nam.

²⁴ Na ornu bi ya de yu ze' na, orze' Jesuuz bzat mi Waa lo de mbecy zigy. Orze' nam:

—Ornu gua der gua güiir Waa tub lugaar ub zi, ¿la nay guzii der? ¿O ti guzii der nu nac yu mbecy nu ricy cyup ic, gal nu na tub yagyi nu rguul bi par re par ii la guzii der? ²⁵ Ze' benu walab, orze' ¿la na tub mbecy gua güii der? ¿A gua güii der tub mbecy nu zu negy cyit na? Walab, gun rad lagy der nu yu nu zu negy cyit na, nunu zu baay, yu ze' rcyiiñ yu yu' rey. ²⁶ ¿Orze' la gaal na tub mbecy nu gua güii der? ¿A gua güii der tub yu nu rnii por cuen ni Ñgyoozh? Laab, como ya rnee lo der nu gua güii der tub mbecy nu zily zir nac gaze' de yu nu mnii por cuen ni Ñgyoozh. ²⁷ Gun laab Waa rzat riidz ni Ñgyoozh ze' nu rniiñ:

Ñgyoozh nam rab mi biñ nu ca lo cuen nu cyid:

Ya zuu neza yu nu nii por cuen ne nu cha gay lor, gun orze' zu lily yu nez nu char, nam.

Ni rnii riidz ni Ñgyoozh. ²⁸ Gun ya rishli rnee lo der nu ni tub la mbecy a' zily zir nac yu gaze' Waa par

lo Ñgyoozh. Tees yu nu gash zir zu lat de yu nu gyub ic Ñgyoozh, yu ze' gya zir zuy par Waa —nam.

²⁹ Orze' dela mbecy mas mbecy nu rboo tiñ por cuen ni gubier Rom, ornu güeñ dey de riidz nu mnii Jesuuz, orze' mnii dey nu mod nu rlagy Ñgyoozh, nde' mod nu laab ñi. Gun anzir Waa briic yu nu zu nis dey. ³⁰ Tees de mbecy Fariseo, gal nu de yu nu rlyuu leey ni Ñgyoozh, wangelagy dey nu ndriib nis Waa dey, ca nu bzu chu dey mod nu rlagy Ñgyoozh nu gyicy num dey.

³¹ Orze' na ga' Jesuuz:

—¿La ñuu tub coz nu saapa de mbecy nu yu' tiem na? ¿La ñuu na dey? ³² Na dey gal nu na yu nguzh nu nguaa rgyit lat yagyi'. Orze' ye la rbish ti dey nguaay. Orze' na dey rab yu losa'y: “Blaa de di gyel cyit nu bdzi. Tees wangelgyi' der. Na ornu bdulru' de tub di nu shni za, ni wanguun der”, na dey. ³³ Gun de mbecy nu yu' na wangelagy dey ni tub la mod. Gun Waa biid yu wangow nap yu. Nunu wango'y ñup. Orze' de ru rnii der nu tub nuras bicy niy yu. ³⁴ Ze' ornu ya, biñ nu byac mbecy bri, orze' ya rdaw la zi'l coz, nunu rdo' la zi'l ñup. Orze' rnii der nu naca mbecy row shaad, nunu naca mbecy ro' ñup, nunu naca amig ni de mbecy bdune', nunu naca amig ni de yu nu rboo tiñ por cuen ni gubier Rom. ³⁵ Ni tub la mod wangyet lagy der. Tees rabee nu de mod nu psa' lagy Ñgyoozh, nde' mod nap, nu nac nu gruu nap ñi —nam.

Jesuuz zam yu' tub mbecy fariseo nu la Simoq

³⁶ Orze' tub mbecy fariseo bredz yu Jesuuz nu cha tom gyit yu'y. Orze' guam yu'y. Na ornu bi

zub mi lo mez na, ³⁷ orze' bru'ña tub biñ mñaal lom. Orze' mi ze' tub biñ nu rcyíiñ gyedz ze', nunu nac mi mbecy a' nap. Orze' gud lagy mi nu Jesuuz za tom gyit yu' mbecy fariseo ze'. Orze' bru'ña num tub bas nu byaa nu gyita' nu la alabastro. Ze' nañ bas ze' dza laa nu yu' nis zguul. ³⁸ Orze' gusub tiily mi yeñ gyi' Jesuuz. Ruun mi. Gaze' nu rcoom nis urlom gyi' Jesuuz. Orze' gaze' nu rcuiigy mi ñii nu gyich ic mi. Lat ze' pca ru' biñ mñaal ze' gyi'm. Orze' pcoo ga'm asecy zguul ze' gyi' Jesuuz. ³⁹ Na ornu mbecy fariseo, yu nu bredz Jesuuz nu guam yu' ze', bzaac yu de coz nu bicy biñ mñaal ze', orze' nay nañ lardooy: “Benu rishli gaal mbecy ii nac yu tub yu nu rnii por cuen ni Ñgyoozh, orze' gad lagy yu la na biñ mñaal nu gul mi yu. Mi re tub biñ mñaal a' nap”, rnii tooy. ⁴⁰ Orze' na Jesuuz rab mi mbecy fariseo ze':

—Simoo, ya rlagya nee tub coz lor —nam.

Orze' na mbecy fariseo ze' rab yu Jesuuz:

—Mnii lo, masht —nay.

⁴¹ Orze' na Jesuuz:

—Cyup mbecy zaab yu tiñ ni tub mbecy nu rbic tiñ nu rboo losa'. Tub yu zaab yu gaay gaynal tiñ plat. Ze' tuuba'y zaab yu cyaal gaynal tiñ plat.

⁴² Orze' como rup laa dey wangac gyabic yu tiñ ze', orze' yu nu rbic tiñ ze' bicy sulagy yu di'ñ rup laa dey. Na mnii lo Simoo: ¿ca na de yu ze' rca zir dey yu nu rbic tiñ ze'? —nam.

⁴³ Orze' na Simoo:

—Ya rzee nu mbecy nu coz ily zir bicy sulagy yu ni ze', yu ze' rca zir yu yu nu briic tiñ ze' co dey —nay.

Orze' na Jesuuz rab mi yu:

—Laab ni gal nu mniir —nam.

⁴⁴ Orze' lat nu rgüim lo biñ mñaa ze', orze' na Jesuuz rab mi Simōo:

—¿A rzac ru biñ ii? Ya, ornu gu' nañ yu'r, orze' wancuic ru nis nu diba gyi'. Ze' biñ mñaa ii bdiib mi gyi' nu nis urlom, nunu pcuiigy mi ñii nu gyich toom. ⁴⁵ Ru ni wanca ru'r ya, tees biñ mñaa ii nese nu gu'm nañ yu' ii wanchecam nu rca ru'm gyi' —nam—.

⁴⁶ 'Ni wancoor asecy too, tees mi ii pcoom asecy zguul gyi'. ⁴⁷ Nde' nu ya rnee lor nu Ñgyoozh gyicy sulagy mi dela cyi zañ nu bicy mi, gun tona' la rcam ya. Tees benu Ñgyoozh gyicy sulagy mi de cyi ñuu zi ni tub mbecy, orze' yu ze' beñ zi rcay ya —nam.

⁴⁸ Orze' nam rab mi biñ mñaa ze':

—Ñgyoozh bi bicy sulagy mi de cyir —nam.

⁴⁹ Orze' de yu nu nguaa num lo mez brugyi' nu ro dey riidz nu losa'y. Orze' na dey:

—¿Cyu mbecy yu ii? Mas gashtal cyi mbecy ricy sulagy yu —na dey.

⁵⁰ Orze' nam rab mi biñ mñaa ze':

—Ru bruu mbañ ru nu nac nu bicy cup ru consuel lo. Na yaa nu dub gusht la —nam.

8

De biñ mñaa nu rlocyuub Jesuuz

¹ Na ornu bded de nu nde' na, orze' Jesuuz gusam de gyedz, gal nu de ranch. Orze' pshaal mi de riidz nu sac ni gyel gubier ni Ñgyoozh. Nunu de trocyp de aposht gusa nu dey mi. ² Nunu ni' la be de biñ mñaa gusa num mi. Lat ze' ri Li nu bruu tub gyedz nu la Magadán. Jesuuz bloo chum gagy

nuras lo mi ze'. ³ Nunu ni' zi'l ri Wan, mña Cuza. Cuza yu ze' yu nu riib ic asunt ni Herodes. Nunu ri ga' Susan lat ze', gal nu zañ zir biñ mña. Orze' de biñ mña ze' rlocyuub dem Jesuuz, gal nu de yu nu rsysa' lom. Rlocyuub dem Jesuuz nu nac de coz nu rad ni dem.

Riidz tiily ni de mbigy

⁴ Tona' la zañ mbecy bruu dey ledz yu za dey lo Jesuuz. Orze' tona' la mbecy ziggy byatublaazh dey lom. Orze' brugyi' rniim nu riidz tiily. Orze' nam:

⁵ —Tub mbecy bruuy zay za nuuz yu mbigy. Lat nu rtich yu de mbigy ze', yu'ñ bet lag ñi ru' gyernez. Orze' mbecy bded yu bzuub gyi'y tooñ. Nunu bru'ña chigyiñ bdow ma ñii. ⁶ Ze' yu' ga'ñ bet lag ñi lo yu las ru' nu ri gyita' par nañ. Orze' ornu briib ñi na, orze' guwach ñi, gun a' lyup lo yu. ⁷ Ze' yu' ga'ñ bet lag ñi lat gyeach. Orze' gyeach tublaazh la guuly ñi nu de ya mni ze'. Orze' pcyiig ñi de ya mni ze'. ⁸ Ze' yu' ga'ñ bet lag ñi lo yu nap. Briib ñi nunu guuly ñi. Orze' tona' la cosech nap briic ñi. Gashtal tub gaynal mbigy briic tub ga mbigy nu bdunuuz —nam.

Orze' na ga'm:

—jMbecy nu zub gyidag rlaggy ñi gyicy yu nu gyet lag yu cuen! —nam.

La gyi' rniim nu riidz tiily

⁹ Orze' de yu nu rsysa' lom bdugyi' dey lom lac yaruu de riidz tiily ze'. ¹⁰ Gaze' nu nam rab mi dey:

—Ñgyoozh briic mi nu gad laggy de ru de coz ni gyel gubier nim, de coz nu wagad laggy mbecy gulas. Ze' de' zir mbecy ya shaalā lo dey nu riidz

tiily. Gun orze' mas zac dey, tees wayu' loy, nunu mas gyeñ dey, tees wayet lag dey cuen —nam.

Jesuuz rniim lac yaruu de riidz tiily ze'

¹¹ Orze' nam:

—Orze' na ya nee lo der lac yaruu de riidz tiily ze'. Orze' de mbigy ze' nañ gal na riidz ni Ñgyoozh.

¹² Orze' de mbigy nu bet lag ru' gyernez, nde' nañ gal nu na mbecy nu reñ de riidz ni gyel gubier ni Ñgyoozh. Rnii mbecy riidz ze' lo dey, tees orze' dru'ña nuras rbooy de riidz ze' nañ lardoo dey, gun orze' cue' nu cheña lagy dey niñ. Orze' cue' nu gruu mbañ dey. ¹³ Ze' mbigy nu bet lag lo yu las ru' nu ri gyita' par nañ, nde' nañ gal nu na de mbecy nu reñ de riidz ze'. Orze' lueg la “O” rniiy nunu yet lagy yu. Tees a' fert yu par nu wacshet riidz ze' sheñ lyuñ nañ lardooy. Orze' la be zi'l dzi ragyeey. Tees ornu shuub dzi nu gac preb dey, orze' wagyeey dey. ¹⁴ Ze' de mbigy nu bet lag lat de ya gyech ze', nde' nañ gal nu na mbecy nu rzuub gyidag de riidz ze'. Tees como mbecy ze' dzi zuy shcab ni de coz ni gyishlombecy, nunu como rlagy yu gyicy yu gusht niy, orze' de nde' rsoow ñi lo de riidz ze'. Orze' nde' nu wacuic riidz ze' cosech nañ lardoo mbecy ze'. ¹⁵ Ze' de mbigy nu bet lag lo yu nap ze', nde' mbecy nu rzuub gyidag de riidz ze' nu lardooy. Orze' bicy yac dey niñ. Orze' briic ñi cosech nap nañ lardoo dey —nam.

Riidz tiily ni candiil

¹⁶ Orze' na ga' Jesuuz:

—Ni tub la mbecy wacaa dey gyi tub candiil nu riiy ñi nañ tub la coz, o nañ tub nuun, sinu zuub dey ñi se'ñ, gun orze' cuic ñi yaa lo de yu nu

chu' nañ yu'. ¹⁷ Ni' zi'l rac nu de riidz nu bruu lo Ñgyoozh. Gun dela de riidz ngach nim gyicy mi nu gad lagy de mbecy, nunu dela de riidz nu wagad lagy dey, shaal mi ñii lo dey.

¹⁸ 'Orze' nap bzuub gyidag der, gun yu nu ricy cup sheñ, sheñ zir gad niy. Ze' yu nu sac ni, gashtal coz miiñ nu rnii tooy nu gyicy cup yu gruuñ niy —nam.

Bru'ña de famil ni Jesuuz

¹⁹ Orze' bru'ña ñaam, nu de bicy mi. Tees wangac ñgyecha' dey lo Jesuuz, gun dzi yu' mbecy lom.

²⁰ Orze' tub mbecy byooy rishlo Jesuuz. Orze' nay rab yum:

—Ñaar nu de bicy ru yu' dey gashtal ich yu' re, nunu rlagy dey zac yu ru —nay.

²¹ Orze' na Jesuuz rab mi yu nu byoo rishlom ze':

—Yu nu reñ de riidz ni Ñgyoozh nunu “O” rniiy nu rzuub gyidag yuñ, orze' de yu ze' nac dey bicya nu ñaa —nam.

Jesuuz mniim lo gyey bi nu gariñ

²² Tub dzi Jesuuz gu'm nañ tub barc nu de yu nu rsysa' lom. Orze' nam rab mi dey:

—Yaa der chan gal naa tub la' ga' dzu ru' nisyu-doo —nam.

Orze' gu' dey nañ barc ze' za dey. ²³ Na lat nu za dey na, orze' Jesuuz gugyit mi nas mi. Orze' sij la bru'ña tub gyey bi ily. Orze' brugyi' nu rzu' nis nañ barc ze'. Orze' byarishdzidz nañ barc ze'. ²⁴ Gaze' nu gua cueñ dey mi. Orze' na dey rab yum:

—¡Masht, masht, bi rnit lo den lo nis! —na dey.

Gaze' nu weshtem. Gaze' nu bicy mi mandaar lo bi, nu lo de nguuly lo nis. Orze' guri bi. Nunu se ri

zu la byac. ²⁵ Gaze' nu nam rab mi de yu nu rsya' lom:

—¿La bzaac der? ¿Lagu wagyicy cup der consuel lo? —nam.

Orze' tona' la za nu ic dey nunu gudzib dey. Orze' na dey rab yu losa'y:

—¿Ze' cyu mbecy nac mi ii? Mi ii ricy mi man-daar mas gashtal lo bi nu lo nisyudoo, nunu rzuub gyidag ñi nim —na dey.

Jesuuz ricy yac mi tub mbecy nu bicy ni nuras

²⁶ Orze' bri dem tub la' ga' ru' nisyudoo, tub lugaar nu la Gerasa nu ri par lo Galilea. ²⁷ Na laab bruu la Jesuuz nañ barc na, orze' bruu za la tub mbecy yad yu. Bruuy par lat gyedz. Yu ze' tub mbecy nu bicy ni nuras. Orze' becha'y lo Jesuuz. Nunu dzi bi rac tiem nu wacsuy shab yu. Nunu walab nañ yu' rcyiiñ yu, sinu lat de blyuu nu rcach dey añ rcyiiñ yu. ²⁸ Na ornu bzaac yu Jesuuz, orze' gusu tib yu lom. Orze' dub ru' la nuras ze' rbish tiy. Gaze' nu nay rab yu Jesuuz:

—¿La ryub ru yad ru lo Jesuuz, i'ñ Ñgyoozh, biñ nu zily zir nac? ¡Yā rnishbaā lor nu cue' shet zir ya! —nay.

²⁹ Ni mniiy, gun Jesuuz mniim lo nuras ze' nu gruchuy lo mbecy ze'. Yad nu tona' la guzañ ña'n nu ni ricy nuy mbecy ze'. Nunu de mbecy rcyiig dey gyi'y nu yaay nu caden. Tees rshi'ñ rshi'ñ lay caden. Orze' nuras ze' ricy yu nu rza mbecy ze' lugaar ub zi. ³⁰ Orze' na Jesuuz rab mi nuras ze':

—¿La lar? —nam.

Gaze' nu nay rab yum:

—Yā lā bee miily —nay.

Ni mniyy gun dzi zigy yu bicy niy mbecy ze'.
³¹ Orze' de nuras ze' mnishbaa dey lom nu cue' zeed mi dey ze' nu cow. ³² Gun lugaar ze' rded row tub nac cuch zigy. Orze' nuras ze' mnishbaa dey lo Jesuuz nu cuic mi rishbeey nu chu' dey nañ de cuch ze'. Orze' gaze' nu briic mi rishbeey ni dey nu chu' dey nañ de cuch ze'. ³³ Gaze' nu bruu chu dey lo mbecy ze'. Orze' gu' dey nañ de cuch ze'. Orze' de cuch ze' rzab la de ma bzu tiily ma par gyoow. Orze' bet lag de ma lo nisyudoo. Orze' gut de ma lo nis.

³⁴ Orze' de yu nu rña de cuch ze' gush dey carer ya niyy de coz nu guc lo de mbecy nu yu' lat gyedz, gal nu lo de mbecy nu yu' ngush. ³⁵ Gaze' nu bruu dey yad güiyy de coz nu guc. Na ornu bru'ña dey ze' nu zub Jesuuz na, orze' bzaac dey mbecy nu bicy ni nuras ze' zub yu yeñ gyi'm. Zuy shab yu, nunu byanap la shcab niy. Orze' tona' la gudzib dey. ³⁶ Orze' dela de mbecy nu bzaac coz nu guc ze' mnii dey lo de mbecy zigy ze' lac mod byac mbecy nu bicy ni nuras ze'. ³⁷ Orze' dela de mbecy nu yu' lo yu ni Gerasa brugyi' rnishbaa dey lo Jesuuz nu ruum ledz dey, gun tona' la rdzib dey lom. Orze' Jesuuz gu'm nañ barc zam. ³⁸ Orze' yu nu bicy ni nuras ze' mnishbaay lom nu cha num yu. Orze' Jesuuz nam rab mi yu:

³⁹ —Yaa lo de famil nir. Orze' gyoor rishlo dey de coz nu bicy Ñgyoozh num ru —nam.

Orze' mbecy ze' gush nez yu yay. Byooy rishlo dela mbecy nu yu' gyedz ze' de coz nu bicy Ñgyoozh num yu.

I'ñ Jairo nu biñ mña nu gul shab Jesuuz

⁴⁰ Na ornu Jesuuz bru'ñam tub la' ga' ru' nisyu-doo na, orze' de mbecy zigy nu yu' ze' tona' la bet lagy dey ornu bru'ñam lo dey. Gun dela dey yu' dey rbez yum. ⁴¹ Orze' bru'ña tub mbecy nu la Jairo. Yu ze' riib ic yu nañ yu' nu rsysa' mbecy riidz ni Ñgyoozh. Orze' gugyit tiily yu yeñ gyi' Jesuuz. Gaze' nu mnishbaay lom nu cham yu'y. ⁴² Gun zu tub zi la i'ñ yu, tub fiñ mña ña'n trocyup. Orze' fiñ ze' rat ñi. Se nu gat zi'l lañ. Orze' rlagy yu nu gyicy yac mi ñii.

Orze' Jesuuz za num yu, nunu tona' la mbecy zigy za nu dey mi gal rcyi'ñ su la dey mi. ⁴³ Orze' lat de mbecy ze' ri tub biñ mña nu bi bza' trocyup ña'n nu rshu reñ mi. Nunu mniit mi dela tiñ nim lo doctoor, tees ni tub la dey wangac ñgyicy yac dey mi. ⁴⁴ Orze' biñ mña ze' becha'm par ich Jesuuz. Orze' gul yaam ru' shab mi. Orze' laab or la ze' guca reñ ze'. ⁴⁵ Orze' Jesuuz nam:

—¿Cyu gul yaa ya? —nam.

Orze' dela mbecy mnii dey nu walab dey gul yaay mi. Orze' na Bed rab yum:

—Masht, de mbecy dub yub la rcyi'ñ su dey ru —nay.

⁴⁶ Tees Jesuuz bzu fert mi. Orze' nam:

—Ca zi na mbecy gul yaa ya. Gun gud lagya, nu nac nu bruu fers ne —nam.

⁴⁷ Orze' ornu gud lagy biñ mña ze' nu waca' cach lom lo Jesuuz, orze' za laam gusu tib mi lom. Nunu rash la bis mi. Orze' mniim lo de mbecy zigy ze' la gyi' nu gul yaam shab Jesuuz. Nunu mnii ga'm nu byac mi laab or la ze'. ⁴⁸ Gaze' nu na Jesuuz rab mi biñ mña ze':

—Biñ mña, ru byac ru gun bicy cup ru consuel lo. Orze' dub gusht la yaa —nam.

⁴⁹ Lat nu gabee rnii ru' Jesuuz nu biñ mña ze', orze' bru'ña tub mbecy nu biid nu rasoo, yu nu bruu gashtal yu' Jairo, yu nu riib ic ze'. Orze' nay rab yu Jairo:

—I'ñ ru bi guut ñi. Orze' cue' ga' gyicy seed zir ru masht —nay.

⁵⁰ Tees Jesuuz güeñ mi nu ni mniy lo Jairo. Orze' nam rab mi Jairo:

—Cue' dzib ru. Bicy cup zi'l consuel lo. Orze' i'ñ ru gyac ñi —nam.

⁵¹ Na ornu bru'ñam yu' Jairo na, orze' wansaana'm nu chu' zir mbecy nañ yu' ze' nu mbish fiñ nguzh ze'. Nomaas gu' num Bed nu Santiag, nu Waa, gal nu uz fiñ nguzh ze' gal nu ñaañ. ⁵² Orze' dela mbecy nu nguaa ze' ricy shni dey, nunu ruun dey nu nac fiñ nguzh ze'. Orze' nam rab mi dey:

—Cue' gun der. Fiñ nguzh ii nu nas zi'l ñi. Walab nu guut ñi —nam.

⁵³ Orze' brugyi' nu rigy nu ñaañ dey mi, gun gud lagy dey nu gut fiñ nguzh ze'. ⁵⁴ Orze' bdu' yaam yaañ. Gaze' nu ye la mniim. Orze' nam rab mi ñi:

—¡Fiñ nguzh, weshte! —nam.

⁵⁵ Orze' byabañ fiñ nguzh ze'. Orze' lueg la weshteñ. Orze' Jesuuz bicy mi mandaar nu cuic dey coz nu goñ. ⁵⁶ Orze' de mbel ni fiñ nguzh ze' za nu la ic dey. Tees Jesuuz bdu'm riiñ yaa dey nu cue' la nii dey lo ni tub la mbecy de coz nu guc ze'.

9

Jesuuz bzuu nez mi de trocyup aposht nu cha shaal yu de riidz nu sac ni Ñgyoozh

¹ Orze' Jesuuz bredz mi trocyup de yu nu rsya' lom nu gyatublaazh dey lom. Orze' briic mi rish-beey nu co chu dey nuras, nunu gyicy yac dey mbecy rat. Nunu bicy mi nu cyiiñ dey nu gyicy dey ñi. ² Orze' bzuu nez mi dey nu cha dey cha shaal yu de riidz ni gyel gubier ni Ñgyoozh, nunu par nu gyicy yac dey de mbecy rat. ³ Orze' nam rab mi dey:

—Cue' cha nu der ni tub la coz nu cyiiñ ni der par nez. Cue' cha nu der yangar. Cue' cha nu der moraal. Ni cue' cha nu der gyit. Ni cue' cha nu der tiñ. Shab nu zu zi'l der cha nur. Cue' cha nu der reña' shab ru. ⁴ Ca zi'l ze' nu chu' der nañ yu', orze' ze' cyiiñ der gashtal gruu la der lugaar ze'. ⁵ Ca zi'l ze' nu washet ic dey nu chu' der nañ yu', orze' ornu gruu der lugaar ze', orze' cyib der yu gyedz nu ta' gyid lab ru par nu gabe nu a' nap bicy dey —nam.

⁶ Orze' gush nez dey zay de lugaar nu yu' gaab ga ze'. Pshaal dey riidz ni Ñgyoozh, nunu bicy yac dey de mbecy rat.

Gut Waa nu driib nis mbecy

⁷ Orze' rey Herodes güeñ yu coz nu guc nu nac Jesuuz. Orze' tona' la pcan shcab niy. Gun yu' mbecy nu rniiy nu Waa nu driib nis mbecy byabañ yu. ⁸ Ze' yu' ga'y rniiy nu yu ze' Elías, yu nu mnii por cuen ni Ñgyoozh. Ze' yu' ga' dey rniiy nu yu ze'

ca zi na de yu nu mnii por cuen ni Ñgyoozh nu gu' gulas. Na byabañ yu, rnii dey. ⁹ Tees Herodes nay:

—Gunca laab ya bicya mandaar nu pcyug dey too Waa. ¿Ze' cyu mbecy nac yu ze' beni? Ya reña nu rnii mbecy zañ coz nu ricy yu —nay.

Nde' nu Herodes byub yu zañ mod nu gac zac yu Jesuuz.

Jesuuz bgoow mi gaay miily mbecy

¹⁰ Na ornu bi bri de yu nu rsya' lom na, orze' mnii dey lom de coz nu bicy dey. Gaze' nu gua nu reñ mi dey tub gyedz nu la Betsaida. ¹¹ Na ornu gud lagy de mbecy zigy na, orze' za ca dey ich mi. Orze' Jesuuz pcueez mi dey. Orze' mniim riidz ni gyel gubier ni Ñgyoozh lo dey. Nunu bicy yac mi zañ mbecy rat.

¹² Na ornu bi rdze na, orze' de trocyup de yu nu rsya' lom becha' dey lom. Orze' na dey rab yum:

—Bzuu nez de mbecy ii nu cha yub dey posad niy, nunu cha yub dey coz nu goy. Cha dey de gyedz gal nu de ranch nu yu' gaab ga ii, gun ii tub lugaar ub zi —na dey.

¹³ Orze' na Jesuuz rab mi dey:

—Briic de ru coz nu gow dey —nam.

Orze' na dey rab yum:

—A' ricy cup de sheñ. Nomaas ricy cup de gaay zi gyishtily nu cyup bel. ¿A rlagy ru nu cha zi zir de de coz nu gow dey? —na dey.

¹⁴ Gun nac gaay miily de mbecy ze'. Orze' na ga' Jesuuz rab mi dey:

—Mnii der lo de mbecy nu gzub dey bee cyaal gaynal ga dey tub ga se' —nam.

¹⁵ Orze' ni bicy dey. Orze' de mbecy gucua dey.
¹⁶ Orze' bdu' yaam gaay gyishtily ze' nu cyup bel ze'. Orze' bgüim par baa nunu briic mi gras ni Ñgyoozh nu nac ñii. Gaze' nu blew mi ñii. Nunu briica'm ñii ni de yu nu rsya' lom nu cyez dey ni de mbecy zigy. ¹⁷ Orze' dela mbecy bdow gyel la dey. Nunu ii pte' dey trocyup ru' chicyiw de coz nguzh nu brusub ze'.

Bed mniiy nu Jesuuz nac mi Mesías

¹⁸ Tub dzi bzub Jesuuz ub zi lam mnii num Ñgyoozh. Nomaas de yu nu rsya' lom yu' nu dey mi. Orze' nam rab mi dey:

—¿Cyu rnii mbecy nu nac ya? —nam.

¹⁹ Orze' na dey:

—Yu' mbecy nu rniiy nu ru Waa nu driib nis mbecy. Ze' yu' ga' dey rniiy nu ru Elías. Ze' yu' ga' dey rniiy nu ru tub yu nu mnii por cuen ni Ñgyoozh gulas. Ze' na byabañ yu, rnii dey —nay.

²⁰ Orze' nam rab mi dey:

—Ze' de ru, ¿cyu rnii der nu naca? —nam.

Orze' na Bed rab yum:

—Ru nac ru Mesías, biñ nu bzuu nez Ñgyoozh nu cyid —nay.

Jesuuz mniim lo de yu nu rsya' lom nu gat mi

²¹ Tees Jesuuz tona' la nap bdu'm riiñ yaa dey nu cue' nii dey de riidz ze' lo ni tub la mbecy. ²² Gaze' nu nam rab mi dey:

—Ya, biñ nu byac mbecy, rlagy ñi nu zac zi zañ lo coz deet. Nunu de yu bel ni de mbecy Israeel, nu de uz zub lo, nu de yu nu rlyuu leey ni Ñgyoozh

gne' dey ya. Orze' cut mbecy ya. Orze' dzi chon, orze' gyabaña —nam rab mi de yu nu rsya' lom.

²³ Orze' na Jesuuz rab mi dela mbecy:

—Benu ca na mbecy rlagy yu nu gac yu mbecy nu rsya' lo, orze' rlagy ñi nu cue' gyicy cuen yu coz nu rlagy ub yu. Nunu rlagy ñi nu shet ic yu nu zac ziy de dzi la nu nac ya. Orze' rlagy ñi nu gyicy yu gal nu rlagya. ²⁴ Gun yu nu rlagy co nap ub, yu ze' gnit loy. Tees yu nu nit lo nu nac ya, yu ze' yu nu rishli gruu mbañ. ²⁵ ¿Gun la rusub ni mbecy, benu gyicy yu gan dela coz ni gyishlombecy, ze' ub yu gnit loy? ²⁶ Tees cyu zi'l mbecy nu gat lo nu nac ya, nunu gat loo ga'y nu nac de riidz nu rnee lo dey, orze' ni' ya, biñ nu byac mbecy, gat lo nu nac de yu ze', ornu shuub dzi nu yapa nu gyel lily ne, gal nu gyel lily ni Ñgyoozh uza, gal nu gyel lily ni de anc yon. ²⁷ Gun ya rishli rnee lo der nu la be de mbecy nu yu' lat der ii na wat dey gashtal zac la dey gyel lily ni Ñgyoozh —nam.

Bdza nu na Jesuuz

²⁸ Na ornu bded shuñ dzi na, orze' Jesuuz gua nu reñ mi Bed, nu Santiag, nu Waa. Orze' gup mi num dey too tub bicy nu nii num Ñgyoozh. ²⁹ Na lat nu rnii num Ñgyoozh na, orze' bdza nu na lom. Nunu shab mi byacaacy ñi. Ryal lañ tanta' nu caacy ñi. ³⁰ Orze' sij la bruu zac cyup mbecy bee nu dey mi riidz. De yu ze' Moisees gal nu Elías. ³¹ Nunu bzu yaa lo dela dey. Orze' bee nu dey Jesuuz riidz nu lac mod gat mi Jerusaleeng. ³² Orze' lat ze' Bed nu de' zir de losa'y gush pcaal dey. Tees orze' briish dey yaa. Nunu bzaac dey gyel lily ni Jesuuz gal nu

cyup de yu nu yu' num ze'. ³³ Ornu bruu chu cyup de yu ze' lo Jesuuz, orze' Bed nay rab yum:

—¡Masht, dzi ga nap nu yu' de ii! Na za̱a de chon ramad ni der: tub par ru, tuuba' par Moisees, nu tuuba' par Elías —nay.

Gun Bed wangad lagy yu la coz niy. ³⁴ Na lat nu rniiy na, orze' bruu zac tub za. Orze' psoow ñi dey. Orze' tona' la gudzip dey ornu psoow za ze' dey. ³⁵ Orze' lat za ze' zaab ti' mbecy nu rnii. Orze' nam:

—Mi ii i'ṉ̃a nu bzu chu. Bzuub gyidag der nim —nam.

³⁶ Na ornu bi bded nu güeñ dey nu mnii mbecy ze' na, orze' bzaac dey Jesuuz ub zi lam zum. Orze' guchu' ri la dey. Orze' wanii la dey lo ni tub la mbecy de coz nu bzaac dey.

Jesuuz bicy yac mi tub yu nguzh nu bicy ni nuras

³⁷ Na or bza' yu tuuba' dzi na, orze' bruum par too bicy, bet mi par gyi'. Orze' bruu zac zigymbecy nu gua cheel dey mi. ³⁸ Orze' lat de mbecy zigy ze' ri tub mbecy. Orze' ye la rbish tiy. Orze' nay:

—Masht, gyicy ru tub faboor nur ya nu güiir i'ṉ̃a, gun tub zi yu ii ne zuy. ³⁹ Gun nuras rgu' yaay yu, nunu ricy yu nu rbish tiy. Nunu ii ricy yu nu ricy ñi bi niy. Nunu driib bdziñ ru'y. Tona' la shiñ ricy nuy yu, nunu walagy yu nu ruu chuy loy ne. ⁴⁰ Ya mnishba̱a lo de yu nu rsya' lor nu co chu dey yu, tees wangac ni dey —nay.

⁴¹ Orze' na Jesuuz rab mi dey:

—¡A der mbecy nu yu' na! ¡Dzi ga wagyicy cup der consuel lo! ¡Dzi ga mnu shcab ni der! ¿La' zir be tiem rlagy ñi nu chesa̱ du der? ¿La' zir be tiem rlagy ñi nu gagyē lo der? —nam.

Gaze' nu nam rab mi uz yu nguzh ze':

—Da nu yu nguzh nir lo —nam.

⁴² Na ornu yu nguzh ze' zay lo Jesuuz na, orze' nuras ze' mne'y yu nguzh ze' lo yu. Orze' bicy yu nu ricya'ñ bi niy. Tees Jesuuz bdza'm ni nuras ze'. Orze' bicy yac mi yu nguzh ze'. Orze' byabic mi yu ni uz yu. ⁴³ Orze' dela mbecy tona' la za nu ic dey nu nac de coz ily nu ricy Ñgyoozh.

Jesuuz rnii ga'm tuuba' tir nu cut mbecy mi

Lat nu yu' dey za nu ic yu nu nac de coz nu bicy mi, orze' nam rab mi de yu nu rsya' lom:

⁴⁴ —Bzuub gyidag der coz nu nee lo der, nunu cue' nit lagy der ñii. Ya, biñ nu byac mbecy, gu' dey ya yaa de mbecy —nam.

⁴⁵ Tees de yu ze' wangyet lag dey cuen de coz nu mniim. Gun Ñgyoozh wansaan mi nu ñgyet lag dey cuen. Nunu gudzib dey nu ñgugyi'y lom lac yaruu de riidz ze'.

Cyu gac mbecy nu gya zir zu

⁴⁶ Na de yu nu rsya' lom brugyi' nu ro zi dey riidz ben ca na dey gyac yu yu nu gya zir zu. ⁴⁷ Na ornu gud lagy Jesuuz nu ni mnii dey na, orze' bdu' yaam tub yu nguzh bzum yu lat dey. ⁴⁸ Orze' nam rab mi dey:

—Cyu zi'l yu nu shet ic nu gac tub mbecy nu na gal nu na yu nguzh ii nu nac ya, orze' ni' zi'l shet ic yu nu gac nuy ya. Nunu yu nu shet ic nu gac nu ya, walab ne ya zi'l shet ic yu nu gac nuy, sinu ni' zi'l shet ic yu nu gac nuy Ñgyoozh, biñ nu bzuu nez ya. Gun mbecy nu gash zir zu lat de ru, yu ze' yu nu ricy zir ñi presis —nam.

Yu nu wacha contr ni Jesuuz, yu ze' yu nu rza faboor nim

⁴⁹ Orze' na Waa rab yum:

—Masht, de ya bzaac de tub mbecy nu bloo chuy nuras nu nac rishbeey nu bruu lor, tees mnee de nu cue' nu ni gyicy yu, gun wachesa nuy de ub na —nay.

⁵⁰ Orze' na Jesuuz rab mi yu:

—Cue' ca der niy, gun yu nu wacha contr nin, yu ze' yu nu rza faboor nin —nam.

Jesuuz bdza'm ni Santiag nu Waa

⁵¹ Na ornu bi rgaab nu shuub dzi nu chup Jesuuz gyibaa, orze' Jesuuz bi zuu lam ca na nu zum. Orze' gush nez mi zam par Jerusaleeng. ⁵² Orze' bzuu nez mi mbecy nu cha ga dey lom nu cha nu dey rasoo tub lugaar ni Samaria. Gun orze' gzu lily dey ornu grim. ⁵³ Tees de mbecy Samaria wangalagy dey nu cuez mi lat dey, gun gud lagy dey nu par Jerusaleeng rsaap mi nu zam. ⁵⁴ Na ornu bzaac Santiag nu Waa nu ni ricy dey na, orze' na dey:

—Shuaana, ɬa walagy ru gyicy na mandaar nu gyet gyi nu gruuñ baa, gun orze' gnit loñ de yu ze'? —na dey.

⁵⁵ Orze' bish cya Jesuuz bdza'm ni dey. ⁵⁶ Orze' lueg la za dey tuuba' gyedz.

De mbecy nu ngulagy cha ca ich Jesuuz

⁵⁷ Na lat nu zaab za dem nez na, orze' na tub mbecy rab yum:

—Shuaana, ya rlagya cha du ru ca zi'l ze' nu char —nay.

⁵⁸ Orze' na ga' Jesuuz rab mi yu:

—De bez ricy cup ma blyuu ni ma. Ze' de chigyiñ ricy cup ma teez ma. Tees ya, biñ nu byac mbecy, a' ricy cupa ni tub lugaar mi' par nu gabisha zu lagya —nam.

⁵⁹ Orze' Jesuuz nam rab mi tuuba'y:

—Da ca icha —nam.

Orze' yu ze' nay rab yum:

—Shuaana, ¿a wazaan ru leza gashtal gat uza? Orze' gaze' nu cha ca ich ru —nay.

⁶⁰ Orze' na Jesuuz rab mi yu:

—Bzaan nde' par de mbecy nu na gal nu na mbecy gut nu cach dey losa' gut yu. Ze' ru char cha shaal ru riidz ni gyel gubier ni Ñgyoozh —nam.

⁶¹ Orze' tuuba'y nay rab yum:

—Shuaana, ya rlagya cha ca ich ru. Nomaas ¿a wazaan ru nu gya yu' gya nee du de famil ne ñgyoozh? —nay.

⁶² Orze' na Jesuuz rab mi yu:

—Yu nu bi driib yaa ich yaa arad, ze' despuees cush cyay güiyy par ich yu, orze' yu ze' wac chu'y ze' nu riib ic Ñgyoozh —nam.

10

Jesuuz bzuu nez mi setent zub cyup mbecy

¹ Na despuees ni de nu nde' na, orze' Shuaan na Jesuuz pcuim setent zub cyup mbecy. Orze' bzuu nez mi dey nu cha ga dey lom cyup ga dey tub ga gyedz o tub ga lugaar, ze' nu rlagy ñi nu cham.

² Orze' nam rab mi dey:

—De mbecy nu yu' ii na na dey gal na tub cosech. Rishli cosech tona' la sheñ ñi. Tees de mbecy nu gyicy riiñ loñ ñuu zi dey. Nde' nu bdiñ der

lo Ñgyoozh Shuaan cosech ze' nu gzeed zir mi de mbecy nu te' cosech ze'. ³ Orze' gua der. Na der gal nu na shily nu zuu neza nu cha lat lob. ⁴ Cue' cha nu der gyish gyit nir, nunu cue' cha nu der bay tiñ nir. Ni cue' cha nu reñ der gyid lab ru. Nu ca gyi' zi'l der cha nur. Nunu cue' chi glaa der nez nu nii nur losa'r ñgyoozh. ⁵ Na ornu chu' der nañ tub yu', orze' nii nur de mbecy ze' ñgyoozh. Orze' nii der: “Ñgyoozh zeed mi gyel ri zu lat der”, niir. ⁶ Benu nañ yu' ze' rcyiiñ mbecy nu wagyet lagy gyel yuu, orze' gyu' niñ gal nu mnii der. Tees benu walab ni, orze' wayu' niñ gal nu mnii der. ⁷ Orze' laab yu' la ze' gri der. Orze' la zi'l coz nu yu' ni de mbecy nu yu' ze' gow der nunu go' der. Gun yu nu ricy riiñ yad ñi niy nu gyad iy. Nunu cue' gri der reñ reñ la yu'. ⁸ Na ornu gru'ña der tub gyedz ze' nu shet ic dey nu cyiiñ der na, orze' gow der la zi'l coz nu cuic dey. ⁹ Orze' gyicy yac der de mbecy rat nu yu' ze'. Orze' nii der lo dey: “Sñuu ga cyid gyel gubier ni Ñgyoozh lat der”, nii der. ¹⁰ Ze' benu gru'ña der tub gyedz ze' nu washet ic dey nu cyiiñ ru, orze' cha der lat cay. Orze' nii der: ¹¹ “¡Mas gashtal de yu gyedz nu yu' gyedz ni der nu ta' gyid lab de dib de ñii par nu gabe nu a' nap bicy der! Tees nap gad lagy der nu sñuu ga cyid gyel gubier ni Ñgyoozh lat der”, niir. ¹² Ya nee lo der nu ornu shuub dzi nu gri bee Ñgyoozh ni dela mbecy, dzi zir cashtig ily cuic mi ni de mbecy gyedz ze' gaze' ni de mbecy Sodoma.

De gyedz nu wansuub gyidag ni Jesuuz

¹³ ¡Cuaa de ru mbecy gyedz Corazín! ¡Nunu cuaa ga' de ru mbecy Betsaida! Gun benu ñgyicy ya

nusuriidz lat de mbecy nu yu' gyedz Tiro nu lat de mbecy nu yu' gyedz Sidón gal nu bicia lat de ru, orze' bi gulas mne' dey de cyi nu ricy yu. Orze' nzu dey shab cuiñ yu, nunu ncoo dey di'ñ tooy par nu gabe nu ñgyac dey mbecy shni. ¹⁴ Tees ya rnee lo der ornu shuub dzi nu gri bee Ñgyoozh ni de mbecy, cashtig ily zir cuic mi ni de ru gaze' ni de mbecy nu yu' gyedz Tiro nu Sidón. ¹⁵ Ze' de ru mbecy gyedz Capernaum, ¿a rlagy der chup der gal gyibaa? Tees gyet lag der gal ze' nu blaazha' zir gyi ni gabily.

¹⁶ 'Yu nu rzuub gyidag ni de ru ni' zi'l rzuub gyidag yu ne ya. Nunu yu nu rzu chu de ru ni' zi'l rzu chuy ya. Nunu yu nu rzu chu ya, ni' zi'l rzu chuy Ñgyoozh, biñ nu bzuu nez ya —nam.

Orze' bish cya de setent zub cyup mbecy ze'

¹⁷ Orze' setent zub cyup mbecy ze' gua dey riiñ. Na ornu bish cya dey na, orze' tona' la bet lagy dey. Orze' na dey:

—¡Shuaan de, gashtal de nuras rzuub gyidag yu ni de ornu rnee du de yu nu nac ru! —na dey.

¹⁸ Orze' na Jesuuz:

—Tees ya bzaaca nuras nu nay gal nu na tub gyi ni guzii nu bruuy gyibaa bet lag yu. ¹⁹ Ya bicia nu de ru cyiiñ der nu zar too bily nu too gune, nunu se la la zac der. Nunu bicia nu gyicy der gan dela losa' yuur mas tona' la fert yu. Nunu se la la coz zac der. ²⁰ Orze' cue' gyet lagy der nu nac nu rzuub gyidag de nuras ni der, sinu bet zir lagy der gun bi ca nu la der lat de mbecy nu bi ya gyibaa —nam.

Jesuuz yet lagy mi

²¹ Laab or la ze' Jesuuz tona' la yet lagy mi nu nac Espiriit Yon ni Ñgyoozh. Orze' nam:

—Ñgyoozh uza, biñ nu nac Shuaan gyibaa gal nu gyishlombecy, ya drica gras nir gun ru bicy ru nu gad lagy de yu nu na gal nu na mdoo de coz nu pcach ru lo de yu nu yu' shcab ni, nu lo de yu nu yet lag cuen. Ni bicy ru gun nde' coz nu rlagy ru —nam rab mi Ñgyoozh.

²² Orze' nam:

—Ñgyoozh uza bdu'm riiñ yaa nu gyub ica dela coz. Nunu ni tub la mbecy wad lagy yu cyu ya, i'ñ Ñgyoozh. Nomaas Ñgyoozh uza, mi ze' rad lagy mi. Nunu ni' zi'l wad lagy dey cyu nac Ñgyoozh, uza. Nomaas ya i'ñ mi rad lagya. Nunu ni' zi'l de mbecy nu rica nu gad lagy cyu nac mi, de yu ze' gad lagy dey cyu nac mi —nam.

²³ Orze' gaze' nu bish cyam lo de yu nu rsysa' lom. Orze' mnii gareñ lam lo dey. Orze' nam:

—Dzi ni de mbecy nu zac dela coz nu de ru rzac ru. ²⁴ Gun zigy de mbecy nu mnii por cuen ni Ñgyoozh, gal nu zigy de rey ngulagy dey nzac yu de coz nu de ru rzac ru, tees wansac dey. Nunu ngulagy dey ñgyeñ yu de coz nu reñ de ru, tees wangyeñ dey —nam.

Riidz tiily ni mbecy nap nu guledz Samaria

²⁵ Orze' tub mbecy nu rlyuu leey ni Ñgyoozh gua niy lo Jesuuz ben a wad tub mod nu riib yu cyi ic mi. Orze' nay rab yum:

—Masht, ¿lac mod rlagy ñi gyicya par nu gad nu cui mbaña tub la? —nay.

²⁶ Orze' Jesuuz nam rab mi yu:

—¿La coꝝ ca lo leey ni Moisees? ¿Lac mod yaruu leey ze' rziir? —nam.

²⁷ Orze' na mbecy ze' rab yum:

—Pca Shuaan ru, biñ nu nac Ñgyoozh nir, nu dutuub la lardoor nu dela gyel mbañ nir, nu dela fers nir, gal nu dela shcab nir. Nunu pca losa'r gal nu rcar ub ru —nay.

²⁸ Orze' na Jesuuz rab mi yu:

—Nap rnii ru. Benu ni gyicy ru, orze' gad nu cui mbañ ru —nam.

²⁹ Orze' mbecy ze', como rlagy yu gyicy yu nu gabe nu nap yu par lo Ñgyoozh, orze' nay rab yu Jesuuz:

—¿Cyu nac losa'? —nay.

³⁰ Orze' na Jesuuz rab mi yu:

—Bzu tub mbecy. Orze' bruuy gyedz Jericó yay par Jerusaleeng. Orze' nez nu yay bdzeel yu gubaan. Orze' de gubaan ze' bgo la dey tooy. Orze' bloo dey dela suuy. Dela shab yu, dela bloo dey. Gaze' nu bdi su dey yu. Orze' gaze' nu ya dey. Se nu gat zi'l yu bzeen de gubaan ze' ya dey. ³¹ Ze' yad nu laab zi'l nez ze' bded tub uz. Tees ornu bzaac yu mbecy nu mbish ze', orze' zet byach yu ze' nu mbish mbecy nu guud güii ze'. Orze' yaa lay.

³² Orze' ni' zi'l bru'ña tub mbecy nez Leví lugaar ze'. Ni' yu ze' nac yu tub yu nu ricy riiñ nañ yu' nu driib zily mbecy Ñgyoozh. Na ornu bzaac yu mbecy nu mbish ze', orze' zeta' byach yu ze' nu mbish yu ze'. Orze' yaa ga' lay. ³³ Tees ornu bded tub mbecy Samaria nez ze', orze' bzaac yu nu mbish mbecy ze'. Orze' gushni lagy yuy. ³⁴ Orze' becha'y lo mbecy ze'. Gaze' nu bicy nuy mbecy ze' guña.

Orze' briily yu asecy nu ñup ni urbyay ze' nu guud güii ni mbecy ze'. Gaze' nu ptiish yu negy ze' nu guud güii ni mbecy ze'. Orze' briib yu mbecy ze' ich bañcyug niy. Orze' ya nuy yu nañ tub yu', ze' nu rgyiiñ mbecy posad. Orze' laab yu bgüiiy yu. ³⁵ Na tuuba' dzi na, orze' mbecy Samaria ze' blooy cyup tiñ briic yu ni shuaan yu' ze'. Orze' nay rab yuy: “Nap zi'l güiir mbecy ii. Nunu benu gyicy zir yu gasht, orze' ya rishā ornu cush cya”, nay. ³⁶ Ze' orze' na, ¿ca na lo chon de mbecy ze' bicy nuy yu nu guud güii ze' gal mod nu rlagy ñi nu gyicy mbecy nu losa'y? —nam.

³⁷ Orze' na yu nu rlyuu leey ze' rab yu Jesuuz:
—Yu nu gushni lagy mbecy nu guud güii ze' —nay.

Orze' na Jesuuz rab mi yu:

—Orze' gua nunu ni' zi'l gyicy ru —nam.

Jesuuz guam yu' Mart nu Li

³⁸ Orze' ya Jesuuz. Gaze' nu bru'ñam tub gyedz. Gyedz ze' rcyiiñ tub fiñ mñaan nu la Mart. Orze' mniiñ lo Jesuuz nu chu'm nañ yu' niñ. ³⁹ Ze' bily ñii lañ Li. Orze' gusub ñi yeñ gyi' Jesuuz par nu zuub gyidag ñi de riidz nu rlyuum. ⁴⁰ Orze' Mart rcha' ic ñi nu nac nu dzi yu' riiñ ricy ñi. Orze' becha'ñ lo Jesuuz. Orze' nañ:

—Shuaana, ¿a wagyicy cuen ru nu bilya dela riiñ bzeen ñi nu gyicya ub zi? Mnii loñ nu locyuub ñi ya —naañ.

⁴¹ Orze' na Jesuuz rab mi Mart:

—Mart, Mart tona' la rsug ic ru nunu deet rac nañ lardoor nu nac zañ coz. ⁴² Tees tub zi coz nu

ricy ñi presis. Ze' Li pcuiñ tub coz nu nap zir par nu gyicy ñi. Nunu se cyu la gac co ñiñ —nam.

11

Jesuuz rlyuum ni de mbecy lac mod nii nu dey
Ñgyoozh

¹ Tub tir Jesuuz zub mi rnii num Ñgyoozh tub lugaar. Na ornu blazh mnii num Ñgyoozh na, orze' na tub yu nu rsya' lom:

—Shuaan de, blyuu ne de lac mod nee du de Ñgyoozh gal nu Waa blyuuy ni de yu nu rsya' loy —nay rab yum.

² Orze' Jesuuz nam rab mi yu:

—Ornu nii nu der Ñgyoozh, orze' i mod nii der: Ñgyoozh, uz de, rlagy ñi ca lagy de lor.

De ya rdiñ de nu cyid gyel gubier nir lat de.

³ Tub dzi ga cuic ru de coz nu rlagy ñi nu daw de.

⁴ Bicy sulagy ne de ni de coz cyi nu ricy de, gal nu de ya ricy sulagya' de ni de yu nu shiñ ricy nu de ya.

Nunu cue' zaan ru nu gyet lag de lo preb —nam.

⁵ Orze' na ga' Jesuuz rab mi dey:

—Gyicy peen zu tub amig ni ca na de ru. Orze' char loy tub guzeel rel. Orze' niir loy: “¿A zu ru? Ya yapa lor ben a sac chon gyishtily nir cuic ru lo.

⁶ Gun saa la bri tub amig ne nu guay byaj. Ze' ya rila sac coz ne nu rica gow yu”, niir. ⁷ Orze' amig ze' nir nii ga'y gab yu ru gal ri zi'l yu nañ yu!. Orze' niy: “Cue' gyicy seed ru ya, gun ro' ne noow ñi, nunu ya nu de yu nguzh ne bi rib das de lo nuun. Nde' nu wayeshte nu rica la coz nir”, niy. ⁸ Orze'

ya nee lor nu mas wayeshtey nu cuic yu coz nu rlagy ru par nu nac yu amig nir, tees ca ni gaal cuic yu dela coz nu cyiñ nir nu nac nu zaab rgyiñ lar loy. ⁹ Nde' nu ya rnee lo der: Bdiiñ der lo Ñgyoozh, gun Ñgyoozh cuic mi de coz nu cyiñ ni der. Byub der ñii, gun orze' gyad ñi ni der. Mnii nu der mi, gun orze' shaal mi ro' ni der. ¹⁰ Gun cyu zi'l mbecy nu rgyiñ gad ñi niy. Nunu cyu zi'l mbecy nu ryub gyad yuñ. Nunu cyu zi'l mbecy nu rnii num shaal mi ro' niy.

¹¹ '¿Walab gaal grusu tub mbecy lat der nu cuic yu tub bily ni i'ñ yu ornu rgyiñ yu tub bel loy? ¹² O ¿walab gaal grusu tub mbecy nu cuic yu tub gune ni i'ñ yu ornu rgyiñ yu nguu gyid loy? ¹³ Gunca de ru nac der mbecy a' nap rad lagy der lac mod rbic ru coz nap ni i'ñ ru, ze' yegar Ñgyoozh, uz den, biñ nu zub gyibaa, wabic mi Espirit Yon ni de yu rgyiñ lom —na Jesuuz rab mi de yu nu rsya' lom.

Mbecy rnii dey nu Jesuuz ricy mi coz ily nu nac nuras

¹⁴ Tub tiem Jesuuz bloo chum nuras, gun nuras ze' bicy yu nu byagop tub mbecy. Na ornu nuras bruu chuy lo yu nu byagop ze', orze' yu ze' brugyi' rniyy. Orze' de mbecy nu yu' ze' za nu la ic dey nu nac nde'. ¹⁵ Ze' yu' ga' mbecy nu rniyy:

—Beelzebé, yu nu riib ic de nuras, yu ze' bicy yu nu cyiñ yu ii nu co chuy de' zir de nuras —na dey.

¹⁶ Ze' yu' ga' mbecy nu byub yu tub mod par nu gyicy yu nu gadzam. Mniyy lom nu cuic mi tub miesht baa. ¹⁷ Tees gud lagy mi de coz nu rnii too dey. Orze' nam rab mi dey:

—Benu tub nac mbecy dulew dey nu chucooy laab nu losa' zi'l yu, orze' rila wazu dey. Nunu benu tub famil chucooy laab nu losa' zi'l yu, orze' ni' zi'l wazu dey. ¹⁸ Nunu benu de nuras dulew yu nunu chucoo dey laab nu losa' zi'l yu, orze' ni' zi'l wazu dey, sinu nit lo dey. Ni rnee gun de ru rnii der nu ya rloḡ chu nuras nu nac rishbeey ni Beelzebé, yu nu riib ic de nuras. ¹⁹ Tees benu ni, orze' cyu briic rishbeey ni de losa'r nu ni ricy yu. Nde' nu de losa'r ricy dey nu rabee nu radza der. ²⁰ Gun benu ya gac loo chu nuras nu nac coz ily nu ricy Ñgyoozh nu nac ya, orze' nde' yaruun nu bi bri gyel gubier ni Ñgyoozh lat der.

²¹ 'Gun benu tub mbecy fert zu tañ yu nu rñay yu'y, orze' de coz nu yu' choow nañ yu'y nguaa segur ñi. ²² Tees benu ru'ña tuuba' mbecy nu fert zir, orze' yu ze' gyicy yu gan yu. Orze' coy dela gyiib dañ nu rgyish loy lo ze'. Nunu gyash yu dela coz nu ricy cup yu.

²³ 'Gun yu nu waya faboor ne, yu ze' zay contr ne. Nunu yu nu walocyuub ya nu te' de mbecy, yu ze' tush las yu dey —nam—.

Nuras nu bish cya lugaar ni tuuba' tir

²⁴ 'De ru na der gal na tub mbecy ornu druu chu nuras loy. Orze' nuras ze' rzay tub lugaar wach. Rded yu ryub yu tub lugaar ze' nu zu lagy yu. Na ornu wagad lugaar ze', orze' rnii tooy: “Nap zir cush cyan laaba' ze' nu bruun”, rnii tooy. ²⁵ Na ornu griyna, orze' gyap yu mbecy ze' nay gal nu na tub yu' nu nat laa nañ. Nunu se cyudz la zu nañ ñi nu bdulyuub. ²⁶ Orze' chay nu cha te'y tub ganya' nuras nu shiñ zir ricy gaze' ub yu. Orze' chu' dey

nañ mbecy ze' cyiiñ yu. Orze' mbecy ze' yashiñ zir na mod nu nay gaze' nu loga —nam.

Chesu cyit lagy na nu rishli

²⁷ Lat nu mnii Jesuuz de riidz ze', orze' bruu zac tub biñ mña'a lat de mbecy zigy ze'. Orze' nam rab mi Jesuuz:

—¡Dzi ni biñ mña'a, biñ nu bgaal ru, nunu briic mi nu guby ru! —nam.

²⁸ Orze' na Jesuuz:

—¡Dzi zir dzi ni mbecy benu zuub gyidag yu de coz nu rnii Ñgyoozh nunu gyicy yac yu niñ! —nam.

De mbecy fariseo rgyiiñ dey tub nusuriidz

²⁹ Na lat nu rde' de mbecy zigy lo Jesuuz na, orze' brugyi' rniim lo dey. Orze' nam:

—Dzi ga a' nap de mbecy nu yu' na. Rgyiiña' dey tub muesht ni nusuriidz lo, tees ya warica ñii ni dey. Nomaas muesht ni Jonás, yu nu mnii por cuen ni Ñgyoozh, nde' zi'l muesht nu gad ni de yu ze'. ³⁰ Tees gal nu Jonás guc yu tub muesht ni de mbecy gyedz Nínive, nde' nu ni' zi'l ya, biñ nu byac mbecy, gaca tub muesht ni de mbecy nu yu' tiem na. ³¹ Ornu shuub dzi nu ri bee Ñgyoozh ni dela mbecy nu yu' tiem na, orze' biñ mña'a nu riib ic tub nasyoong nu ri par yaa been, ornu güiin par ze' nu driib doo, gaza'm gyes sum niim nu yu' cyi der, mbecy nu yu' na. Gun mi ze' zet zir bruum biid mi nu bzuub gyidag mi de coz nu mnii Salomoong. Nunu ya, biñ nu zu ii na, gya zir zu gaze' Salomoong. ³² Nunu ornu shuub dzi nu ri bee Ñgyoozh ni dela mbecy, orze' dela mbecy nu yu' gyedz Nínive gyes su ga' dey nu nii dey nu yu'

cyi der mbecy nu yu' tiem na. Gun de mbecy Nínive mne' dey cyiy ornu güeñ dey de riidz ni Ñgyoozh nu pshaal Jonás lo dey. Nunu ya biñ nu zu ii na, gya zir zu gaze' Jonás —nam—.

Jesuuz rlyuum ni de mbecy nu urlor mbecy, nde' nañ gal nu na tub candiil

³³ Ni tub la mbecy wacaay gyi tub candiil nu riyy ñi tub lugaar ngach. Ni wariiy ñi nañ tub cajoo, sinu zuub yuñ se'ñ, gun orze' cuic ñi yaa lo de mbecy nu rzu' nañ yu'. ³⁴ Urlor, nde' nañ gal na tub candiil nu rbic yaa nañ shcab nir. Orze' benu gyicy ru coz nap nu urlor, orze' gzu yaa nañ dutuub la shcab nir. Tees benu gyicy ru coz cyi nu urlor, orze' cow la zu nañ shcab nir. ³⁵ Orze' bicy cuidad, gun dzi ga walab yaa yu' nañ shcab nir, sinu zu cow la nañ shcab nir. ³⁶ Tees benu dutuub la nañ shcab nir yu' yaa nunu benu sac ni ñumiñ ze' nu cow, orze' naal la zac ru dela coz, gal nu rzac ru ornu tub candiil rbic ñi yaa —nam.

Jesuuz rniim nu gyicy cuidad dey nu de mbecy fariseo gal nu de mbecy nu rlyuu leey ni Ñgyoozh

³⁷ Na ornu blazh mnii Jesuuz de nu nde' na, orze' tub mbecy fariseo bredz yu Jesuuz nu cham yu'y nu gow mi gyit. Orze' gu'm nañ yu' gusub mi lo mez. ³⁸ Na ornu bzaac yu nu wanaam gal mod nu rnii leey ni dey anzir nu gom gyit, orze' za nu la ic yu. ³⁹ Orze' nam rab mi yu:

—De ru mbecy fariseo ich zi'l taz rgyiib der, nunu ni' zi'l ricy der nu gya'n. Ze' par nañ lardoo der dza laa yu' coz a' nap nu ricy der. Yu' ga' gyel gubaan nu ricy der. ⁴⁰ ¡Mbecy ton! ¿A wagad lagy der laab biñ nu bzaa nañ ñi, laab mi bzaam par ich

ñi? ⁴¹ Benu cuic der coz nu yu' nir ni de mbecy zi, orze' caacy nañ lardoor.

⁴² 'iCuaa de ru mbecy fariseo! Gun mas lo tii nac loow comid, rboo reñ der tub nac ñii nu rbic der ni Ñgyoozh. Ni ricy der nu menta, nu rud, nunu nu de' zir gyish loow comid. Tees wagyicy cuen der mod nu rlagy ñi par nu chu' den par lo Ñgyoozh, nunu ni waca der mi. De nde' rlagy ñi gyicy der, nunu walagy ñi laa yaa der de' zir coz nap nu bi ricy der.

⁴³ 'iCuaa de ru mbecy fariseo! Gun yet lagy der gzub der lo yashily ni mbecy zub lo nañ yu' nu rsya' mbecy riidz ni Ñgyoozh. Nunu yet lagy der ornu mbecy ca lagy dey lo der ornu nii nu dey der lat yagyi'.

⁴⁴ 'iCuaa de ru! Na der gal nu na baa ni añ nu wacabee ca ri. Orze' de mbecy rded dey par ich ñi, tees wagad lagy dey ti rded dey tooñ —nam.

⁴⁵ Orze' na tub yu nu rlyuu leey ni Ñgyoozh rab yum:

—Masht, ornu ni rniir, orze' ni' zi'l rnii zi ga'r ni de ya —nay.

⁴⁶ Orze' nam rab mi yu:

—iNi' zi'l cuaa de ru mbecy nu rlyuu leey ni Ñgyoozh! Gun rzuub der yuu ich mbecy. Ni wagyee ni tub la mbecy nu guy yuu ze'. Ze' de ru walagy der locyuub der losa'r nu guy yuu ze' ni nu tub mbiz ru.

⁴⁷ 'iCuaa de ru! Ricy zig der ru' baa ni de yu nu mnii por cuen ni Ñgyoozh, de yu nu gu' gulas. Tees na der gal nu na de gyitoo bel ni der, gun de yu ze' biit dey de yu nu mnii por cuen ni Ñgyoozh. ⁴⁸ Orze' rabee nu gal gaa la na der gal nu na gyitoo bel ni

der. Gun de yu ze' biit yu de yu nu mnii por cuen ni Ñgyoozh. Ze' de ru ricy zig der ru' baa ni dey.

⁴⁹ 'Nde' nu como Ñgyoozh rad lagy mi dela coz, orze' mniim: “Ya gzuu neza yu nu gnii por cuen ne, nunu gzuu neza de aposht. Tees yu' nu cut dey yu. Nunu yu' ga' nu shet zi dey yu”, nam. ⁵⁰ Nde' nu Ñgyoozh zeed mi cashtig too de mbecy nu yu' na nu nac dela yu nu mnii por cuen nim nu biit mbecy nese nu bzub gyi' gyishlombecy. ⁵¹ Nese nu biit dey Abeel, gashtal nu biit dey Zacarí, yu nu biit dey loli' ni yu' ni Ñgyoozh par gazel ni mez nu rcuaa der gun lom nu yu' yon nim. Orze' Ñgyoozh zeed mi cashtig ni de mbecy nu yu' tiem na nu nac nu gut dela de yu ze'.

⁵² 'iCuaa de ru, mbecy nu rlyuu leey ni Ñgyoozh! De ru ricy cup der mod nu cuic der nu gad lagy de mbecy de coz nu rishli. Per walab tub lo zi'l nu walagy der gad lagy ru de coz nu rishli, sinu ni' zi'l wazaan der nu gad lagy de' zir mbecy —nam.

⁵³ Na ornu mniim de nu nde', orze' de yu nu rlyuu leey, nu de mbecy fariseo tona' la bdza' dey. Orze' brugyi' nu ricy seed dey mi nu rgugyi' dey zañ lo coz lom. ⁵⁴ Bicy dey preb mi ben a wad mod nu riib dey cyi toom.

12

Jesuuz rlyuum ni de mbecy nu gyicy cuidad dey nu de mbecy rzuu lo

¹ Orze' tona' la mbecy zigy bde' dey lo Jesuuz. Bee miily la dey bde' dey lom gashtal rzuub la gyi' dey losa'y. Orze' Jesuuz nu loga la brugyi' rniim lo de yu nu rsya' lom. Orze' nam rab mi dey:

—Cuidad der nu lebadur ni de mbecy fariseo. Lebadur ze', nde' gyel rzuu lo ni dey. ² Gun dela coz nu walagy dey nu gad lagy mbecy, ca ni gaal gad lagy mbecy par lo. Nunu sac ni tub coz nu cach dey nu wad lagy mbecy par lo. ³ Gun la zi'l riidz nu ro der rel gyeñ mbecy ñi or widoo. Nunu la zi'l riidz dze ga nu ro der nañ yu' nir, gyeñ de mbecy nu zaab ti' riidz ze' gal too yu' —nam—.

Cyu lo rlagy ñi nu dzib na

⁴ De ru mbecy, ya rneë lo der nu cue' dzib der lo de mbecy nu rut cuerp ni losa', tees wac nu la' zir gyicy yu. ⁵ Tees ya rneë lo der nu cyu lo rlagy ñi nu dzib der. Rlagy ñi nu dzib der lo biñ nu gac cut cuerp ni der, nunu despuees orze' ne'm ñii gabily. Orze' gudzib zir der lo mi ze'.

⁶ ¿A walab nu rut dey gaay chigyiñ mi' par cyup sentab mi'? Nunu Ñgyoozh ni wagnit lagy mi ni tub ma. ⁷ Ze' yegar de ru. Ñgyoozh rad lagy mi la be gyich too der. Delañ ngab ñi nim. Nde' nu cue' dzib der, gun de ru sac zir der gaze' de chigyiñ zigy ze'.

Benu mbecy cach ru'y Jesuuz lo losa'y, orze' ni' zi'l mi ze' cach ru'm yu lo Ñgyoozh

⁸ Ya neë lo der nu benu tub mbecy niy nu naca Shuaan yu lo losa'y, orze' ni' zi'l ya, biñ nu byac mbecy, neë lo de anc zigy ni Ñgyoozh nu yu' gyibaa nu nac yu ne. ⁹ Tees de mbecy nu rcach ru' ya lo de mbecy, orze' ni' ya cach ru' ga' dey lo de anc ni Ñgyoozh.

¹⁰ 'Orze' cyu zi'l mbecy nu nii zi ne ya, biñ nu byac mbecy, orze' Ñgyoozh gyicy sulagy mi niy.

Tees de yu nu nii zi ni Espiriit Yon nim, de yu ze' wayicy sulagy mi ni dey.

¹¹ 'Yu' nu gu' dey der yaa de yu nu riib ic nañ yu' nu rsysa' de mbecy Israeel riidz ni Ñgyoozh. Ze' yu' ga' nu gu' dey der yaa feeze. Nunu yu' ga' nu gu' dey der yaa de fushtiz. Ornu ni gyicy nu dey der, orze' cue' sug ic der nu lac mod gyicy ru par nu gabe nu sac falt nir. Ni cue' sug ic der la na riidz nu niir.

¹² Gun ornu shuub or nu nii der ze', orze' Espiriit Yon ni Ñgyoozh lyuum ni der lac mod niir —nam.

Gyel nap dzi cyup riidz niñ

¹³ Orze' bruu su tub mbecy lat de mbecy zigy. Orze' nay rab yu Jesuuz:

—Masht, mnii lo bicya nu cuic yu gyel nap nu ya bdugyi ornu gut uza —nay.

¹⁴ Orze' na Jesuuz rab mi yu:

—Ru mbecy, ıcyu bicy nu ya naca feeze nu lewa gyel nap ni de ru? —nam.

¹⁵ Orze' nam rab mi de mbecy:

—Bicy cuidad der nu nac de lo la gyel ye rzac. Gun mbecy walab nu nac nu ricy cup dey zañ lo coz, nde' gyicy ñi nu cui mbañ yu —nam.

¹⁶ Orze' mniim tub riidz tiily lo dey. Orze' nam:

—Bzu tub mbecy guani'ñ. Tona' la sheñ cosech rte'y lo yu niy. ¹⁷ Orze' brugyi' nu rnii tooy: “ıZe' na lac mod gyicya? Saca' la ca lugaar nu du' choowa cosech ne”, mnii tooy. ¹⁸ Orze' mnii ga' tooy: “Ya bi gud lagya lac mod gyicya. Tilya de ye ne. Orze' za zira nu zily zir. Gun orze' nañ ze' du' choowa dela cosech ne, nunu dela coz nu ricy cupa. ¹⁹ Orze' nee nañ lardo: Dzi ga nap. Bdu' choowa zañ coz nu cyiñ ne par zañ ña'n. Na gac zu lagya. Gac daw.

Gac do'. Nunu gac gyicya gusht ne." Ni mnii tooy.
²⁰ Orze' na Ñgyoozh rab mi yu: "¡Mbey ton! Laab
rel na gat ru. Ze' de coz nu bdu' choow ru, orze'
¿cyu ni gyeñ ñi?" ²¹ Orze' ni mod zac mbecy benu
cyaañ yu gyel nap niy par ub zi'l yu, tees sac coz
nu sac niy par lo Ñgyoozh —nam.

*Jesuuz rlyuum ni de mbecy nu Ñgyoozh zum al-
tant ni de i'ñ mi*

²² Despuées orze' Jesuuz nam rab mi de yu nu
rsya' lom:

—Cue' sug ic der nu nac de coz nu gow der par
nu cui mbañ der. Ni cue' csug ic der nu nac shab
ru. ²³ Gun dzi zir sac nu cui mbañ der gaze' de coz
nu gow der. Nunu cuerp ni der sac zir ñi gaze' shab
ru. ²⁴ Güii der mod nu ricy de byac. Ni wagnuuz
ma. Nunu ni wagte' ma. Nunu sac ye ni ma. Mas
ni, tees Ñgyoozh rgoow mi de ma. ¡Ze' yegar de ru
sac zir der gaze' de chigyiñ! ²⁵ ¿Ca na de ru nu nac
nu dzi rsug ic der gac tuuñ zir der lo yur, mas ñuu
se tub or? ²⁶ Ze' benu wac gyicy der de coz mi' ze',
¿lagu dzi rsug ic der nu nac de' zir coz?

²⁷ 'Güii lac mod raly de ya gyee. Ni wagyicy ñi
riiñ. Ni wagri'ñ iily. Mas ni, tees ya rñee lo der
nu rey Salomoong, mas tona' la guani'ñ yu, tees
wansuy negy nu nsaap ñi gal nu na de gyee ze'.
²⁸ Benu Ñgyoozh rtiish mi de gyish nu nash ngush
na, ze' ina gyañ lo gyi nañ yo, nde' nu segur la
tiish mi de ru mbecy nu wagyicy cup consuel lom.
²⁹ Nde' nu cue' dzi csug ic der chesar nu yub ru de
coz nu gow der o nu go'r. ³⁰ Gun dela de coz ze'
rsug ic de mbecy ni gyishlombecy. Tees de ru zu

Ñgyoozh, uz der. Nunu mi ze' bi rad lagy mi la coz galagy ñi ni der. ³¹ Orze' bzub lo der nu nac gyel gubier ni Ñgyoozh. Orze' mi ze' cuic mi dela coz nu galagy ñi ni der —nam—.

Jesuuz rlyuum ni de mbecy nu nap zir nu gyicy dey de coz nu sac ñi gyibaa

³² 'Der mbecy nu na gal nu na shily ne, cue' dzib der. Sac zig der. Tees Ñgyoozh, uz na, yet lagy mi nu gyicy mi nu gyub ic nu der mi lugaar ze' nu riib ic mi. ³³ Orze' biit der de coz nu yu' nir. Orze' nu tiñ nu gad ni der ze' cuic der ni mbecy zi. Orze' bicy der nu gad tub nerbid tiñ nu yu' gyibaa ni der, gun wayaguush ñi. Pcyaañ der gyel nap nir gyibaa ze' nu rila walaazh ñi. Ze' ni wayu' gubaan nu coy ñi, ni bigyich wac nit lo ma ñii. ³⁴ Gun lugaar ze' nu rcyaañ der gyel nap nir, ze' lugaar nu ric la añ ni der lo —nam—.

Rlagy ñi nu zu lily der

³⁵ 'Rlagy ñi nu gac der tub mbecy nu lily gaa la zu. Na der gal na tub mbecy nu bi bzu lily yu. Bzuy shab yu, nunu bi pcaay gyi candiil niy. ³⁶ Nunu rlagy ñi gyicy der gal nu ricy de moz nu rbez yu patroo niy nu griy nu guay lo fandang. Na ornu griy, gnii nuy de moz niy. Orze' lueg la shaal dey ro' niy. ³⁷ Dzi ni de moz benu patroo niy gyap yu dey zu ga lagy yu ornu griy. Ya rishli rnee lo der nu laab patroo ze' gyicy yu nu gzub dey lo mez. Orze' patroo niy zu lily yu nu saay gya'n nu gow dey gyit. ³⁸ Dzi ni de moz ze' benu patroo niy gyap yu dey zu ga lagy yu mas guzeel rel riy, o mas bi rza' yu riy. ³⁹ Na gad lagy der de nu nii. Benu shuaan tub yu' gad lagy yu la or ru'ña gubaan, orze' wazaan

yu nu chu'y nañ yu'y nu coy suuy. ⁴⁰ Orze' ni' zi'l de ru rlagy ñi nu gac der tub mbecy nu lily zu. Gun ya, biñ nu byac mbecy, yapa or nu a' sa' la lagy der ya —nam.

Riidez ni cyup moz

⁴¹ Orze' Bed nay rab yu Jesuuz:

—Shuaan de, riidez tiily nu mniir lo de ze', ¿a nde' par de ya zi'l, uti nde' par dela mbecy? —nay.

⁴² Orze' Jesuuz nam rab mi yu:

—¿Ca na moz nu ricy paa, nu moz nu yu' shcab ñi? Yu ze' bdu' patroo niy riiñ yaay nu gyub ic yu de' zir moz nu yu' niy, par nu cuic yu nu gow de yu ze' or niñ. ⁴³ Dzi ni moz ze' benu gyap patroo niy yu ornu griy nu ricy yu gal nu mniy loy. ⁴⁴ Ya rishli rnee lo der nu patroo niy cu'y riiñ yaay nu gyub ic yu dela coz niy. ⁴⁵ Tees benu moz ze' nac yu mbecy a' nap, orze' nii tooy nu wari gyiily patroo niy. Orze' cugyi' gyicy ras nuy de losa' moz yu. Mña gyeey la gyicy ras nuy. Gow yu nunu go'y, nunu gzugy yu. ⁴⁶ Orze' gri patroo niy tub dzi nu a' sa' la lagy yu. Griy tub or nu wagad lagy lay. Orze' tona' la cashtig ily cuic yu ni moz ze'. Gyicy yu gal nu ricy nu dey mbecy wagyicy paa.

⁴⁷ 'De moz nu rad lagy de coz nu rlagy patroo ni, tees wacsu lily yu de coz nu rniy, ni wacsuub gyidag yu niy, orze' yu ze', cuic dey cashtig niy. Orze' zañ golp gad niy. ⁴⁸ Ze' de moz nu wagad lagy de coz nu rlagy patroo ni, ni' zi'l yad ñi nu gad cashtig niy, orze' ornu cuic dey cashtig niy, orze' ñuu zi zir golp gad niy. Gun de mbecy nu briic Ñgyoozh sheñ ni, orze' ni' zi'l niim nu gyabic yu sheñ. Nunu yu nu sheñ bgu' Ñgyoozh yaa, orze'

yu ze' cyish lo zir Ñgyoozh loy nu gyicy yu zañ zir coz.

Jesuuz ricy mi nu rla' losa' mbecy

⁴⁹ 'Yā yapā nu gyicyā nu ri bee Ñgyoozh ni dela mbecy nu yu' gyishlombecy. Gyicy mi gal nu ricy gyi. Bicy na nu bi rca gyi ze', orze' tona' la gyet lagya. ⁵⁰ Nunu ya rlagy ñi nu tona' la gzac zi. Nunu tona' la deet gac nañ lardoō gashtal gded la nu gzac zi. ⁵¹ ¿A rnii too der nu ya yapā nu gyicyā nu nap chu' mbecy nu losa'y gyishlombecy? Walab nu gyicyā nu nap chu' dey, sinu gyicyā nu chucoo dey nu losa'y. ⁵² Gun na par lo gaay mbecy laab nu famil zi'l ni dey chucooy. Chon yu chay contr ni cyup yu. Ze' cyup yu chay contr ni chon yu. ⁵³ Gun yu' mbecy gush nu chay contr ni i'ñ yu yu gyeey. Ze' yu ze' chay contr ni uz yu. Ze' yu' ga' biñ mñaā nu cham contr ni i'ñ mi fiñ mñaā. Ze' fiñ ze' chañ contr ni ñaañ. Ze' yu' ga' biñ mñaā nu cham contr ni shis mi. Ze' fiñ ze' chañ contr ni ñaa gud ñi —nam.

De miesht ni tiem

⁵⁴ Orze' na ga' Jesuuz rab mi de mbecy:

—Ornu de ru rzac der nu yad za par ze' nu rza doo, orze' rnii der nu gyet gyey. Nunu ni raac ñi. ⁵⁵ Ze' ornu bi druun par yaa reg na ornu güin par ze' nu rza doo, orze' rnii der nu bi yad tiem zig. Nunu ni raac ñi. ⁵⁶ ¡Mbecy rzu' lo! Benu rad lagy der miesht nu ta' baa, gal nu miesht nu yu' lo yu, ¿se lagu wagad lagy der la tiem yu' der beni? —nam rab mi dey.

Bicy der rishnap nu losa'r

⁵⁷ Orze' na ga'm rab mi dey:

—¿Lagu wagnii too der par ub ru ben ca na nu nap? ⁵⁸ Orze' benu ca na tub losa'r rlagy yu cu'y cyir nu cha nuy ru lo de fushtiz, orze' bzu altant nu gyicy ru rishnap nur yu lat nu gabee cuic ñi tiem nir. Gun orze' cue' cha nuy ru lo feez. Gun benu wayicy ru nde', orze' feez ze' gu'y ru yaa de yu nu rña yu' gyiib. Orze' de yu nu rña yu' gyiib shet lag dey ru nañ. ⁵⁹ Yā rneē lor nu waruur nañ gashtal cuaa lar dela tiñ nu nii dey —nam.

13

Tona' la ricy ñi presis nu ne' mbecy cyi nu ricy yu

¹ Orze' laab tiem ze' la be mbecy gua güii dey Jesuuz. Orze' byoo dey rishlom nu Pilato bicy yu nu gut la be mbecy Galilea. Orze' gucan reñ de mbecy ze' nu reñ bañcyug nu briic dey gun lo Ñgyoozh.

² Orze' na Jesuuz rab mi dey:

—¿A rnii too der nu de mbecy nu gut ze' dzi zir nac yu mbecy cyi par de' zir mbecy Galilea, nunu nde' nu ni bzac dey? ³ Yā rneē lo der nu walab. Nunu benu de ru wane' der dela cyi nu ricy der, orze' ni' de ru gat der. ⁴ ¿La coz rnii der nu nac tiiñ zu chon mbecy nu gut ornu bet lag tub yu' gya too dey tub gyedz nu la Siloé? ¿A rash der shcab nu de yu ze' dzi zir bicy dey coz cyi gaze' de' zir mbecy nu rcyiñ Jerusaleeng? ⁵ Yā rneē lo der nu walab, nunu benu de ru wane' der de cyi nu ricy ru, orze' ni' zi'l gat der —nam.

Riidz tiily ni ya las nu wacuic uugy

⁶ Orze' Jesuuz mniim tub riidz tiily lo dey. Orze' nam:

—Bzu tub mbecy. Bzub tub ya las niy. Bzub ñi lat lyucy urbyay niy. Orze' gua güiyy ben a ta' uugy niñ. Tees wangyap yu ni tub uugy niñ. ⁷ Orze' nay rab yu moz niy nu ricy riiñ lat naa ze': “Güii. Bza' chon ña'n zaab ryap la rgüii ya las ii nu ryuba uugy niñ. Tees rila wagyapa uugy niñ. Orze' na pshi'ñ ñi. ¿Gun lagu leew la ricy seed ñi lat naa?” nay. ⁸ Tees yu nu ricy riiñ ze' nay rab yu patroo niy: “Patroo, bzaan zub ñi stub ña'n. Orze' glaa yu gyi'ñ. Gaze' nu du' abon gyi'ñ. ⁹ Benu ni, orze' cyup ridz cuic ñi uugy. Ze' benu wabic ñi uugy, orze' nap zir gyi'ñ ñi”, nay —nam.

Jesuuz bicy yac mi tub biñ mñaa sab

¹⁰ Tub tiem, tub sab, dzi nu rzu lagy mbecy, orze' Jesuuz rim nañ tub yu' nu rsysa' de mbecy Israeel riidz ni Ñgyoozh rlyuum ni de mbecy. ¹¹ Nunu ze' ri tub biñ mñaa nu bi bza' tiiñ zu chon ña'n rat mi. Gun bi bicy ni nuras mi, nunu bicy yu nu brong mi. Orze' rila wangac ñgyu' lim. ¹² Na ornu Jesuuz bzaac mi biñ mñaa ze', orze' bredz mi biñ mñaa ze'. Orze' nam:

—Biñ mñaa, bi byac ru ni güii nu rat ru —nam.

¹³ Orze' gaze' nu gul yaam biñ mñaa ze'. Orze' laab or la ze' byu' li cuerp ni biñ mñaa ze'. Orze' brugyi' nu ryabic mi gyel mbecy ni Ñgyoozh. ¹⁴ Tees yu nu riib ic nañ yu' ze' guzi lagy yu, gun Jesuuz bicy yac mi biñ mñaa ze' sab, dzi nu rzu lagy mbecy. Orze' nay rab yu de' zir de mbecy nu yu' ze':

—Yu' tub shuup dzi nañ tub sman par nu gyicy na riiñ. Orze' lat de dzi ze' cyid der par nu gyicy yac mbecy der. Tees dzi nu rzu lagy mbecy, cue' cyid der par nu gyicy yac mbecy der —nay.

¹⁵ Orze' na Jesuuz rab mi dey:

—Der mbecy rzuu lo, ¿de ru walab gaal washaagy der tor nir o bur nir sab, dzi nu rzu lagy mbecy, par nu cha nu der ma nu go' ma nis?

¹⁶ Ze' biñ mñaa ii, mi ii nez Abraham, nunu bi bza' tiiñ zu chon ña'n nu pcyiig nuras biñ mñaa ii nu güii nu rat mi. Orze' beni ¿a wac gyagy biñ mñaa ii ni güii nu rat mi sab, dzi nu rzu lagy mbecy? —nam.

¹⁷ Ornu ni mnii Jesuuz, orze' de losa' yuum tona' la gut lo dey. Tees de' zir de mbecy tona' la bet lagy dey nu nac de coz ily nu ricy mi.

Riidez tiily ni mbigy urnishtas

¹⁸ Orze' na ga' Jesuuz:

—¿La na gyel gubier ni Ñgyoozh? ¿La ñuu coz saapa nu gyel gubier nim? ¹⁹ Gyel gubier ni Ñgyoozh rac ñi gal nu rac nu tub mbigy ya urnishtas nu rnuuz mbecy lo yu niy. Orze' gaze' nu raly ñi gashtal gyac lañ tub yag ily mas gashtal de chigyiñ rzaa ma teez ma lat yaañ —nam.

Riidez tiily ni lebadur

²⁰ Gaze' nu na ga'm:

—¿La ñuu coz saapa nu gyel gubier ni Ñgyoozh?

²¹ Gyel gubier ni Ñgyoozh nañ gal nu na lebadur nu gush tub biñ mñaa. Bdu'm ñii lat chon nac arin, gun orze' lebadur ze' cshup ñi dela cub zañ ze' —nam.

Jesuuz rlyuum ni de mbecy nu ñuu zi mbecy gash dey nez ni Ñgyoozh

²² Na nez nu yam par Jerusaleeng na, orze' blyuum ni de mbecy dela gyedz gal nu dela ranch

nu yu' nez nu zam. ²³ Orze' gaze' nu bruu su tub mbecy. Orze' nay rab yum:

—Shuaana, ¿a ñuu zi zi mbecy gruu mbañ yu? —nay.

Gaze' nu nam rab mi yu:

²⁴ —Bicy der fers nu chu' der ro' shii, gun ya nee lor tona' la zigy mbecy galagy dey chu'y, tees wac chu' dey. ²⁵ Orze' yu guyu' gyeshtey nunu soow yu ro'. Orze' de ru, de mbecy nu yu' par ich gnii der: “Shuaana, pshaal ro' ne”, nii der. Tees yu guyu' ze' gnii ga'y gab yu de ru: “Ya wagad lagya ca bruu der”, niy. ²⁶ Gaze' nu nii ga' de ru: “Ze' ¿lagu ni rnii ru? Ze' de ya tublaazh la bdaw du de ru gyit. Nunu tublaazh la bdo' du de ru. Nunu laab ru blyuur ne de lat cay ledz de”, nii der. ²⁷ Orze' yu guyu' ze' nii ga'y gab yu der: “Ya bi mnee lo der nu wagad lagya ca bruu der. Orze' bruu chu der lo, der mbecy nu shiñ ricy”, niy gab yu de ru. ²⁸ Orze' ze' gun der nunu siigy lay der ornu zac der Abraham, nu Isaac, nu Jacob, gal nu de' zir de yu nu mnii por cuen ni Ñgyoozh yu' dey ze' nu riib ic mi. Ze' ii de ru bi zu chu der par ich. ²⁹ Gun cyid mbecy nu gruu gaza' dela lugaar ni gyishlombecy nu gzub dey lo mez nu gow dey gyit ze' nu riib ic Ñgyoozh. ³⁰ Orze' la be de mbecy nu gash zir zu na, de yu ze' gyac yu yu nu gya zir zu par lo, nunu la be de mbecy nu gya zir zu na, de yu ze' gyac yu yu nu gash zir zu par lo —nam.

Jesuuz ricy mi sentiir nu nac mbecy Jerusaleeng

³¹ Gaze' nu bru'ña la be de mbecy fariseo. Orze' na dey rab yu Jesuuz:

—Gua la ru, gun Herodes rlagy yu cut yu ru —na dey.

³² Gaze' nu nam rab mi dey:

—Gua der gua niir lo mbecy rguu ze' nu na gal nu ina ya loo chu nuras nu bicy ni mbecy, nunu gyicy yaca mbecy rat. Orze' widz na, gya' lo de riiñ nu ricya. ³³ Rlagy ñi zab za la nez dzi na, nu ina, nu widz na. Gun walab se'ñ nu gat tub mbecy nu rnii por cuen ni Ñgyoozh reña' lugaar par Jerusaleeng.

³⁴ ¿A der mbecy Jerusaleeng! Rut der de mbecy nu rnii por cuen ni Ñgyoozh. Nunu rgoow gyita' der de mbecy nu rzeed Ñgyoozh lat der. Zañ tir ngulagya ñgyicy tublaazha der gal nu ricy tub gyid ornu ricy tublaazh ma dzich ni ma nañ lowe' ma. Tees de ru wangelagy der. ³⁵ Na ledz der gyiyeen ub ziñ. Gun ya nee lo der nu wazaca' la der ya gashtal shuub la dzi nu nii der: “Dzi ga zily nac biñ nu bzuu nez Ñgyoozh Shuaan na, biñ nu cyid lo den”, nii der —na Jesuuz.

14

Jesuuz bicy yac mi tub mbecy nu gu' gyi

¹ Guc ñi tub tiem, tub sab, dzi nu rzu lagy mbecy, orze' Jesuuz guam gua tom gyit yu' tub yu zub lo ni de mbecy fariseo. Nunu ze' yu' la be mbecy fariseo nu rgu' cuen ga dey mi ben lac mod gyicy mi. ² Nunu ri ga' tub mbecy nu yu' gyi. ³ Orze' Jesuuz bdugyi'm lo de yu nu rlyuu leey ni Ñgyoozh gal nu lo de mbecy fariseo. Orze' nam rab mi dey:

—¿A nap zuñ lo leey ni Moisees nu gyicy yac na mbecy rat sab, dzi nu rzu lagy mbecy, uti a' nap? —nam.

⁴ Tees dey ze' wanii lay. Gaze' nu gul yaam mbecy rat ze'. Orze' gaze' nu bicy yac mi yu. Orze' gaze' nu bzuu nez mi yu yay yu'y. ⁵ Gaze' nu nam rab mi de mbecy fariseo:

—Benu ca na de ru gyet lag tub i'ñ der nañ tub zo, o tub tor ni der gyet lag ma, orze' ¿a walab co der ma, mas sab, dzi nu rzu lagy mbecy? —nam.

⁶ Orze' de yu ze' rila wannii dey.

De yu nu ca lo cuen nu cha lo fandang

⁷ Ornu Jesuuz bzaac mi de mbecy nu ya tow gyit ryub dey lugaar ni mbecy zub lo lo mez nu zub dey, orze' gaze' nu briic mi consef ni dey. Orze' nam rab mi dey:

⁸ —Ornu cuedz mbecy de ru nu cha der lo fandang, orze' cue' zub der se' mbecy zub lo, gun dzi ga gru'ña tub mbecy nu lily zir na gaze' ru. ⁹ Orze' gru'ña mbecy nu bredz rup laa der gal nu mbecy lily ze'. Orze' niyy gab yu ru: “Ze' nu zub ru gac cuic ru nu zub yu lily ii”, niyy gab yu ru. Orze' ru gruu gyel mbecy nir, nunu chesub ru se' mbecy zaab ich zir. ¹⁰ Lugaar nu gyicy ru nde', orze' i mod gyicy ru: Ornu cuedz dey ru nu char fandang, orze' ornu ru'ñar, orze' zub ru se' mbecy nu zaab ich zir. Gun ornu ru'ña mbecy nu bredz ru ze', orze' niyy gab yu ru: “Mbecy, ru char zub ru se' mbecy zub lo zir”, niyy gab yu ru. Orze' ornu gyicy ru nde', orze' de' zir mbecy nu nguaa lo mez ze' ca lagy dey lor. ¹¹ Gun yu nu ricy zily ub, yu ze' gruu gyel mbecy niy. Ze' yu nu ricy gyel gyidz ni, yu ze' gyed gyel mbecy niy —nam.

¹² Orze' nam rab mi mbecy nu bredz mi nu cha tom gyit yu' ze':

—Ornu cuic ru cui o che nu gow mbecy, orze' cue' cuedz ru amig nir. Ni cue' cuedz ru de bicy ru. Ni cue' cuedz ru de uz ru. Ni cue' cuedz ru de yu guaniñ lat losa'r. Gun benu ni gyicy ru, orze' ni' zi'l de yu ze' cuedz dey ru nu cha tor gyit yu'y. Orze' ni mod gyad ir. ¹³ Lugaar nu gyicy der nde', orze' i mod gyicy ru. Ornu gyicy ru tub sa', orze' cuedz ru de mbecy zi nu cyid dey lor. Cuedz ru mbecy nu wagac za, nunu cuedz ru mbecy coj, nunu cuedz ru mbecy lo ca'. De yu ze' cuedz ru. ¹⁴ Dzi ni der benu ni gyicy ru. Gun de yu ze' waca' gyabic dey ir. Tees ru gyad ir ornu shuub dzi nu gyabañ de mbecy nap.

Riidez tiily ni fandang

¹⁵ Na ornu güeñ tub yu nu bzub nu Jesuuz lo mez de coz ze', orze' nay rab yum:

—¡Dzi ni de mbecy nu cha tow gyit lo sa' ze' nu riib ic Ñgyoozh! —nay.

¹⁶ Orze' Jesuuz nam:

—Bzu tub mbecy. Orze' bicy yu tub sa' ily. Orze' bredz yu zigy mbecy nu chay lo sa' ze'. ¹⁷ Na ornu pshuub or na, orze' bzuu nez yu tub moz niy nu cha niy lo de mbecy nu ca lo cuen nu cha lo sa' ze'. Orze' nay: “Da der, gun dela coz bi zu lily ñii”, nay. ¹⁸ Orze' dela dey mnii dey rishto' lo. Orze' mbecy nu guay lo loga la ze' nay: “Yā wac chā, gun saa la wi tub nac yu. Nde' nu yā cha gūii ñii. Orze' bicy sulagy ne, gun wac chā”, nay. ¹⁹ Ze' tuuba'y nay: “Wac chā, gun saa la wī gaay nez tor. Orze' na chā gyicyā preb ma ben a nap ricy ma riiñ. Orze' bicy sulagy ne, gun wac chā”, nay. ²⁰ Ze' tuuba'y nay: “Wac chā, gun saa la pchelāā. Nde' nu wac chā”,

nay. ²¹ Orze' gaze' nu moz ze' bish cyay yay. Ornu briy na, orze' mniiy dela nde' lo patroo niy. Orze' patroo niy tona' la guzi lagy yu. Gaze' nu nay rab yu moz niy ze': "Dzach ru gua lat cay, gal nu de nez mi' nu riib lat gyedz. Orze' cyid nur de mbecy zi, nu de mbecy nu wagac za, nu mbecy lo ca', gal nu mbecy coj", nay. ²² Na ornu bi rac la be or, orze' moz ze' nay rab yu patroo niy: "Na bi bicya dela coz nu mniir, nunu gabee gad ru' lugaar nu gzub mbecy benu cyid yu", nay. ²³ Orze' patroo ze' nay rab yu moz niy: "Gua de nez zu gal nu de nez las nu riib ngush. Orze' niir lo reña' mbecy nu cyid dey, gun orze' chu' zir mbecy gashtal dzaa la nañ yu' ne. ²⁴ Gun ya rnee nu ni tub la mbecy nu mnee nu cyid nu loga la wow yu de coz nu bzu ye", nay —nam.

Lac mod cha ca mbecy ich Crisht

²⁵ Orze' tona' la zigy mbecy za ca dey ich Jesuuz. Orze' bish cyam bgüim lo dey. Orze' nam rab mi dey:

²⁶ —Benu ca na mbecy cyid cay icha, ze' benu rca zir yu uz yu, o ñaay, o mñaay, o i'ñ yu, o bicy yu, o zan yu, o ub yu gaze' ya, orze' yu ze' rila wangyap yu nu gac yu mbecy nu rsya' lo. ²⁷ Cyu zi'l mbecy nu washet ic nu gzac zi nu nac ya, nunu benu washet ic yu nu gyicy yu gal nu ya rlagya, orze' yu ze' ni' zi'l wangyap yu nu gac yu mbecy nu rsya' lo. ²⁸ Orze' benu ca na de ru rlagy der zaar tub yu' gya, orze' za walab nu loga la rlagy ñi nu zub ru cor cuen ben a gal tiñ nir par nu gya' lo yu' ze'? ²⁹ Tees benu de ru gzu zi'l der simient niñ, ze' waza' lo der ñii, orze' ornu gzac de mbecy, orze'

cugyi' gubdzaa dey der. ³⁰ Orze' nii dey: “Yu re nu bzuub zi'l yu gyi' yu' niy per wangac nza' loy ñi”, nii dey. ³¹ O benu tub rey chay nu chu'y gyel yuu nu tuuba' rey, orze' ¿a walab nu loga la rlagy ñi nu nii tooy ben a zu tii miily soldad niy lo tub gal miily soldad nu chucoo nuy ze'? ³² Ze' benu wazuy lo gyel yuu ze', orze' ornu gabee zet ru' zu tuuba' rey nu chucoo nuy ze', orze' gzuu nez yu tub moz niy nu niy lo tuuba' losa'y nu cue' gyicy yu gyel yuu. ³³ Orze' ni' zi'l de ru. Benu washet ic der nu zeeñ der de coz nu ricy cup der, orze' wangyap der gac ru mbecy nu rsya' lo —nam—.

Ornu zed ruu nu ri' niñ, orze' wacyiñ ñi

³⁴ Zed, nde' nap ricy ñi benu yu' nu ri' niñ. Tees benu zed ze' ruu nu ri' niñ, ¿orze' lac mod chu' ga' nu ri' niñ tuuba' tir? ³⁵ Orze' rila wacyiñ ñi. Ni wacyiñ ñi nu gyicy nap ñi yu. Nunu ni wacyiñ ñi par abon. Orze' nap zir nu ne' dey ñi. Yu nu zub gyidag, rlagy ñi gyicy yu nu gyet lag yu cuen —nam.

15

Riidz tiily ni shily nu bdune'

¹ Dela yu nu rboo tiñ por cuen ni gubier Rom, gal nu reña' mbecy bdune' becha' dey lo Jesuuz par nu zuub gyidag dey de coz nu rniim. ² Ze' de mbecy fariseo gal nu de yu nu rlyuu leey ni Ñgyoozh rnid ru' dey nu nac mi. Orze' na dey:

—Yu re rnii nuy mbecy cyi nunu row nuy dey gyit —na dey.

³ Orze' Jesuuz mniim riidz tiily lo dey. Orze' nam:

⁴ —Benu ca na de ru zu tub gaynal shily nir, se' dune' tub ma, orze' ¿a walab zeeñ der nobent zuub gaa ma ngush? Orze' gaze' nu cha der cha yub der tub bañ nu bdune' ze' gashtal gyad la ma. ⁵ Na ornu gyad ma na, orze' tona' la gyet lagy der. Orze' riib yeñ der ma gya nur ma. ⁶ Na ornu rir yu'r na, orze' cha te'r de amig nir gal nu de mbecy nu yu' gaab ga. Orze' nii der gab ru dey: “Bet lagy der nur ya, gun ya byada shily ne, bañ nu bdune'”, nii der. ⁷ Ya rishli rnee lo der, cyit zir rac gyibaa nu nac tub mbecy cyi ornu rne'y dela cyi nu ricy yu, gaze' nu nac nobent zub gaa mbecy nap nu walagy ñi nu ne' cyi nu ricy yu.

Riidz tiily ni biñ mña nu byad tiñ nu bdune' ni

⁸ Gyicy peen nu tub biñ mña nu ricy cup tii tiñ plat. Orze' dune' tub ñi nim. Orze' ¿la coz gyicy mi? Nu loga la caam gyi candiil nim. Orze' gaze' nu lyuub mi nañ yu' nim. Orze' nap yub mi ñii gashtal gyad lañ. ⁹ Na ornu gyad ñi nim na, orze' cuedz mi dela amig nim, gal nu dela mbecy nu yu' gaab ga. Orze' niim gab mi dey: “Tona' la yet lagya gun bi byada de tiñ nu bdune' ne”, niim. ¹⁰ Orze' ya rnee lo der nu tona' la yet lagy de anc ni Ñgyoozh nu nac tub mbecy cyi nu rne'y de cyi nu ricy yu —nam.

Riidz tiily ni yu feñ nu gudza

¹¹ Orze' Jesuuz mniim tuuba' riidz tiily lo dey. Orze' nam:

¹² —Zu tub mbecy. Zu cyup i'ñ yu. Orze' yu mi' ze' nay rab yu uz yu: “Tat, cuic ru gyel nap nir nu ya dugyi”, nay. Orze' yu ze' blew yu gyel nap ze' niy lat de i'ñ yu. ¹³ Na ornu bi rac la be tiem, orze' yu mi' ze' biit yu dela coz nu bdugyi. Orze'

gush nez yu za nuy tiñ ze' tub lugaar zet. Gashtal tuuba' nasyoong zay. Orze' ze' mniit ton yu dela tiñ niy. ¹⁴ Na ornu blazh mniit yu dela tiñ niy, orze' biid tub cubiñ ily lugaar ze'. Orze' brugyi' rded yu gyel ran. ¹⁵ Orze' gua yub yu riiñ lo tub mbecy guledz. Orze' yu ze' bzuu nez yuy chay ranch niy nu cha ñay cuch. ¹⁶ Orze' yu mi' ze' ngulagy yu ñgyow yu gyid ich zaa nu row cuch ze' par nu dzaa nañ yu. Tees ni tub la mbecy wancuic yu nde' gow yu. ¹⁷ Laab nde' la orze' mnii tooy: “De moz nu rcyiiñ lo uza rad nu row dey gashtal drusuba' lañ. Ze' ya se nu gat zi'la gyel ran. ¹⁸ Nde' nu na nap zir cush cya gya yu' uza. Orze' nee loy: Tat, ya guch ñii ne lo Ñgyoozh, nunu guch ñii ne lo ru. ¹⁹ A' yada'ñ nu nii dey nu naca i'ñ ru. Orze' na bicy nu ya gal nu ricy nur de moz nir, nee lo uza”, rnii tooy. ²⁰ Orze' gaze' nu gush nez yu yay lo uz yu.

'Na ornu gabee zet yay, orze' uz yu bzaac yuy. Orze' gushni lagy yuy. Gaze' nu gush nez yu zay za cheel yuy. Orze' bdu' yaay yeñ yu. Orze' bdoy chit loy. ²¹ Orze' yu feñ ze' nay rab yu uz yu: “Tat, guch ñii ne lo Ñgyoozh, nunu guch ñii ne lo ru. A' yada'ñ ne nu nii dey nu naca i'ñ ru”, nay. ²² Gaze' nu uz yu bicy yu mandaar lo de moz niy. Orze' nay rab yu de moz niy: “Dzach der, gua gyii der negy nu cyit zir na. Orze' zuu der yu negy ze'. Nunu rii ga' der tub bi' yaay. Nunu caa der gyid lab gyi'y. ²³ Orze' gua tee der chigud, bañ feñ nu re'ñ zir par lo dela ma. Orze' gyicy na sa'. ²⁴ Gun i'ñā ii nay gal nu na tub mbecy nu bi gut. Tees na byabañ yu. Guc yu mbecy bdune'. Tees na byad yu”, nay. ¡Orze' brugyi' nu ricy dey sa'!

25 'Orze' lat ze' i'ñ yu yu gush ze' riy lat naay. Orze' bish cyay yay. Na ornu yay bi rgaab ro' na, orze' güeñ yu nu rlaa musiic. Nunu rulgyi' mbecy. 26 Orze' bredz yu tub moz nu ri lo sa' ze'. Orze' bdugyi'y loy la coz rac. 27 Orze' moz ze' nay rab yuy: “Bi bri bicy ru. Orze' uz ru bicy yu mandaar nu cut dey tub chigud, bañ feñ nu re'ñ zir par lo dela ma. Gun bicy ru bri nap yu, nunu bri ruub yu”, na moz ze' rab yu yu gush ze'. 28 Orze' yu gush ze' tona' la guzi lagy yu. Orze' wangelagy yu ñgyu'y yu'. Orze' gaze' nu uz yu bruuy nu mnishbaay loy nu chu'y yu'. 29 Orze' nay rab yu uz yu: “Ru rad lagy ru nu bi guzañ ña'n nu ya ricya riiñ nir. Nunu rila wangiicya nu wazuub gyidaga nir. Tees ru rila wancuic ru ni tub chiib feñ par nu ñgyicya sa' nu de amig ne. 30 Tees lugaar nu ni ñgyicy nur ya, per ca yu re biit ru chigud, bañ feñ nu re'ñ zir par nu gyicy ru sa' nu briy. Ze' yu re mniit ton yu tiñ nir lo de biñ congol”, nay.

31 'Orze' na ga' uz yu rab yuy: “A uza, ru dub laa tiem nac nur ya, nunu dela coz nu ricy cupa, nde' coz nir. 32 Tees na dzi nap nu gyicy na sa' nu gyet lagy na, gun bicy ru nay gal nu na tub mbecy nu bi gut. Tees na byabañ yu. Bi bdune'y, tees na byada'y”, nay.

16

Rüidz tiily ni moz nu shiñ bicy

1 Orze' na ga' Jesuuz rab mi de yu nu rsya' lom:
—Bzu tub mbecy guani'ñ. Nunu bzu tub moz nu byub ic de coz niy. Orze' bruu zu tub mbecy briib yu cyi ic moz ze' nu rniit ton yu gyel nap ni patroo

niy. ² Orze' gaze' nu patroo niy ze' bredz yu moz niy. Orze' nay rab yuy: “¿La ñuu riidz zaab nu rnii dey nir? Zeed cuen ru lo de riiñ nu ricy ru, gun na waca' gac ru moz ne”, nay. ³ Orze' moz ze' bzub yu gush yu shcab: “¿Lac mod gyicy na? Gun patroo nin blooy riiñ yaan. Ze' sac fers nin nu gyicy na riiñ ngush, nunu gat loon benu chesan diñ na gun. ⁴ Na la bi rad lagy na la coz gyicy na. Gun orze' gad cyu nu cuic yu' chu'n ornu shuub dzi nu wayicya'n riiñ.” Ni mnii tooy. ⁵ Orze' bredz yu tub ga yu nu zaab tiñ ni patroo niy. Gaze' nu nay rab yu yu nu bru'ña loga la: “¿La be zaab ru ni patroo ne?”, nay. ⁶ Orze' yu nu bru'ña loga la ze' nay rab yuy: “Ya zaaba gal rub tii zu tap gaynal litr asecy niy”, nay. Orze' na moz nu riib ic ze' nay rab yuy: “Ii gyicy nu ta' de nu zaab ru. Gaze' nu zub ru zaar tuuba' nu niiñ nu zaab ru tiiñ zu tub gaynal litr asecy”, nay. ⁷ Na ornu blazh mniy lo yu ze' na, orze' nay rab yu tuuba' yu nu zaab ni patroo niy ze': “Ze' ru, ¿la be zaab ru?”, nay. Orze' yu ze' nay rab yu yu nu riib ic ze': “Tub gaynal bult trig”, nay. Orze' na moz nu riib ic ze': “Ii gyicy nu ta' de nu zaab ru. Orze' zaar tuuba' gyicy nu niiñ nu zaab ru ochent bult trig”, nay. ⁸ Orze' patroo niy ze' mniy nu dzi lily na moz niy par nu dzi bzuy altant. Gun de mbecy nu ricy mod ni cualcyer la mbecy gyishlombecy ii, de yu ze' dzi zir zu dey altant gaze' de mbecy nu ricy mod nu rishli.

⁹ Ya doo rishlor lac mod gyicy nur de gyel nap nir nu yu' gyishlombecy ii. Gyicy nur ñii tub mod par nu gad amig nir. Gun orze' ornu lazh de gyel nap nir, orze' gad mbecy nu nap nii nuy ru ze' nu cyiñ ru tub la.

¹⁰ 'Gun yu nu ricy paa nu ñumiiñ, orze' ni' zi'l ricy paay nu sheñ. Nunu yu nu wagyicy paa nu ñumiiñ, ni' zi'l wagyicy paay nu sheñ. ¹¹ Orze' benu wac gyicy cup mbecy consuel lo der nu nac gyel nap ni gyishlombecy ii, ¿orze' walab gaal gac gyicy cup Ñgyoozh consuel lo der nu nac gyel nap nu rishli? ¹² Nunu benu wayicy paa der nu suu reña' mbecy, orze' se cyu la cuic la coz nir.

¹³ 'Gun ni tub la mbecy nu ricy riiñ wagyicy yu riiñ ni cyup patroo niy. Gun benu ni, orze' ga zi lagy yu lo tub yu. Ze' tuuba'y cay yu. O nu gyicy paay nuy tub yu. Ze' güii naañ yu lo tuuba'y. Orze' wac zu bich mbecy nu nac Ñgyoozh, nunu ni' zi'l wac zu bich yu nu nac de gyel nap nu yu' gyishlombecy ii laab tub zi'l tiem —nam.

¹⁴ Na ornu güeñ de mbecy fariseo de coz ze' na, como dzi rca dey tiñ, orze' bgubdzaa dey Jesuuz.

¹⁵ Orze' na Jesuuz:

—De ru lo mbecy zi'l ricy der nu dzi nap ru. Tees Ñgyoozh rad lagy mi la coz yu' nañ lardoo der. Gun de coz nu rzii mbecy nu tona' la sac, par lo Ñgyoozh rila a' sac ñi —nam—.

Riidz ni gyel gubier ni Ñgyoozh

¹⁶ 'Nese gulas gashtal pshuub la tiem ni Waa nu driib nis mbecy, de mbecy rshaal dey de riidz ni leey ni Moisees, gal nu de riidz ni de yu nu mnii por cuen ni Ñgyoozh. Tees nese tiem ze' rshaal dey de riidz nu sac ni gyel gubier ni Ñgyoozh. Nde' nu na zigy mbecy ricy dey fers par nu chu'y ze' nu riib ic Ñgyoozh.

¹⁷ 'Tees a' biigy zir nit lo baa nu gyishlombecy ii, gaze' nu ricy falt nu gyu' ni tub coz mi' ni leey.

¿A gac zaan losa' mbecy?

¹⁸ 'Benu tub mbecy coy gyicy rishbeey nu zaan yu mñaay, ze' chelaay tuuba' biñ mñaay, orze' yu ze' ricy yu cyi. Nunu yu nu chelaa biñ mñaay nu bzaan ñgyee ze' ni' zi'l ricy yu cyi.

Riudz ni mbecy guani'ñ gal nu Lázaro

¹⁹ 'Bzu tub mbecy guani'ñ. Nunu tona' la negy ñgyup rzuy. Nunu de dzi la rzu baay. ²⁰ Ze' bzu ga' tub mbecy zi nu la Lázaro. Bzu laa gyedz dutuub la cuerp niy. Nunu rzub yu ro' ni guani'ñ ze'. ²¹ Yu ze' rgyish loy nu mas ñuu de coz nguzh nu yet lag lo yu nu goy. Nunu gal de che' yecha' ma rle' ma ze' nu ta' gyedz niy. ²² Orze' pshuub dzi nu gut mbecy zi ze'. Orze' anc ya nuy yu ze' nu ri gyitoo Abraham. Ni' zi'l yu guani'ñ ze' gut yu. Orze' pcach dey yu.

²³ 'Orze' lat nu ri mbecy guani'ñ ze', ze' nu rza mbecy gut, orze' pshes nañ ic yu bgüiyy zet. Orze' bzaac yu Abraham nu Lázaro yu' dey tublaazh. ²⁴ Orze' brish ti nuy Abraham. Orze' nay: “¡Uza Abraham, gushni ñuu lagy ya! Orze' zuu nez ru Lázaro nu cyid yu lo, gun sal yu too mbiz yu lo nis. Orze' gyicy yu nu gyag lyudza, gun tona' la rzac zi lo gyi ii”, nay. ²⁵ Orze' na Abraham rab yuy: “Uza, bicy nu gyeza' lagy nu ru dzi gusht bzur lat nu gabee mbañ ru. Ze' Lázaro ii dzi shni pcyiñ yu. Orze' na ya rica consuel niy ii. Ze' ru rzac zir. ²⁶ Ze' tuuba' coz, ri tub gyeras ily cyaal nez par ze' nu ru rir. Orze' benu ca na tub mbecy nu ri ii galagy yu chay par ze' nu ru rir, orze' wac. Nunu ni' zi'l

de yu nu ri ze' nu ru rir waca' cyid dey par ii", na Abraham.

²⁷ 'Orze' na yu guani'ñ ze': "Beni orze' ya nishbaa lor uza Abraham nu zuu nez ru Lázaro chay yu' uza. ²⁸ Gun zu gaay bicya. Orze' nii Lázaro lo dey nu gyicy cuidad dey ub yu, gun orze' cue' nu gyed dey lugaar ii ze' nu rzac zi mbecy", nay. ²⁹ Orze' na Abraham: "De yu ze' bi ricy cup dey de riidz nu bzeen Moisees, nu de riidz nu bzeen de yu nu mnii por cuen ni Ñgyoozh. Orze' rlagy ñi nu gyicy cuen dey ñi", nay. ³⁰ Orze' na yu guani'ñ ze': "Laab ni uza Abraham, tees benu tub mbecy gut gyabañ yu nunu gruu zac yu lat dey, orze' ne' dey dela cyi nu ricy yu", nay. ³¹ Tees Abraham nay: "Benu wayicy cuen dey de riidz ni Moisees gal nu de riidz ni de yu nu mnii por cuen ni Ñgyoozh, orze' ni' zi'l waguugy lardoo dey mas tub mbecy gut gyabañ yu", nay —na Jesuuz.

17

Cue' lyuu mbecy ni losa'y nu gyicy yu cyi

¹ Orze' Jesuuz nam rab mi de yu nu rsya' lom:

—Dub laa tiem yu' coz a' nap nu ricy ñi nu ricy mbecy cyi. ¡Tees cuaa mbecy nu ricy yu nu gyicy de losa'y cyi! ² Nap zir benu cyiig dey tub gyita' gyeche yeñ yu. Orze' shet lag dey yu lo nisyudoo. Nap zir nde' gaze' nu gyicy yu nu gyicy tub yu shni cyi. ³ ¡Orze' bicy cuidad der!

'Benu tub losa'r ricy yu cyi, orze' shuu nur yu. Tees benu ne'y de cyi nu ricy yu, gyicy sulagy ru niy. ⁴ Mas tub gagy tir gyicy yu coz nu walab se'ñ nuy ru nañ tub dzi, nunu benu tub ga ga' tir cyid

yu lor nunu niy nu wayicya'y de coz nu bicy nuy der ze', orze' gyicy sulagy der niy —nam.

Coz ily gac gyicy na nu nac nu gyicy cup na consuel

⁵ Orze' de yu nu bloo su Shuaan na Jesuuz na dey rab yum:

—Locyuub ru de nu fert zir gyicy cup de consuel lor —na dey.

⁶ Orze' Shuaan na Jesuuz nam:

—Benu de ru ricy cup der consuel lo mas ñuu mi', gal nu na mbigy urnishtas, orze' gac nii der lo yag ily ii nu gruu lyuñ nu chañ gal lo nisyudoo. Orze' ze' gzub ñi, gnii der. Orze' yag ii gyicy ñi gal nu de ru niir —nam—.

Mod nu yad ñi nu gyicy moz

⁷ Gyicy pee lan nu zu tub moz ni ca na tub de ru. Orze' ricy yu riiñ rla'y yu, o nu rñay shily. Na ornu riy yu' or gudze nu guay lat naay, wanii gaal der: “Gyeed zub ru gor gyit”, niir. ⁸ Walab nu ni nii der, sinu niir: “Bzu lily, gun gyicya che. Orze' zu bich ru nu nac ya lat nu rdaw nunu rdo'. Ornu lazh daw ya, orze' gow ru, nunu go'r”, niir. ⁹ Ni' zi'l waric na gras ni moz benu gyicy zi'l yu gal nu yad ñi nu gyicy yu. ¹⁰ Ni' zi'l de ru, ornu glazh gyicy der gal nu mnii Ñgyoozh nu gyicy der, orze' niir: “Gur moz zi'l nac de. Wangyicy de coz ily. Nomaas bicy de gal nu yad ñi nu gyicy de”, nii der —nam.

Jesuuz bicy yac mi tii mbecy nu gurat güii lepra

¹¹ Orze' nez nu ya Jesuuz par Jerusaleeng, bded mi lo de yu nu ri ru' bzaa ni Samaria, gal nu lo de yu ni Galilea. ¹² Ornu brim ru' tub gyedz mi', orze'

bdzeel mi tii mbecy nu rat tub lo güii nu la lepra. Orze' zet yu' dey ¹³rbish ti nu dey mi. Orze' na dey:

—¡Jesuuz, masht, gushni ñuu lagy de ya! —na dey.

¹⁴ Orze' ornu Jesuuz bzaac mi dey, orze' nam:

—Gua der lo uz rlyuur ub ru, gun orze' gad lagy yu nu bi byac der —nam.

Orze' nez nu za dey byac dey ni güii ze'. ¹⁵ Orze' tub yu nu gurat ze', ornu gud lagy yu nu byac yu, orze' bish cyay gua ga'y lo Jesuuz. Orze' ye la rniyy nu ryabic yu gyel mbecy ni Ñgyoozh. ¹⁶ Orze' gugyit tiily yu gal lo yu la yeñ gyi' Jesuuz nu rbic yu gras nim. Yu ze' nac yu mbecy Samaria. ¹⁷ Orze' Jesuuz nam:

—¿Walab gaal walab tii mbecy byac yu? ¿Ca za se gaa de mbecy ze'? ¹⁸ ¿A saca' zir yu nu rbic gras ni Ñgyoozh gaze' mbecy ii? Ni a' nac yu mbecy guledz —nam.

¹⁹ Orze' nam rab mi mbecy ze':

—Wes su, nunu yaa. Ru bi byac ru par nu bicy cup ru consuel lo —nam.

¿Lac mod cyid gyel gubier ni Ñgyoozh?

²⁰ Orze' la be mbecy fariseo bdugyi' dey lo Jesuuz ben gul cyid gyel gubier ni Ñgyoozh. Orze' nam rab mi dey:

—Mod nu cyid gyel gubier ni Ñgyoozh, nde' walab mod nu zac mbecy. ²¹ Wac nii mbecy nu par ii zuñ, o par re zuñ. Gun bi zu gyel gubier ni Ñgyoozh lat de ru —nam.

²² Orze' nam rab mi de yu nu rsya' lom:

—Shuub dzi ornu de ru galagy der gzac der tub dzi nu ya, biñ nu byac mbecy, gzu lat der, tees or la

ze' wazaca' der ya. ²³ Gun gruu zac mbecy nu nii dey: “li zum”, o “Re zum”, nii dey. Tees cue' cha güii der, nunu ni cue' cha ca der ich dey. ²⁴ Gun gal nu rzu gyi ni guzii baa nu ricy ñi nu rzu yaa rup chu la' gaa la, orze' ni mod gyicy ya, biñ nu byac mbecy, ornu shuub dzi nu yapa. ²⁵ Tees nu loga la rlagy ñi nu gzac zi. Nunu rlagy ñi nu gzu chu de mbecy nu yu' tiem na ya. ²⁶ Gal nu guc tiem ni Noé, orze' ni' zi'l mod gac ornu ya, biñ nu byac mbecy, yapa tuuba' tir. ²⁷ Tiem ze' de mbecy nu bdow zi'l dey, nunu go'y, nunu pchelaa dey. Ni bicy dey gashtal ornu pshuub dzi nu gu' Noé nañ barc. Na ornu bru'ña gyey, orze' dela dey gut yu. ²⁸ Nunu ni' zi'l guc tiem ni Lot. De mbecy row dey, nunu ro' dey. Rzii dey la coz, nunu rut dey la coz. Rnuuz dey la coz, nunu rzaa dey yu'. ²⁹ Tees ornu bruu Lot lat gyedz Sodoma, orze' bet gyey gyi gal nu asufre. Orze' dela dey gut yu. ³⁰ Ni' zi'l gac ornu ya, biñ nu byac mbecy, gruu zaca tuuba' tir.

³¹ 'Orze' dzi ze' yu nu zub too yu', cue' nu gyet yu nu coy suuy nu yu' nañ yu' anzir nu ruu chuy. Nunu ni' zi'l yu nu ricy riiñ lat naa, cue' ga' cush cyay gyay yu'y. ³² Byeza' lagy der mña Lot. ³³ Gun yu nu rlagy co nap ub, yu ze' gnit loy. Tees yu nu shet ic nu gat, yu ze' gruu nap yu.

³⁴ 'Tees ya rnee lo der nu rel ze' cyup mbecy riib yu laab lo tub zi'l nuun nas yu. Orze' tub yu gruu gyishlombecy ii nu gyay. Orze' tuuba'y gyiyeen yu. ³⁵ Na cyup biñ mña cam rom iñ gyeche. Orze' tub mi gruum gyishlombecy ii nu gyam. Ze' tuuba'm gyiyeen mi. ³⁶ Na cyup mbecy riy ricy yu riiñ lat naay. Orze' tub yu gruu gyishlombecy ii

nu gyay. Ze' tuuba'y gyiyeeñ yu —nam.

³⁷ Orze' na de yu nu rsya' lom rab yum:

—¿Ca gac de coz ze' Shuaan de? —na dey.

Gaze' nu nam rab mi dey:

—Ze' nu nguaa de cuerp gut, ze' gyatublaazh dela lyash —nam.

18

Riidz tiily ni byud nu guam lo feez

¹ Orze' Jesuuz mniim tub riidz tiily lo dey, gun orze' glyuum ni dey nu zaab nii nu laa dey Ñgyoozh, nunu cue' shi'ñ dey baloor. ² Orze' nam:

—Tub gyedz bzu tub feez. Orze' ni wanchib lay lo Ñgyoozh, ni wanca lagy yu lo mbecy. ³ Nunu laab gyedz ze' bzu tub byud. Orze' bicy cup mi tub gyel cha' ic. Orze' zaab rza lam lo feez ze' nu rgyiñ mi loy nu gyicy nuy losa' yuum gal nu yad ñi. ⁴ Orze' bi guzañ tiem feez ze' wangalagy yu locyuub yum. Orze' despuees mnii tooy: “Mas ya wacchiba lo Ñgyoozh nunu ni waca lagya lo mbecy, ⁵ tees como byud ii wachecam nu ricy seed mi ya, orze' ya locyuubam nu gad gyel fushtiz nim, gun orze' cue' nu zaab cyid lam. Gun benu zaab cyid lam, orze' gyicy mi nu lazh fers ne”, mnii tooy —na Jesuuz.

⁶ Orze' na ga' Jesuuz:

—De ru zuub gyidag der de coz nu mnii feez a' nap ze'. ⁷ Beni, ¿walab gaal wabic Ñgyoozh gyel fushtiz ni de mbecy nu bi pcuim, de mbecy nu dzi rel la rnii num? Walab nu dzi tuñ laam. ⁸ Ya rnee lor nu dzach cuic mi gyel fushtiz ni dey. Tees ornu ya, biñ nu byac mbecy, yapā tuuba' tir, ¿a

gyapa mbecy nu ricy cup consuel lo gyishlombecy ii? —nam.

Riidz tiily ni mbecy fariseo gal nu mbecy nu rboo tiñ por cuen ni gubier Rom

⁹ Orze' mniim tuuba' riidz tiily ii lo la be mbecy nu ricy nu nac mbecy nap, ze' rgüii naañ yu lo de' zir losa'y. ¹⁰ Orze' nam:

—Cyup mbecy guay nañ yu' ze' nu driib zily mbecy Ñgyoozh par nu nii nu dey mi. Tub yu nac yu tub mbecy fariseo. Ze' tuuba'y nac yu tub mbecy nu rboo tiñ por cuen ni gubier Rom.

¹¹ Orze' mbecy fariseo ze' bzuy mnii nuy Ñgyoozh. Orze' nay: “Ñgyoozh, ya rica gras nir, gun ya walab nu na gal nu na de' zir mbecy. A' naca gubaan. A' naca mbecy shiñ ricy. A' naca mbecy nu ricy cyi nu biñ mña. Ni a' naca mbecy nu na gal nu na mbecy ii, yu nu rboo tiñ por cuen ni gubier. ¹² Ya rca ne nu cue' daw gyit cyup tir nañ tub sman par nu rzu bicha nu nac ru. Nunu lo tii coz nu ricya gan, rloo tuub ñi nu drica nir”, nay. ¹³ Tees mbecy nu rboo tiñ por cuen ni gubier ze' zet bzuy. Ni wangelagy yu shes nañ loy nu güiiy par baa, sinu pshet yu lyush yu. Orze' nay: “iÑgyoozh, gushni ñuu lagy ya, gun ya naca mbecy cyi!” nay.

¹⁴ Orze' na ga' Jesuuz:

—Ya rnee lo der nu mbecy nu rboo tiñ por cuen ni gubier ze', Ñgyoozh bicy sulagy mi niy. Orze' yay. Ze' mbecy fariseo ze', Ñgyoozh wangyicy sulagy mi niy. Gun cyu zi'l mbecy nu ricy zily ub yu, yu ze' gruu gyel mbecy niy. Ze' yu nu ricy gyel gyidz ni, yu ze' gyed gyel mbecy niy —nam.

Jesuuz bdiñ mi lo Ñgyoozh ni de yu nguzh mi'

¹⁵ Orze' la be mbecy bru'ña nu dey yu nguzh mi' lo Jesuuz par nu gal yaam dey. Na ornu bzaac de yu nu rsya' lom, orze' brugyi' rdza' dey ni de mbecy nu yad nu de yu nguzh mi' ze'. ¹⁶ Orze' Jesuuz bredz mi dey. Orze' nam rab mi dey:

—Bzaan der nu gyecha' de yu nguzh mi' lo. Cue' niir lo dey nu ruu chuy. Gun lugaar ze' nu riib ic Ñgyoozh, nde' lugaar nu yu' mbecy nu na gal nu na de yu nguzh ii. ¹⁷ Ya rishli rnee lo der nu yu nu wazaan nu gyub ic Ñgyoozh gal nu ricy de yu nguzh ii, orze' wac chu'y ze' nu riib ic mi —nam.

Tub mbecy guani'ñ guay lo Jesuuz

¹⁸ Orze' tub yu nu riib ic lat de mbecy Israeel nay rab yu Jesuuz:

—Masht nap, ¿la ñuu coz rlagy ñi nu gyicya par nu cui mbaña tub la? —nay.

¹⁹ Orze' na Jesuuz rab mi yu:

—¿Lagu rnii ga' ru nu nap ya? Ze' cyu zir nu nap, sinu tub zi la Ñgyoozh. ²⁰ Ru bi rad lagy ru de coz nu rnii Ñgyoozh nu gyicy yac ru. Cue' gal ru mbecy nu wanchelaar. Cue' cut ru losa'r. Cue' gyicy ru gubaan. Cue' riib ru gyidza too losa'r. Pca lagy lo uz ru, nunu pca lagy lo ñaar —nam.

²¹ Orze' yu nu riib ic ze' nay rab yum:

—Dela nde' bi bicy yaca ñi nese miiñ la —nay.

²² Na ornu güeñ mi nde', orze' nam rab mi yu:

—Tees ru ricy falt se tub coz nir nu gyicy ru. Yaa cut ru dela coz nu yu' nir. Gaze' nu tiñ ze' cuic ru ni de mbecy zi. Orze' gyibaa gyad gyel nap nir. Gaze' nu cyid ru cyid car icha —nam.

²³ Tees ornu güeñ mbecy ze' nu ni mnii Jesuuz, orze' tona' la bıcı shniy, gun tona' la guani'ñ yu.

²⁴ Na ornu bzaac Jesuuz nu dzi ricy shniy, orze' nam:

—İDzi ga biigy nu chu' mbecy guani'ñ lat de mbecy nu riib ic Ñgyoozh! ²⁵ A' biigy zir ded tub camey gyeegy gyi' tub gyishtiib, gaze' nu chu' tub mbecy guani'ñ lat de mbecy nu riib ic Ñgyoozh —nam.

²⁶ Orze' de mbecy nu güeñ ze' na dey rab yum:

—Beni, ¿cyu gac gruu mbañ, beni? —na dey.

²⁷ Gaze' nu nam rab mi dey:

—Coz nu wagac gyicy mbecy, tees Ñgyoozh gac gyicy mi ñii —nam.

²⁸ Orze' na Bed rab yum:

—Shuaan de, de ya bzeeñ de dela coz nu yu' ne de nu yap ca de ich ru —nay.

²⁹ Orze' na ga'm rab mi yu:

—Ya rishli rnee lo der nu cyu zi'l mbecy nu bzeeñ la coz ni nu nac gyl gubier ni Ñgyoozh, orze' de yu ze' sheñ zir gyad niy. De yu nu bzeeñ yu', yu nu bzeeñ mña, yu nu bzeeñ bıcı, yu nu bzeeñ uz, yu nu bzeeñ i'ñ, o la zi'l coz nu bzeeñ dey, ³⁰ tees sheñ zir gad niy gyishlombecy ii, nunu tuuba' lo yu ze' gad nu cui mbañ yu tub la —nam.

Mnii ga' Jesuuz nu cut mbecy mi

³¹ Orze' Jesuuz gua nu reñ mi trocyp de yu nu rsya' lom. Orze' nam rab mi dey:

—Na gyan par gyedz Jerusaleeng, gun orze' gyu' niñ ni dela coz nu pcaa de yu nu mnii por cuen ni Ñgyoozh nu gzac ya, biñ nu byac mbecy. ³² Gun gu' dey ya yaa mbecy yad. Nunu de yu ze' gubdzaa

dey ya. Nunu gab zi dey ya. Nunu co yeñ dey lo.
³³ Orze' gaaz dey ya nu quart. Gaze' nu cut dey ya.
Tees ornu za' dzi chon, orze' gyabaña —nam.

³⁴ Orze' de yu ze' rila wangyet lag dey cuen de nu
nde'. Ni wangad lagy dey de coz nu mniim. Tees
de coz ze', nde' coz nu wangac gyet lag dey cuen.

Jesuuz bicy yac mi tub mbecy lo ca'

³⁵ Ornu bi rgaab Jesuuz tub gyedz nu la Jericó,
orze' nez nu zam, ze' zub tub mbecy lo ca' nu
rgyiiñ yu gun. ³⁶ Na ornu güeñ yu nu dzi rded
mbecy zigy loy, orze' bdugyi'y ben la coz rac.
³⁷ Orze' mnii dey nu Jesuuz, biñ nu bruu Nazaret,
yad mi lugaar ze'. ³⁸ Orze' brugyi' rbish tiy. Orze'
nay:

—¡Jesuuz, nez Dabi, gushni ñuu lagya! —nay.

³⁹ Orze' de mbecy nu yad lo bdza' dey niy, gun
orze' gariy. Tees orze' rbish ti ga' zir yu. Orze' na
ga'y:

—¡Jesuuz, nez Dabi, gushni ñuu lagya! —nay.

⁴⁰ Gaze' nu gusum. Orze' mniim lo dey nu cha
tee dey lo ca ze'. Na ornu bru'ñay lom na, orze'
nam rab mi yu:

⁴¹ —¿La coz rlagy ru gyicy dū ru? —nam.

Orze' na lo ca' ze' rab yum:

—Shuaana, rlagya nu zac nap la —nay.

⁴² Orze' na Jesuuz rab mi yu:

—¡Na gac gzac ru! Byac ru nu nac nu bicy cup ru
consuel lo —nam.

⁴³ Orze' laab or la ze' lo ca' ze' brugyi' rzac yu.
Orze' za cay ich Jesuuz, nunu ryabic yu gyel mbecy
ni Ñgyoozh. Nunu ni' zi'l dela mbecy nu bzaac de
coz nu guc ze' ryabic dey gyel mbecy ni Ñgyoozh.

19

Jesuuz bdzeel mi Zaqueo

¹ Orze' Jesuuz gu'm gyedz Jericó. Orze' brugyi' nu rded mi gyedz ze'. ² Laab gyedz ze' zu tub mbecy nu la Zaqueo. Yu ze' riib ic yu de mbecy nu rboo tiñ por cuen ni gubier Rom. Nunu tona' la guani'ñ yu. ³ Orze' yu ze' rlagy yu zac yu Jesuuz, tees wangac gun dzi yu' mbecy. Nunu Zaqueo dzi shub yu. ⁴ Nde' nu gush yu carer zay par lo. Orze' par nu rlagy yu gad mod nu gzac yum, orze' gup yu lo tub yag garee ze' nu ded mi. ⁵ Na ornu bded Jesuuz gyi' yag ze', orze' pshes nañ lom bgüim par ic. Orze' nam:

—Zaqueo, dzach ru bet, gun na rlagyā gyeche yu'r —nam.

⁶ Orze' Zaqueo dzach bet yu. Orze' dub gal rii la lagy yu mniiy nu gyam yu'y. ⁷ Na ornu bzaac de mbecy na, orze' dela dey brugyi' rnii zi dey ni Jesuuz. Orze' mnii dey nu a' nap ricy mi, gun cyiiñ mi lo tub mbecy cyi. ⁸ Orze' Zaqueo wes suy. Orze' nay rab yu Shuaan na Jesuuz:

—Shuaana, lo dela coz nu yu' ne, ya grica cyaal ni de mbecy zi, nunu benu ya bicy gubaana coz ni ca na tub mbecy, orze' tap tant gyabica niy —nay.

⁹ Orze' na Jesuuz:

—Dzi na gruu mbañ de mbecy nu yu' yu' ii. Nunu gaza' mbecy ii nac yu nez Abraham. ¹⁰ Gun ya, biñ nu byac mbecy, yapa gyishlombecy par nu yuba de mbecy nu bdune', nunu par nu gloo mbañā dey —nam.

Riidz tiily ni tiñ

¹¹ Orze' de mbecy ze' rzuub gyidag dey de coz nu rnii Jesuuz. Orze' brugyi' rniim tub riidz tiily lo dey, gun lugaar ze' gaab ga Jerusaleeng, nunu de mbecy ze' mnii too dey nu laab or la ze' cyid gyel gubier ni Ñgyoozh. ¹² Orze' nam rab mi dey:

—Bzu tub mbecy. Orze' yu ze' famil ni rey. Orze' mbecy ze' bruu y zay tub lugaar zet. Zay gashtal tuuba' nasyoong par nu gac yu rey ni de mbecy nu yu' lugaar ze'. Orze' grii ga'y ledz yu ze' nu bruu y. ¹³ Orze' anzir nu chay, orze' bredz yu tii moz niy. Orze' bzeen yu tub nac gaa la tiñ yaa tub ga dey. Orze' nay rab yu dey: “Gyicy der daljez nu de tiñ nu brica ni der ii gal shuub la dzi nu cush cyā tuuba' tir”, nay rab yu de moz niy. ¹⁴ Na lugaar ze' nu zay nu gac yu rey ze', de mbecy ze' wangyet lagy dey yu. Orze' bzuu nez dey la be mbecy nu chay lo rey ze' nu cha niy: “De ya walagy de nu mbecy ii gac yu rey ne de”, na dey.

¹⁵ Tees yu ze' gu'y nu gac yu rey. Gaze' nu bish cya ga'y briy ledz yu. Na ornu briy na, orze' bredz yu de moz niy, de yu nu bzeen yu tiñ yaa ze', par nu gad lagy yu la be bicy tub ga dey gan. ¹⁶ Orze' bru'ña mbecy loga la. Orze' nay: “Tiñ nu bzeen ru lo, nde' byañ ñii. Byac ñi tii tant”, nay. ¹⁷ Orze' rey ze' nay rab yuy: “Nap tona' la bicy ru. Ru nac ru tub moz nap. Par nu ru bicy paar nur ñumiiñ, orze' nde' nu gyicyā nu ru gyub ic ru tii gyedz”, na rey ze'. ¹⁸ Orze' bru'ña tuuba'y. Orze' nay: “Shuaana, byañ tiñ nir. Byac ñi gaay tant”, nay. ¹⁹ Orze' na rey ze' rab yu moz niy: “Ya gyicyā nu ru gyub ic ru gaay gyedz”, nay.

²⁰ Orze' bru'ña tuuba'y. Orze' nay: “Shuaana, ii

yap du tiñ nir. Bdu' choowa ñii nañ tub bay. ²¹ Gun ya gudziba lor, gun ru nac ru mbecy cyigy lardoo, gun ru gyash ru coz nu walab nir, nunu ru rte'r ze' nu walab ru rnuuz ru”, nay. ²² Orze' rey ze' nay: “Moz a' nap, nu nac riidz nu rniir ya nee nu yu' falt nir. Benu rad lagy ru nu naca mbecy cyigy lardoo, benu rad lagy ru nu gyasha coz nu walab ne, benu rad lagy ru nu rte' ze' nu walaba mnuuza, ²³ ¿orze' lagu wancha nur tiñ ne nañ banc? Orze' ornu ya nrī yu', orze' ñgyabic ru ne nu i'ñ ñi”, na rey ze'. ²⁴ Orze' na ga' rey ze' rab yu de' zir mbecy nu yu' lugaar ze': “Bloo der tiñ niy. Orze' briic der ñii ni yu nu bicy gan tii tant”, nay. ²⁵ Orze' na dey: “Shuaan de, yu ze' bi ricy cup yu tii tant”, na dey. ²⁶ Orze' na rey ze' rab yu dey: “Tees ya rnee lo der nu yu nu ricy cup sheñ, sheñ zir gad niy. Tees yu nu sac ni, gashtal coz miiñ nu ricy cup yu gruuñ niy. ²⁷ Na de losa' yuu, de yu nu wangalagy nu gaca rey ni ze', da nu der yu ii. Orze' biit der yu ii lo rgüi la”, nay —na Jesuuz.

Jesuuz gu'm Jerusaleeng

²⁸ Na ornu blazh mniim de coz ze' na, orze' gush neza'm zam par Jerusaleeng. ²⁹ Orze' bru'ñam tub lugaar gaab ga tub gyedz nu la Betfagé nu tuuba' gyedz nu la Betania. Lugaar ze' gaab ga bicy ni Ya Oliva. Orze' ze' bzuu nez mi cyup de yu nu rnya' lom nu cha ga dey lom. ³⁰ Orze' nam rab mi dey:

—Gua der gal gyedz mi' nu ri par lo ze'. Orze' ornu gru'ña der lugaar ze', orze' gyap der tub bur ca cuñ ma, bañ nu nigul gyub la mbecy. Orze' shaagy der ma. Gaze' nu cyid nu der ma. ³¹ Benu ca na mbecy niy lo der: “¿Lagu rshaagy der bur

ze'?" niyy, orze' nii der, "Shuaan na cyiiñ ma nim", nii der —nam.

³² Orze' de yu nu rsya' lom gua dey, nunu byap dey bur ze' gal nu mnii Jesuuz. ³³ Na lat nu rshaagy dey bur ze', orze' na yu nu guni ma rab yu dey:

—¿Lagu rshaagy der bur ze'? —nay.

³⁴ Orze' de yu ze' nay:

—Shuaana cyiiñ ma nim. Nde' nu rshaagy de ma —na dey.

³⁵ Orze' gaze' nu za nu dey ma lo Jesuuz. Gaze' nu briib dey shab yu ich ma. Orze' pshup dey mi ich ma. ³⁶ Orze' lat nu zaab za lam, orze' de mbecy rcuaa dey shab yu nez nu zam. ³⁷ Na ornu bru'ñam gaab ga ze' nu gyet nez par gyi' bicy ni Ya Oliva, orze' dela mbecy nu za ca ich mi brugyi' nu rbish ti dey nu yet lagy yu. Nunu ii ryabic dey gyel mbecy ni Ñgyoozh nu nac de nusuriidz nu bzaac dey nu bicy mi. ³⁸ Orze' na dey:

—¡Dzi ni biñ nu bzuu nez Ñgyoozh nu gac rey ni den! ¡Dela anc nu yu' gyibaa nap zu lagy dey! ¡Rlagy ñi gyabic den gyel mbecy ni Ñgyoozh, biñ nu gya zir zu! —na dey.

³⁹ Orze' la be mbecy fariseo nu yu' lat de mbecy zigy ze' na dey rab yu Jesuuz:

—Masht, bdza' ni de mbecy nu yad ca ich ru —na dey.

⁴⁰ Orze' nam rab mi dey:

—Ya nee lo der nu benu de yu ii gari dey nu cush tiy, orze' gashtal de gyita' ii cush tiñ —nam.

⁴¹ Na ornu bi rgaab rim Jerusaleeng, orze' bgüim par lat gyedz. Orze' ruun mi nu nac de mbecy ze'. ⁴² Orze' nam:

—¡Dzi ga nap bicy na nu ru gyet lag ru cuen ni de riidz nu cuic gyel ri zu dzi na! Tees wagyet lag ru cuen ni de riidz ze'. Orze' wac zac ru gyel ri zu. ⁴³ Na cyid tub dzi nu gri lo' de losa' yuur. Orze' soow dey dela nez nu ruu der. Orze' dub yub la shet yaa dey ru. ⁴⁴ Orze' gnit lo za' la dey ru. Cut dey de mbecy ledz ru. Nunu ni tub gyita' wazeeña' dey ñi too losa'ñ. Ni zac ru, gun wancu' lor Ñgyoozh ornu biid mi nu co mbañ mi ru —na Jesuuz.

Jesuuz bzu nap mi yu' nu driib zily de mbecy Israeel Ñgyoozh

⁴⁵ Na ornu blazh nde' na, orze' gaze' nu gu' Jesuuz nañ yu' nu driib zily mbecy Israeel Ñgyoozh. Orze' brugyi' rboom de mbecy nu nguaa rut nañ yu' ze'. ⁴⁶ Orze' nam rab mi dey:

—Lat de riidz ni Ñgyoozh rniiñ: “Yu' ne gru lañ yu' nu gnii nu mbecy ya. Ze' de ru ricy der ñii nu nañ gal na tub blyuu ni gubaan”, rniiñ —nam.

⁴⁷ Orze' de dzi la Jesuuz rlyuum ni de mbecy nañ yu' nu driib zily dey Ñgyoozh. Orze' de yu zub lo ni uz, gal nu de yu nu rlyuu leey, gal nu de yu zub lo ni de mbecy gyedz, gusa dey nu ryub dey lac mod cut dey mi. ⁴⁸ Tees wangad mod nu ni ñgyicy dey, gun dela mbecy nap rzuub gyidag dey ni de coz nu rniim.

20

De mbecy bdugyi'y lo Jesuuz ca bloom rishbeey

¹ Tub dzi Jesuuz rim nañ yu' nu driib zily mbecy Ñgyoozh. Rlyuum ni de mbecy nunu rshaal mi de riidz nu rbic gyel mbañ. Gaze' nu bru'ña de yu nu

riib ic de uz, nu de yu nu rlyuu leey ni Ñgyoozh, gal nu de yu bel ni de mbecy Israeel. ²Gaze' nu na dey rab yum:

—¿La na rishbeey ricy cup ru nu ricy ru de coz ii? ¿Cyu briic rishbeey ze' nir? —na dey.

³Orze' na ga' Jesuuz:

—Ni' zi'l ya dugyi' ga' tub coz lo der. Mnii lo: ⁴¿Cyu bzuu nez Waa nu guay briib nis yu mbecy? ¿A Ñgyoozh bzuu nez mi yu, uti mbecy? —nam.

⁵Orze' brugyi' nu ro dey riidz nu losa'y. Orze' na dey: “Benu niin nu Ñgyoozh bzuu nez mi yu biid yu, orze' niy: ¿Lagu wancheña lagy der de riidz nu mniiy, beni?, niy. ⁶Nunu wac niin nu mbecy bzuu nez dey yu, gun dzi ga cut mbecy de ub na nu gyita', gun dela dey rzu fert dey nu Waa mniiy por cuen ni Ñgyoozh”, na dey. ⁷Orze' nde' nu mnii dey nu wangad lagy dey cyu bzuu nez Waa nu griib nis yu mbecy. ⁸Orze' Jesuuz nam rab mi dey:

—Benu ni, ni' ya waneë la rishbeey ricy cupa nu ricya de nu nii —nam.

Riidz tiily ni moz a' nap

⁹Gaze' nu lueg la Jesuuz brugyi' rniim nu riidz tiily lo de mbecy. Orze' nam rab mi dey:

—Bzu tub mbecy nu mnuuz tub nac lyucy urbyay. Gaze' nu briic yu nu nde' par coz cyaal ni tuuba' mbecy. Gaze' nu gush nez yu zay byaj tuñ tiem. ¹⁰Na ornu byap tiem nu dulag urbyay ze' na, orze' bzuu nez yu tub moz niy lo de yu nu gush coz cyaal ze' par nu cha gyiy ca na de coz nu bruu lo de lyucy urbyay ze', ca na nu dugyi. Tees de yu ze' bgaaaz dey moz ze' nunu dzi lay bzuu nez dey yu yay. ¹¹Orze' gaze' nu yu nu guni lyucy urbyay

ze' bzeed yu tuuba' moz niy. Tees ni' zi'l yu ze' mnii zi dey niy, nunu bgaaz dey yu, nunu ni' zi'l dzi lay bzuu nez dey yu yay. ¹² Gaze' nu bzeeda' yu nu guni lyucy urbyay ze' tuuba' moz. Orze' yu ze' pcad güii dey yu, nunu bloo dey yu lat lyucy urbyay ze'.

¹³ 'Laab nde' la, orze' na yu nu guni lyucy urbyay ze': "Ze' na, ¿lac gyicya? Orze' ya zeeda i'ñā nu dzi rca nu chay lo dey. Ca gaal lagy dey loy, gun yu re i'ñā", nay. ¹⁴ Tees ornu de yu ze' bzaac dey i'ñ yu nu guni lyucy urbyay ze', orze' na dey rab yu losa'y: "Yu re gyeñ nuy gyel nap ni uz yu. Yaa der chan dut nay, gun orze' gyeñ gyel nap ze' ni den", na dey. ¹⁵ Orze' bdu' yaa dey yu ze'. Bloo dey yu lat lyucy urbyay ze'. Orze' biit dey yu.

'¿Na lac gyicy yu nu guni lyucy urbyay ze' nu de yu nu mnuuz coz cyaal ze' rsa' lagy der? ¹⁶ Na chay cut yu dela yu nu mnuuz coz cyaal ze'. Orze' zeeñ yu lyucy urbyay ze' yaa reña' mbecy —nam rab mi dey.

Na ornu güeñ dey de coz nu mniim ze', orze' na dey:

—¡Cue' nu ni gac ñii! —na dey.

¹⁷ Orze' Jesuuz bgüiim lo dey. Orze' nam rab mi dey:

—Beni lac mod yaruu de riidz ni Ñgyoozh ze' nu rniñ:

Gyita' nu mne' biryu,

byac ñi gyita' nu ricy zir ñi presis

rniñ. ¹⁸ Cyu zi'l mbecy nu gyes saa lo gyita' ze', orze' gzug lay. Ze' benu gyita' ze' gyet lag ñi too ca na mbecy, orze' gyagyez la mbecy ze' —nam.

¹⁹ Orze' de uz zub lo gal nu de yu nu rlyuu leey ni Ñgyoozh ngulagy dey ngu' yaa dey Jesuuz laab or la ze', gun gud lagy dey nu lo dey pcaam ornu mniim riidz tiily ze'. Tees wancu' yaa dey mi, gun rdzib dey lo de mbecy.

Riidz ni tiñ nu rte' mbecy por cuen ni gubier

²⁰ Orze' psiiñ dey ni Jesuuz. Orze' bzuu nez dey la be mbecy nu chay lom. Orze' mbecy ze' bicy dey tub mod nap par lo Jesuuz, tees gal nu bdu' cuen zi'l dey mi ben a wad mod nu gu' dey mi yaa de yu nu riib ic por cuen ni gubier. ²¹ Orze' na dey rab yum:

—Masht, de ya rad lagy de nu de coz nu rniir gal nu de coz nu rlyuur, nde' coz rishli, nunu wagyicy cuen ru la na tub ga mbecy, sinu rlyuur mod nu rlagy Ñgyoozh nu chu' den nu rishli. ²² ¿A gruu nap ñi nu griib den tiñ nu rbic dey ni yu nu riib ic de nasyoong, uti waruu nap ñi? —na dey.

²³ Tees Jesuuz bi gud lagy mi nu walab nu du-tuub la lardoo dey rniiy lom. ²⁴ Orze' nam rab mi dey:

—Blyuu der tub tiñ lo. ¿Cyu nab ca lo tiñ ii? Nunu ¿cyu nu la ca looñ? —nam.

Orze' na dey:

—Lo César, yu nu riib ic de nasyoong, gal nu nu lay —na dey.

²⁵ Gaze' nu nam rab mi dey:

—Briic der ni yu nu riib ic de nasyoong coz nu nac niy. Nunu briica' der ni Ñgyoozh coz nu nac nim —nam.

²⁶ Orze' wangad mod nu riib dey cyi ic mi nu nac de coz nu mniim lo dela mbecy, sinu se za nu zi'l ic dey yu'y. Orze' wannii ga' la dey.

Lac mod chu' mbecy ornu bi gut yu

²⁷ Gaze' nu gua la be mbecy saduceo gua güii dey Jesuuz. Na de mbecy saduceo rnii dey nu ornu gat mbecy, orze' wayabañ dey. Orze' nde' nu bdugyi' dey lo Jesuuz. Orze' na dey rab yum:

²⁸ —Masht, Moisees pcaay par dela den nu benu tub mbecy gat bicy yu, nunu zeeñ yu mñaay, ze' sac i'ñ mi, orze' mbecy ze' rlagy ñi chelaay mñaay bicy yu nu gut ze' par nu cuic yu i'ñ mi por cuen ni bicy yu yu nu gut ze', na Moisees. ²⁹ Orze' bzu gagy mbecy nuy bicy yu. Orze' yu loga la guud mñaay. Orze' gut yu nunu wangyeeñ i'ñ yu ni mñaay. ³⁰ Orze' yu cyup ze' pchelaay ga'y mi. Orze' ni' zi'l guta'y, nunu wangyeeñ i'ñ yu ni biñ mñaay ze'. ³¹ Orze' ni' zi'l yu chon pchelaay ga'y nu biñ mñaay ze'. Orze' za' gagy laa dey pchelaay mi. Tees wangyeeñ i'ñ ni tub la dey nim. ³² Laab nde' la, orze' biñ mñaay ze' guta'm. ³³ Na ornu shuub dzi nu gyabañ de mbecy gut, ¿ca na dey ze' gac mñaay biñ mñaay ze'? Gun za' gagy laa dey pchelaay mi —na dey.

³⁴ Orze' na Jesuuz rab mi dey:

—Gyishlombecy ii de yu gyeey, nu de biñ mñaay rchelaay dey losa'y. ³⁵ Tees de yu gyeey nu de biñ mñaay nu yad ñi nu gyabañ gri dey tuuba' lo yu, de yu ze' wachelaay ga' dey. ³⁶ Gun orze' wata' dey, sinu chu' dey gal nu yu' de anc, nunu gyac dey i'ñ Ñgyoozh nu nac nu gyabañ dey. ³⁷ Gun laab Moisees bicy yu nu bi gud lagy na nu gyabañ de

mbecy nu bi gut lat de riidz nu bzeen yu ni yag nu rca gyi ze'. Lat de riidz ze' mnii Moisees nu Shuaan na nac mi Ñgyoozh ni Abraham, nac mi Ñgyoozh ni Isaac, nunu nac mi Ñgyoozh ni Jacob, rniiñ. ³⁸ Gun Ñgyoozh a' nac mi Ñgyoozh ni mbecy nu bi bya' lo la, sinu nac mi Ñgyoozh ni mbecy nu gabee zu, gun par mi ze' dela mbecy gabee zu dey —na Jesuuz.

³⁹ Orze' la be de mbecy nu rlyuu leey ni Ñgyoozh nu yu' ze' na dey:

—Masht, tona' la nap mniir —na dey.

⁴⁰ Gun wancuica' dey baloor nu ngugyi' zir yu lom.

Cyu nez nac Mesías

⁴¹ Orze' Jesuuz nam rab mi dey:

—¿Lagu rnii dey nu Mesías, biñ nu ca lo cuen nu cyid, gruum lat nez Dabi? ⁴² Gun laab Dabi mniiy tub riidz lo libr ni Salmos. Orze' nay:

Ñgyoozh nam rab mi Shuaana,
Gzub ru lugaar ni mbecy nu gya zir zu, par yaa beē
ii,

⁴³ Gashtal gyicy la nu gyicy ru gan losa' yuur, nam, na Dabi. ⁴⁴ Orze' ¿lac mod gruu Mesías lat nez Dabi, benu ub la Dabi rniiy rab yum: “Shuaana”, rniiy?

Jesuuz mniim nu gyicy cuidad dey nu de mbecy nu rlyuu leey

⁴⁵ Orze' dela de mbecy yu' dey rzuub gyidag yu ni Jesuuz. Orze' nam rab mi de yu nu rsya' lom:

⁴⁶ —Cuidad der nu de mbecy nu rlyuu leey ni Ñgyoozh. Gun de yu ze' yet lagy dey chesay nu shab duñ yu, nunu yet lagy dey nu rca lagy mbecy loy ornu rnii nu dey yu lat yagyi'. Nunu gusht ni dey

nu gzub yu lo yashily ni de mbecy nu ricy ñi presis nañ yu' nu rsya' mbecy riidz ni Ñgyoozh. Nunu yet lagy dey lugaar ni de mbecy lily ze' nu yu' sa'.
⁴⁷ Tees rboo dey yu' byud. Orze' par nu rsoow su dey lo de coz a' nap nu ricy nu dey byud ze', orze' chi rnii nu dey Ñgyoozh. Nde' nu cashtig ily zir gad ni dey —nam.

21

Gun nu briic tub byud

¹ Orze' Jesuuz zum rgüim lo de mbecy guaniñ lat nu rgu' dey tiñ gun nañ alcansi. ² Gaze' nu bzaac mi nu pshet lag tub byud nu dzi gyel zi zu cyup sentab mi' nañ alcansi ze'. ³ Orze' nam:

—Ya rishli rnee lo der nu byud re mas gyel zi zum, tees sheñ zir briic mi gaze' de' zir mbecy.
⁴ Gun dela mbecy rbic yu tiñ nu drusub zi'l niy. Ze' byud re gyel zi zum. Tees briic mi dela tiñ nu rcyiñ nim par nu cui mbañ mi —na Jesuuz.

Jesuuz mniim nu dudily yu' nu driib zily mbecy Ñgyoozh

⁵ Orze' la be de yu nu rsya' lo Jesuuz ro dey riidz nu losa'y nu nac yu' nu driib zily mbecy Ñgyoozh. Rnii dey nu tona' la cyit na de gyita' nu gup ñi, nunu rnii ga' dey nu cyit na lo gyita' nu bdudii nu gun nu briic mbecy. Orze' na Jesuuz rab mi dey:

⁶ —Shuub tub dzi nu de yu' nu rzac der ii dudily ñi. Ni tub gyita' wayeñ ñi too losa'ñ, sinu delañ nit loñ —nam.

Jesuuz mniim lac mod gad lagy mbecy ornu shuub dzi ni gyishlombecy

⁷ Orze' de yu nu rsya' lom bdugyi' dey lom. Orze' na dey rab yum:

—Masht, mnii lo de. ¿Gul gac de coz nu mniir ze'? Nunu ¿la na miesht gruu zac ornu bi zuu lañ nu gac de coz ze'? —na dey.

⁸ Orze' na Jesuuz rab mi dey:

—Bzu der cuidad nis guu mbecy der, gun tona' la zigy mbecy gruu zac yu nu gash yu nu la. Nii dey nu “Ya naca mi ze'”, niiy. Nunu nii ga' dey nu “Na bi pshuub tiem”, niiy. Tees cue' cha ca der ich yu. ⁹ Na ornu gyeñ der nu yu' gyel yuu, orze' cue' dzib der, gun nde' coz nu rlagy ñi nu gac nu loga la. Mas ni, tees walab nu bi pshuub la dzi ze' —nam.

¹⁰ Orze' na ga'm:

—Gun tub nac mbecy chu'y gyel yuu nu tub naca' mbecy. Nunu tub gubier chu'y gyel yuu nu tuuba' gubier. ¹¹ Grib duru ily. Nunu cyid cubiñ. Nunu chu' güii zañ lugaar ni gyishlombecy. Nunu baa gruu zac coz nu dzib mbecy. Nunu tona' la miesht ily gruu zac.

¹² Tees anzir nu gac de coz ze', orze' shet yaa dey de ru. Nunu shet zi dey der. Orze' cha nu dey der nañ yu' nu rsya' de mbecy riidz ni Ñgyoozh. Orze' ze' gri bee dey ni der. Gaze' nu ne' dey der nañ yu' gyiib. Nunu cu' cyi dey der lo yu nu riib ic por cuen ni gubier gal nu lo de rey nu nac ya. ¹³ Gun orze' gad mod nu gzat der ya lo dey. ¹⁴ Orze' bicy der tub mod nu cue' zu lily der ben lac mod niir anzir nu char lo dey. ¹⁵ Gun ya grica riidz nu gnii der. Orze' par nu dzi nap gnii der, orze' rila wad mod nu gnii de losa' yuu der nu walab ni gal nu nii der. ¹⁶ Tees zigy mbecy cush cya dey ich der. Gaza' uz der, nu

bicy ru, nu de famil ni der, nu de amig nir, dela de yu ze' cush cya dey ich ru. Orze' cut dey ca na de ru. ¹⁷ Nunu dela mbecy gazi lagy dey lo der nu nac ya. ¹⁸ Tees de ru ni tub gyich too der wadune'ñ. ¹⁹ Orze' bzu fert der, gun orze' ni mod gad nu gruu mbañ der.

²⁰ 'Ornu gzac der nu dub yub la ru' gyedz Jerusaleeng bi bri lo' soldad, orze' gad lagy der nu sñuu ga gnit loñ. ²¹ Orze' de yu nu yu' lo yu ni Judea, rlagy ñi nu ruu chu dey par logyi'. Nunu de yu nu yu' lat gyedz Jerusaleeng rlagy ñi nu ruu dey lat gyedz ze'. Ze' de yu nu ricy riiñ lat naa walagy ñi nu gyay par lat gyedz. ²² Gun tiem ze', nde' tub tiem nu cuic Ñgyoozh cashtig, gun orze' gyu' niñ gal nu bi cañ lat de riidz ni Ñgyoozh. ²³ ¡Cuaa de biñ mñaan nu segyi zu tiem ze'! Nunu, ¡cuaa ga' de biñ nu rgaagy mdoo tiem ze'! Gun tona' la gzac zi mbecy lugaar ii. Nunu Ñgyoozh tona' la cashtig ily cuic mi ni de mbecy ii. ²⁴ Yu' mbecy nu gat nu mandzicy. Nunu yu' ga' mbecy nu cha nu dey pres de ga la ze' ni gyishlombecy. Orze' de mbecy nu walab mbecy Israeel gzuub gyi' dey gyedz Jerusaleeng gal shuub la dzi nu gya' lo tiem nu briic Ñgyoozh ni dey.

Cyid Jesuuz tuuba' tir

²⁵ 'Orze' gruu zac muesht lo doo, nu lo beey, gal nu lo de bel nu ta' baa. Nunu dela mbecy nu yu' lo yu lazh la consuel ni dey. Nunu dzib dey nu dzi siigy nisyudoo gal nu de nguuly loñ. ²⁶ Orze' de mbecy csuun ñi dey nu dzib dey ornu gash dey shcab de coz nu gac gyishlombecy. Nunu gashtal dela fers nu nash baa cueñ ñii. ²⁷ Orze' gaze' nu

gzac dey ya biñ nu byac mbecy yapa lat za. Gzac dey nu gac gyicya coz ily. Nunu tona' la lily na. ²⁸ Ornu cugyi' nu gac dela coz ze', orze' briic der baloor, nunu pshes nañ too der, gun sñuu ga bi gla der lo de coz a' nap —nam.

²⁹ Orze' gaze' nu Jesuuz mniim tub riidz tiily lo dey. Orze' nam:

—Bdu' cuen der mod nu ricy ya las o ca zi'l na yag. ³⁰ Ornu bi rga'ñ nu driib lyag niñ, orze' de ru bi rad lagy der nu bi yad tiem zig. ³¹ Orze' ni' zi'l mod, ornu gzac der nu gac de coz ze', orze' gad lagy der nu sñuu ga cyid gyel gubier ni Ñgyoozh.

³² 'Ya rishli rnee lo der nu dela coz ze' gac ñii anzir nu gat dela mbecy nu yu' tiem ze'. ³³ Baa nuñ gyishlombecy ii, delañ ded niñ, tees riidz nu ya rnee, nde' rila waded niñ.

³⁴ 'Bicy cuidad der nis zaan der nu gyacyigy lardoo der nu nac de bis, nu nac nu gzugy der, nu nac nu sug ic der, nu nac coz ni gyishlombecy ii. Gun orze' sij zi'l gruu zac dzi ze' ³⁵ gal nu ricy tub caa. Gun gruu zac ñi lo dela mbecy nu yu' gyishlombecy. ³⁶ Orze' bzu der altant, nunu mnii nu der Ñgyoozh dub laa tiem, gun orze' gad tub mod nu cue' gzac der lo dela coz nu gac ze', nunu orze' gac gyecha' der lo ya, biñ nu byac mbecy —nam.

³⁷ Orze' Jesuuz rlyuum ni de mbecy orwi doo nañ yu' nu driib zily dey Ñgyoozh. Ze' or yecheñ, orze' rzam too bicy nu la bicy ni Ya Oliva. ³⁸ Orze' ornu rza' yu, orze' dela mbecy rza dey nañ yu' nu driib zily dey Ñgyoozh par nu rzuub gyidag dey de coz nu rniim.

22

Mbecy bloo ic dey lac mod cut dey Jesuuz

¹ Orze' tiem ze' bi rgaab chu' sa' nu gow dey gyishtily nu sac lebadur. Sa' ze', nde' rnii dey sa' ni Pas. ² Orze' de uz zub lo, gal nu de yu nu rlyuu leey ni Ñgyoozh ryub dey mod nu cut dey Jesuuz, tees rdzib dey lo mbecy.

³ Orze' nuras gu'y nañ lardoo Judas, tub yu nu bruu laab lat de trocyup yu nu bloo sum ze'. Yu ze' lay Judas Iscariote. ⁴ Orze' yu ze' guay lo de uz zub lo, gal nu lo de yu nu riib ic nañ yu' nu driib zily mbecy Ñgyoozh. Orze' mniiy lo dey nu lac mod gyicy yu nu gu'y Jesuuz yaa dey. ⁵ Orze' de yu ze' tona' la bet lagy dey. Orze' mnii dey nu cyish dey tiñ ni Judas. ⁶ Orze' Judas “O” nay. Orze' brugyi' ryub yu tub mod nu nap nu gu'y Jesuuz yaa de yu nu rzi lagy lom. Byub yu tub mod nu cue' nu gad lagy de mbecy zigy.

Jesuuz bzeen mi mod nu gow nu dey losa'y

⁷ Orze' pshuub dzi ni sa' nu row dey gyishtily nu sac lebadur. Dzi ze' rut dey shily ni sa' ni Pas.

⁸ Orze' bzuu nez mi Bed nu Waa nu cha dey tub riiñ. Orze' nam rab mi dey:

—Gua der gun zu lily ru nu gyicy den che ni sa' ni Pas —nam rab mi dey.

⁹ Orze' na dey rab yum:

—¿Carlagy ru nu cha de nu gzu lily de? —na dey.

¹⁰ Orze' nam rab mi dey:

—Ornu chu' der lat gyedz, orze' ze' dzeel der tub mbecy nu ya nu tub re' nis. Orze' ich yu ze' cha ca der gal grii lay yu' ze' nu chu'y. ¹¹ Orze' niir gab

ru shuaan yu' ze': "Masht mniim nu yap tugyⁱ lor ben ca na cuart nu gow mi gyit nu gyicy mi che ni sa' ni Pas nu de ya, mbecy nu rsysa' lom", niir. ¹² Orze' gaze' nu yu ze' lyuuy tub cuart ily nu zub gya. Orze' ze' bi nguaa dela coz nu cyiiñ nañ ñi. Orze' ze' zu ye der nu dow den comid ni sa' ni Pas —nam rab mi dey.

¹³ Gaze' nu de yu ze' gua dey lat gyedz. Orze' bzaac dey nu guc ñi gal nu mnii Jesuuz. Orze' ze' bzu ye dey nu gyicy dey che ni sa' ni Pas.

¹⁴ Na ornu byap or nu gyicy mi che na, orze' gusub mi lo mez nu de aposht nim. ¹⁵ Orze' nam rab mi dey:

—Y^a tona' la rlagya nu gyicy d^u de ru che ni sa' ni Pas ii anzir nu ya gata! ¹⁶ Ya rne^e lo der nu ya rila wayica' che d^u de ru gashtal shuub la dzi nu gyicya ñii mod nu rlagy ñi ze' nu riib ic Ñgyoozh —nam.

¹⁷ Gaze' nu gush mi tub taz. Orze' brugyi' rbic mi gras ni Ñgyoozh nu nac ñii. Orze' nam rab mi de yu nu rsysa' lom:

—Gush der nu nii, nunu briic der nu go' tub ga losa'r. ¹⁸ Ya rishli rne^e lo der nu rila wado' ga' ñup ni urbyay gal do' la ñup cub ze' nu riib ic Ñgyoozh —nam.

¹⁹ Gaze' nu gusha'm tub gyishtily. Orze' briic mi gras ni Ñgyoozh nu nac ñii. Gaze' nu blew mi ñii briic mi ni dey. Orze' nam rab mi dey:

—Nii cuerp ne nu ric^a nu gat par nu gruu mbañ der. Mod ii gyicy der par nu gyeza' lagy der ya —nam.

²⁰ Orze' ornu blazh nu bdow dey, orze' ni' zi'l bicy mi nu tub taz ñup urbyay. Orze' nam rab mi dey:

—Nii tub trat cub nu gyicy Ñgyoozh nu de mbecy nu nac nu shu reñā. Nunu shu reñā par nu gruu mbañ de ru. ²¹ Tees laab lo mez nu zuba ii na, zub yu nu cush cya ichā. ²² Tees ya, biñ nu byac mbecy, gata, gun nde' coz nu rlagy Ñgyoozh nu gzaca. Tees jcuaa yu nu cush cya ichā!

²³ Orze' de yu nu rsya' lom brugyi' nu rgugyi' dey lo losa'y ben ca na dey cush cyay ich mi.

Cyuyu nu gya zir zu

²⁴ Orze' de yu nu rsya' lom bee dey riidz nu losa'y ben ca na yu nu gya zir zu. ²⁵ Orze' na Jesuuz rab mi dey:

—Lat de mbecy nu a' yu' lo Ñgyoozh, de rey ricy yu mandaar de mbecy ledz yu, nunu rnii dey “Patroo” par mbecy nu ricy mandaar, rnii dey. ²⁶ Tees lat de ru walab ni mod rlagy ñi gyicy der, sinu lat de ru yu nu gya zir zu gal gaa la zuy nu de yu feñ. Nunu yu nu riib ic rlagy ñi gyicy yu gal nu ricy de moz. ²⁷ Orze' ¿ca na yu nu gya zir zu: yu nu gzub lo mez o ti yu nu csaa gya'n? Yu nu gzub lo mez, yu ze' gya zir zuy. Tees ya rdeda lat der rzu bicha nu nac der.

²⁸ De ru guc nur ya lat nu bzac deeta. ²⁹ Nde' nu ya gyicya nu gyub ic de ru gal nu gyicy Ñgyoozh nu gyub ic ya. ³⁰ Nunu de ru gow der gyit nunu go' der nis ze' nu gyub ica. Nunu gzub der lo yashily nu gri bee der ni trocyup nac nez mbecy Israeel —nam.

Jesuuz mniim nu ne' Bed mi

³¹ Gaze' nu nam rab mi Simoo:

—Simoo, nuras bdiñ yu rishbeey nu gyicy yu preb de ru. Cyib yu der gal nu rgyib dey trig.

³² Tees ya mnishbaa lo Ñgyoozh nu nac ru, gun orze' cue' nu checar nu gyicy cup ru consuel lo. Nunu ru ornu cush cyar lo, orze' locyuub ru de' zir de bicy ru nu fert zir gyicy cup dey consuel lo —nam.

³³ Orze' Simoo nay rab yum:

—Shuaana, ya bi zu la ca na nu zu. Cha du ru nañ yu' gyiib. Mas gashtal gata du ru —nay.

³⁴ Orze' Jesuuz nam rab mi yu:

—Bed, ya nee lor nu laab rel na anzir nu cuedz ngüel, orze' ru niir nu a' yu' lor ya chon tir —nam.

Bi yad gaab tiem nu zac zim

³⁵ Orze' gaze' nu Jesuuz bdugyi'm lo dey. Orze' nam:

—Ornu ya bzuu neza de ru nu char riiñ, mas sac gyish gyit ni der, mas sac nerbid tiñ ni der, mas sac reña' gyid lab der, tees za yu' coz nu bicy falt ni der? —nam.

Orze' na dey:

—Se la la coz bicy falt ne de —na dey.

³⁶ Orze' nam:

—Tees na reña' mod gyicy der. Benu mbecy ricy cup yu gyish gyit niy, orze' cha nuy ñi. Ni' zi'l benu ricy cup yu nerbid tiñ, orze' cha nuy ñi. Nunu benu tub mbecy sac mandzicy niy, orze' rlagy ñi cut yu chacyet niy. Orze' gad tiñ nu ziy mandzicy niy. ³⁷ Gun ya rnee lo der nu rlagy ñi nu gyu' niñ gal nu bi cañ lat de riidz ni Ñgyoozh nu nac ya. Rniñ: “Briib cuen dey mi lat de mbecy a' nap”,

rniñ. Tees dela coz nu bi cañ nu nac ya rlagy ñi nu gyu' niñ —nam.

³⁸ Orze' na dey:

—Shuaan de, ii mbish cyup mandzicy —na dey.

Orze' nam rab mi dey:

—Beñ nde' —nam.

Jesuuz mnii num Ñgyoozh Getsemani

³⁹ Orze' gaze' nu Jesuuz gush nez mi zam. Laab gal mod nu nil ricy mi, zam bicy ni Ya Oliva. Orze' de yu nu rsya' lom za ca dey ich mi. ⁴⁰ Na ornu bru'ñam lugaar ze', orze' nam rab mi dey:

—Mnii nu der Ñgyoozh, gun orze' cue' nu gyicy de coz cyi gan der —nam.

⁴¹ Orze' bruu chum lo dey. Nu rnii gal nu tuñ nu zaan na tub gyita' ni tuñ bruu chum lo dey. Orze' gusu tib mi nu mnii num Ñgyoozh. ⁴² Orze' nam:

—Ñgyoozh uza, benu gac, bloo chu taz nu rlagy ñi nu gzuub ru'. Tees cue' gac ñii gal nu rlagy ya, sinu gal nu rlagy ru —nam.

⁴³ Orze' lat nu rnii num Ñgyoozh, orze' bet tub anc nu bruu gyibaa par nu cuic yu fers nim.

⁴⁴ Orze' par nu tona' la deet rac nañ lardoom, orze' fert zir mnii num Ñgyoozh. Orze' nis nu rlag lom, nde' nañ gal nu na ndzuj reñ yet ñi lo yu.

⁴⁵ Na ornu blazh mnii num Ñgyoozh, orze' zam ze' nu nguaa de yu nu rsya' lom. Na ornu bru'ñam lo dey, orze' nguaa nas dey, gun rsuun lañ dey nu dzi ricy shni dey. ⁴⁶ Orze' nam rab mi dey:

—¿Walab gaal nguaa nas der? Wesh te der nunu mnii nu der Ñgyoozh, gun cue' nu gyicy de coz cyi gan der —nam.

Za nu dey Jesuuz pres

⁴⁷ Lat nu gabee rnii Jesuuz zum, orze' bru'ña mbecy zigy. Orze' Judas, tub yu nu bruu lat trocyup de yu nu bloo sum ze', yu ze' zub loy lo dey. Orze' becha'y lom nu bdoy chit lom. ⁴⁸ Tees Jesuuz nam rab mi yu:

—Judas, ¿a nu nac tub chit gu'r ya, biñ nu byac mbecy, yaa de yu nu rzi lagy lo? —nam.

⁴⁹ Na ornu bzaac de yu nu yu' nu Jesuuz de coz nu bicy nu dey mi, orze' na dey rab yum:

—Shuaan de, ¿a shet yaa de yu nu mandzicy? —na dey.

⁵⁰ Orze' tub de yu ze' pcad güiyy tub moz ni yu nu riib ic de uz. Orze' pcyug yu gyidag beey. ⁵¹ Orze' na Jesuuz:

—Bzaan nu nde' —nam rab mi yu.

Gaze' nu gul yaam gyidag nu guud güii ni moz ze'. Orze' bicy mi nu byanapa'ñ. ⁵² Orze' gaze' nu nam rab mi de yu zub lo ni uz, gal nu de yu nu rña nañ yu' nu driib zily mbecy Ñgyoozh, gal nu de yu bel ni de mbecy Israeel, de yu nu yad teem ze'. Orze' nam:

—¿Lagu yad tub der ya gal nu rza tub dey tub gubaan: nu mandzicy nu garot? ⁵³ Gun de dzi la brī dū der nañ yu' nu driib zily mbecy Ñgyoozh. Tees ni wancu' yaa der ya. Tees na pshuub or nu gyicy der gal nu rlagy ru, tub or nu riib ic nuras —nam rab mi dey.

Bed mniyy nu a' yu' loy Jesuuz

⁵⁴ Gaze' nu za nu dey Jesuuz pres par yu' yu nu riib ic de uz. Orze' Bed zet zet zi'l zaab yu za cay ich mi. ⁵⁵ Na gazel la loli' ni yu' ze' nguaa

gyi. Orze' ze' nguaa de mbecy rbidz dey gyi. Na ornu bru'ña Bed, orze' gusuba'y lat dey. ⁵⁶ Na ornu bzaac tub criad nu zub yu rbidz yu gyi ze', orze' mbi la bgüim loy. Orze' nam:

—Fiñ ii laaba' Jesuuz re rded nuñ —nam.

⁵⁷ Tees Bed mniiy nu walab. Orze' nay rab yu criad ze':

—Biñ mña, ni a' yu' lo ya yu ze' —nay.

⁵⁸ Na guchi ga' zi'l nu mnii criad ze', orze' bzaac tuuba'y Bed. Orze' nay rab yu Bed:

—Ru laab losa'r yu re —nay.

Orze' Bed nay:

—Walab. Walab losa' ya yu re —nay.

⁵⁹ Tub or gaal guc nu ni mniiy nu Bed, orze' na tuuba'y:

—Wanted la nu yu ii nac nuy yu re. Gun gaza' yu ii nac yu mbecy Galilea —nay.

⁶⁰ Orze' Bed nay:

—Walab. Ni wagad lagya la coz rniir —nay rab yuy.

Orze' laab or la ze', lat nu gabee rnii ru' Bed, orze' bredz ngüel. ⁶¹ Orze' Shuaan na Jesuuz bish cyam bgüim lo Bed. Orze' Bed byeza' lagy yu de riidz nu mnii Jesuuz loy ornu nam: “Dzi na, anzir nu cuedz ngüel, orze' ru niir nu a' yuur lor ya chon tir”, nam. ⁶² Gaze' nu bruu Bed ze' zay. Nunu tona' la zi ruun yu zay.

De mbecy bgubdzaa dey Jesuuz

⁶³ Orze' de yu nu rña Jesuuz rgubdzaa dey mi, nunu ii rgyi su dey mi. ⁶⁴ Orze' psoow dey lom. Orze' na dey rab yum:

—¡Mnii ben cyu bdi ru! —na dey.

⁶⁵ Nunu zañ zir coz mnii dey nu rab zii dey mi.

Jesuuz zam lo junt zub lo

⁶⁶ Na ornu bza' yu tuuba' dzi na, orze' by-atublaazh de yu bel ni de mbecy Israeel, gal nu de yu zub lo ni uz, gal nu de yu nu rlyuu leey ni Ñgyoozh. Gaze' nu za nu dey Jesuuz lat junt zub lo. Orze' bdugyi' dey lom. Gaze' nu na dey rab yum:

⁶⁷ —Mnii lo de, ¿a laab ru Mesías? —na dey.

Orze' nam:

—Ze' benu nee nu laaba, ze' de ru wayeña lagy der. ⁶⁸ Nunu benu dugyi' lo der ni wanii der.

⁶⁹ Tees na bi yad shuub or nu ya, biñ nu byac mbecy, chesuba par yaa bee Ñgyoozh, biñ nu gac gyicy dela coz —nam.

⁷⁰ Orze' dela dey bdugyi'y lom. Orze' na dey rab yum:

—Orze' ¿a laab ru nac ru i'ñ Ñgyoozh beni? —na dey rab yum.

Orze' nam rab mi dey:

—Laab der rniir nu ya naca —nam.

⁷¹ Gaze' nu na dey:

—¿La' zir be teshtig rlagy ñi par yu ii? Gun de ub na güeñ gyidag lan de riidz nu briib ru' ub yu —na dey.

23

Jesuuz zum lo Pilato

¹ Orze' dela mbecy wes su dey. Gaze' nu za nu dey Jesuuz lo Pilato. ² Na ornu bru'ña dey loy, orze' brugyi' nu driib dey cyi toom. Orze' na dey:

—De ya byap de yu ii ricy yu nu radza de mbecy ledza. Nunu rniiy nu walagy ñi nu rish de tiñ nu

rboo dey por cuen ni yu nu riib ic de nasyoong. Nunu ricy yu ub yu nu nac yu Mesías. Nunu nac yu rey ricy yu —na dey.

³ Orze' Pilato nay rab yum:

—¿A ru nac ru rey ni de mbecy Israeel? —nay.

Orze' nam rab mi yu:

—Laab ni gal nu ru mniir —nam.

⁴ Orze' gaze' nu Pilato mniiy lo de yu zub lo ni uz, gal nu lo de mbecy. Orze' nay:

—Ya wangyap la ni tub la falt ni mbecy ii —nay.

⁵ Tees de mbecy fert la zu dey. Orze' na dey:

—Yu ii ricy yu nu deet rac ledz de nu nac coz nu rlyuuy. Nu loga la ni bicy yu Galilea. Na ga' ni' zi'l ricy yu lo de yu ni Judea ii —na dey.

Jesuuz zam lo Herodes

⁶ Ornu Pilato güeñ yu de nu nde', orze' bdugyi'y lo dey ben a nac mi mbecy Galilea. ⁷ Na ornu gud lagy yu nu laab mi mbecy Galilea, orze' bzuu nez yum zam lo Herodes, gun yu ze' riib ic yu Galilea por cuen ni gubier Rom, nunu tiem ze' riy Jerusaleeng. ⁸ Orze' Herodes tona' la bet lagy yu ornu bzaac yu Jesuuz, gun bi rac tiem rlagy yu gzac yum, gun güeñ yu de coz nu rnii mbecy nu ricy mi. Orze' rgyish loy nu rlagy yu zac yu tub nusuriidz nu gyicy mi. ⁹ Orze' zañ coz bdugyi'y lom. Tees Jesuuz rila wannim. ¹⁰ Ni' zi'l ze' yu' de uz zub lo gal nu de yu nu rlyuu leey ni Ñgyoozh. Orze' bzu fert dey, nunu briib zir dey cyi toom. ¹¹ Orze' Herodes gal nu de soldad niy shiñ bicy nu dey mi. Orze' bigy nu naañ dey mi. Orze' ptiish dey mi tub negy fin. Orze' bzuu nez dey mi tub tira' nu zam lo Pilato. ¹² Orze' dzi ze' Herodes nu

Pilato bicy dey rishnap nu losa'y. Ze' anzir rzi lagy dey lo losa'y.

Mnii dey nu Jesuuz rlagy ñi gat mi

¹³ Orze' Pilato bicy tublaazh yu de uz zub lo, gal nu de yu bel ni de mbecy Israeel, gal nu de mbecy gyedz ze'. ¹⁴ Orze' nay:

—De ru yad nu der mbecy ii lo, nunu mnii der nu ricy yu nu radza mbecy. Tees ya bdugyi' biigya loy lo rgüii la der, nunu wangyapa ni tub la falt niy nu nac cyi nu briib der tooy. ¹⁵ Nunu ni' zi'l Herodes wangyap yu falt niy. Nde' nu ptush cyay yu yad yu lo. Gun yu ii sac la cyi nu bicy yu nu gyicy ñi nu yad ñi nu gat yu. ¹⁶ Orze' nde' nu ya grica cashtig niy. Orze' gaze' nu glaay yu —nay rab yu de mbecy.

¹⁷ Na de ña'n la, lat nu rzu' sa' ni Pas, Pilato rlagy ñi laay tub pres par nu gyicy yu nu gyet lagy de mbecy. ¹⁸ Tees orze' dela dey dub ru' lay rbish tiy. Orze' na dey:

—¡Biit yu! ¡Orze' glaar Barrabás! —na dey.

¹⁹ Gun Barrabás mne' dey yu nañ yu' gyiib par nu bicy yu nu byach mbecy, nunu par nu biit yu mbecy. ²⁰ Tees Pilato rlagy yu nu glaay Jesuuz. Orze' gaze' nu mniiy lo de mbecy tuuba' tir. ²¹ Tees orze' de mbecy dzi zir ye rbish ti dey. Orze' na dey:

—¡Cut ruy lo cruuz! ¡Cut ruy lo cruuz! —na dey rab yu Pilato.

²² Orze' Pilato tir chon la mniiy lo de mbecy. Orze' nay:

—¿La ñuu coz a' nap bicy yu? Ya wangyapa ni tub la cyi nu bicy yu nu gyicy ñi nu yad ñi nu gat

yu. Orze' ya grica cashtig niy. Orze' gaze' nu glaa yu —nay.

²³ Tees de mbecy ze' rzaab rbish ti la dey nu rnii dey nu gat mi lo cruuz. Orze' par nu tanta' rbish ti dey, orze' nde' nu “O” mnii Pilato. ²⁴ Orze' Pilato pshet ic yu nu gyicy yu gal mod nu mnii dey. ²⁵ Gaze' nu blaay yu nu mnii mbecy. Yu ze' yu nu bicy nu byach mbecy nunu yu nu biit mbecy. Orze' bgu'y Jesuuz yaa dey par nu gyicy dey ca na nu rlagy dey.

Pcaa dey Jesuuz lo cruuz

²⁶ Na ornu za nu dey Jesuuz nu caa dey mi lo cruuz, orze' nez nu za dey bdzeel dey tub mbecy Cirene nu la Simoo. Yu ze' bruuy ngush yeed yu. Orze' pshet yaa dey yu. Orze' briib dey cruuz nim yeñ yu. Orze' bicy dey nu guy cruuz ze' cha cay ich Jesuuz.

²⁷ Nunu tona' la mbecy zigy za ca ich mi. Nunu lat dey yu' zigy biñ mña. Ruun dem nunu rbish tim za ca dem ich mi nu nac nu tona' la ricy shni dem nu nac Jesuuz. ²⁸ Orze' Jesuuz bgüim lo de biñ mña ze'. Orze' nam:

—Der biñ mña Jerusaleeng, cue' gun der nu nac ya, sinu biiñ der nu nac ub der nunu nu nac i'ñ der.

²⁹ Gun shuub dzi nu nii mbecy: “Dzi ni biñ mña nu wanchu' i'ñ. Dzi ni biñ mña nu wangaal mdoo. Nunu ni' zi'l dzi ni biñ mña nu wangaagy mdoo”, nii dey. ³⁰ Orze' cugyi' de mbecy nu niy gab yu de bicy: “iBish cya too de!”, niy, nunu nii ga' dey gab yu de bicy miiñ: “i pcach de ya!” niy. ³¹ Gun benu ni mod ricy dey nu yag ca', orze' dzi zir gyicy dey ornu cha wach ñi —nam.

³² Nunu za nu ga' dey cyup mbecy nu bicy cyi par nu caa dey yu tublaazh nu Jesuuz lo cruuz.

³³ Na ornu bru'ña dey lugaar nu la Calavera, orze' pcaa dey Jesuuz lo cruuz. Nunu pcaa ga' dey cyup mbecy cyi ze' lo cruuz. Tub yu pcaa dey yu par yaa beem. Ze' tuuba'y pcaa dey yu par yaa reg mi.

³⁴ Orze' na Jesuuz rab mi Ñgyoozh:

—Ñgyoozh uza, bicy sulagy ni dey, gun wagad lagy dey de coz nu ricy yu —nam.

Orze' de soldad bloo dey suert par nu cyez dey shab mi lat losa'y. ³⁵ Orze' de mbecy yu' dey rgüiiy lom. Nunu gal de fushtiz bgubdzaa dey mi. Orze' na dey:

—Bloo mbañ yu reña' mbecy. Na rlagya'ñ nu co mbañ yu ub yu benu rishli gaal nac yu Mesías, biñ nu bloo zu Ñgyoozh —na dey.

³⁶ De soldad ni' zi'l bgubdzaa dey mi. Orze' becha' dey lom nunu briic dey ñup zii go'm.

³⁷ Orze' na dey rab yum:

—¡Benu ru nac ru rey ni de mbecy Israeel, bloo mbañ ub ru! —na dey.

³⁸ Ze' par too cruuz ze' pcaa dey tub yala nu ta' letr. Orze' rniiñ: “Yu ii rey ni de mbecy Israeel”, rniiñ.

³⁹ Na tub yu nu ca cuit mi mnii ziy nim. Orze' nay rab yum:

—Benu ru nac ru Mesías, biñ nu ca lo cuen nu cyid, orze' bloo mbañ ub ru, nunu bloo mbaña' de ya —nay.

⁴⁰ Tees tuuba' losa'y bdza'y niy. Orze' nay rab yuy:

—¿A wacchib ru lo Ñgyoozh? Gun bi ta' den laaba' lo cashtig. ⁴¹ Gun de ub na yad ñi nu gzac

zin, gun na drish na de coz nu bicy na. Tees yu ii rila wangyicy yu coz a' nap —nay rab yu losa'y.

⁴² Orze' na ga'y rab yu Jesuuz:

—Jesuuz, gyeza' lagy ru ya, ornu cugyi' nu gyub ic ru de mbecy nir —nay.

⁴³ Orze' Jesuuz nam rab mi yu:

—Ya rishli rnee lor nu dzi na bi ri nur ya gyibaa —nam.

Gut Jesuuz

⁴⁴ Orze' tub gyiib trocyup or widoo, orze' bet cow dutuub la lo yu gashtal gyiib chon or gudze. Orze' bzu yaa. ⁴⁵ Ni doo wancuic ñi yaa. Ze' negy nu zaab lugaar yon ni yu' nu driib zily mbecy Ñgyoozh pshelañ. Cyaal, cyaal lañ guc ñi. ⁴⁶ Orze' Jesuuz ye la brish tim. Orze' nam rab mi Ñgyoozh:

—¡Uza, byash lardoo! —nam.

Na ornu blazh mniim nde', orze' gut mi.

⁴⁷ Na ornu bzaac yu nu riib ic de soldad Rom de coz nu guc na, orze' brugyi' ryabic yu gyel mbecy ni Ñgyoozh. Orze' nay:

—Rishli gaal yu ii nac yu mbecy nu sac falt ni —nay.

⁴⁸ Orze' dela mbecy zigy nu yu' lugaar ze', ornu bzaac dey nu ni guc, orze' gush nez dey zay. Rgyich yaa dey lyush yu. ⁴⁹ Tees dela mbecy nu yu' lo Jesuuz, nunu gaza' de biñ mña, biñ nu za ca ich mi nese nu bruum Galilea, orze' de yu ze' byeeñ gay lugaar ze'. Orze' zet yu' dey rgüiiy de coz nu guc ze'.

Pcach dey Jesuuz

⁵⁰ Bzu tub mbecy nu la See. Yu ze' bruuy tub gyedz ni Judea nu la Arimatea. Nunu nac yu tub

mbecy nap. Nunu ricy yu mod nu se'ñ. Nunu yu ze' nac yu tub yu nu zu riiñ lat de junt zub lo ni de mbecy Israeel. ⁵¹ Yu ze' rgyish loy lo gyel gubier ni Ñgyoozh, nunu wangyicy yu tub zi'l riidz nu de yu nu gu' junt ze' ben lac mod ñgyicy nu dey Jesuuz. ⁵² Orze' gush nez yu guay lo Pilato bdiiñ yu cuerp ni Jesuuz. ⁵³ Na ornu bi pshet yu cuerp nim lo cruuz, orze' ptiish yu cuerp nim ze' tub sab nu byaa nu lino. Gaze' nu briy ñi nañ tub gyerbaa cub nu bduguuñ nañ tub gyita'. Gyerbaa ze' nigul cui la añ. ⁵⁴ Nde' guc ñi dzi byer or gudze. Dzi ze' rzu lily dey par nu zu lagy dey sab.

⁵⁵ Orze' de biñ mñaan nu guca ich Jesuuz nese nu bruum Galilea gua nu dem See par ru' baa ni Jesuuz. Orze' bzaac dem lac mod briy cuerp nim. ⁵⁶ Na ornu bri dem yu' na, orze' bzu lily dem coz zguul gal nu coz nu coo dem cuerp ni Jesuuz.

Orze' ornu pshuub dzi sab, orze' bzu lagy dem gal nu rniiñ lo leey nu gyicy dem.

24

Jesuuz byabañ mi

¹ Noming, dzi loga ni sman, orze' de biñ mñaan ze' napor la za dem ru' baa ni Jesuuz. Za nu dem coz zguul nu bzu lily dem ze'. ² Na ornu bru'ña dem ru' baa ze' na, orze' bzaac dem nu saca' gyita' nu noow ru' baa ze' se'ñ. ³ Orze' gu' dem gyeegy ni baa ze'. Orze' bzaac dem nu saca' cuerp ni Shuaan na Jesuuz. ⁴ Orze' pcan shcab ni dem yu'm. Orze' wagad lagy dem lac gyicy mi. Orze' sij la bruu zac cyup mbecy. Orze' gusu dey garee lom. Ze' zu dey negy cacy iily la. ⁵ Tona' la gudzib dem. Orze'

gusab tiily la dem gal lo yu la. Orze' de mbecy ze' nay rab yu dem:

—¿Lagu ryub der tub biñ mbañ lat de añ ii? ⁶ Gun mi ze' saca'm ii, sinu bi byabañ mi. Bicy der nu gyeza' lagy der de coz nu mniim lat nu gusam Galilea. ⁷ Mniim nu rlagy ñi nu gu' dey ub mi, biñ nu byac mbecy, yaa de mbecy cyi. Orze' de yu ze' rlagy ñi caa dey mi lo cruuz. Orze' nu za' dzi chon, orze' gyabañ mi, nam —na de mbecy shab cacy ze'.

⁸ Orze' gaze' nu de mi ze' byeza' lagy dem de riidz nu mnii Jesuuz. ⁹ Orze' bruu dem ru' baa ze' bish cya dem yam. Orze' byoo dem rishlo de trotub de aposht, gal nu lo de' zir mbecy de coz nu guc. ¹⁰ De biñ nu bya too riidz ze', mi ze' Li, biñ nu bruu Magadán, nu Wan, gal nu Li ñaa Santiag, gal nu de' zir de biñ mña. Orze' mnii dem riidz ze' lo de aposht. ¹¹ Tees de yu ze' guzii dey nu riidz ton zi'l rnii dem. Orze' wancheña lagy dey.

¹² Orze' mas ni, tees Bed gush yu carer zay ru' baa ni Jesuuz. Na ornu bru'ñay na, orze' bgüiiy nañ gyerbaa ze'. Orze' bzaac yu se sab zi'l nim mbish ñi. Orze' bish cyay yay par yu'. Nunu za nu la ic yu nu nac de coz nu guc.

Jesuuz bruu zaca'm lo cyup de yu nu rsya' lom

¹³ Orze' laab dzi ze' cyup de yu nu rsya' lom za dey tub gyedz nu la Emaés. Gyedz ze' riñ tub nu rnii trotub miily metr nu ruun Jerusaleeng ru'ñan gyedz ze'. ¹⁴ Na nez nu za dey, orze' ro dey riidz nu nac dela coz nu guc. ¹⁵ Na lat nu ro dey riidz na, orze' laab Jesuuz becha'm lo dey. Orze' gaze' nu za num dey tublaazh. ¹⁶ Orze' mas bzaac dey

mi, tees wangyu' lo dey mi. ¹⁷ Orze' nam rab mi dey:

—¿La riidz ro der yad ru? —nam.

Orze' guca dey nu ricy shniy. ¹⁸ Orze' tub yu nu rsya' lom ze' lay Cleofas. Orze' nay rab yum:

—¿A tub zi la ru mbecy nu pcyiñ Jerusaleeng nu wagad lagy de coz nu sa guc ze'? —nay.

¹⁹ Orze' na ga' Jesuuz:

—¿La coz guc? —nam.

Orze' na ga'y:

—De coz ni Jesuuz, biñ nu bruu Nazaret. Mi ze' guc mi tub biñ nu rnii por cuen ni Ñgyoozh. Ñgyoozh, gal nu dela mbecy bicy dey Jesuuz par tub mbecy nu tona' la coz ily ricy nunu tona' la coz ily rnii. ²⁰ Orze' de uz zub lo gal nu de fushtiz ledz na bgu' dey mi yaa mbecy, gun orze' gyicy dey nu gat mi lo cruuz. ²¹ Tees de ya brish lo de nu mi ze' nac mi biñ nu co mbañ de mbecy Israeel. Tees na bi bza' chon dzi nu gut mi. ²² Tees la be de biñ mñaan nu nac nu de ya bicy mi nu za du la ic de. Gun cas ru' zu gua dem ru' baa ni Jesuuz. ²³ Na ornu wangyap dem cuerp ni Jesuuz, orze' bish cya dem yam. Orze' mnii dem nu bruu zac la be anc lo dem. Orze' anc ze' mniiy nu Jesuuz mbañ mi. ²⁴ Orze' gaze' nu gua la be de losa' gal ru' baa ze'. Orze' bzaac yu nu ni gaal ni zu, gal nu mnii de biñ mñaan ze'. Tees wansaca' dey Jesuuz —na dey.

²⁵ Orze' na Jesuuz:

—¡Dzi ga cyigy too der! ¡Dzi ga gyee cheña lagy der de riidz ni de yu nu mnii por cuen ni Ñgyoozh!
²⁶ ¿Walab gaal walagy ñi nu zac zi Mesías anzir nu gyam lo gyel lily nim? —nam rab mi dey.

²⁷ Orze' gaze' nu brugyi' nu rshaal mi dela se' lat riidz ni Ñgyoozh ze' nu rzat ñi ub mi. Gush lam de riidz nu bzeen Moisees. Orze' yad mi dela libr nu pcaa de yu nu mnii por cuen ni Ñgyoozh rshaal mi lo dey.

²⁸ Na ornu bri dey gyedz nu rsaap dey ze', orze' Jesuuz bicy lam nu zu ga zi'l mi. ²⁹ Tees de yu ze' pcueez dey mi nu gyeeñ mi num dey. Orze' na dey rab yum:

—Byeeñ la nu de ya, gun na bi gudze. Sñuu ga gyecheñ —na dey.

Orze' Jesuuz gu'm nañ yu' par nu gyeñ num dey.

³⁰ Na ornu bi nguaa dem lo mez na, orze' bdu' yaam gyishtily. Orze' briic mi gras ni Ñgyoozh nu nac ñii. Orze' blew mi ñii briic mi ni dey. ³¹ Orze' or la ze' de yu ze' byaal la urlo dey. Orze' byu' lo dey mi. Orze' mi ze' mnit mi lo dey. ³² Orze' na dey rab yu losa'y:

—¿A walab nu nap zu lagy na nez nu yap na ornu mniim lo den, nunu ornu pshaal mi riidz ni Ñgyoozh lon? —na dey.

³³ Orze' wancuez la dey, sinu gush nez la dey yay Jerusaleeng. Na ornu bri dey na, orze' ze' byap dey za' trotub la de yu nu rsya' lom yu' tublaazh dey nu de' zir de losa'y. ³⁴ Orze' na de yu nu rsya' lom rab yu de yu nu bri ze':

—Rishli ni gaal Shuaan na byabañ mi, gun bruu zac mi lo Simoꝝ —na dey.

³⁵ Orze' de yu nu bri ze' byoo dey rishlo dey nu la coz bzaac dey nez. Nunu mnii ga' dey lac mod byu' lo dey mi ornu psug mi gyishtily.

Jesuuz bruu zac mi lo de yu nu rsya' lom

³⁶ Na lat nu gabee yu' dey rniiy de coz ze', orze' bruu zaca' Jesuuz lat dey. Orze' mnii num dey ñgyoozh. Orze' nam:

—Gyel ri zu briñ lat der —nam.

³⁷ Orze' de yu nu rsya' lom tona' la gudzib dey. Bis guzii dey mi. ³⁸ Orze' Jesuuz nam rab mi dey:

—¿Lagu rdzib der? ¿Lagu wacheña lagy der nu ya nu nde'? ³⁹ Güii der yaa nunu güii der gyi'. Laab ya nu nde'. Güii der ya, nunu gul yaa der ya. Bis a' ricy cup ñi cuerp niñ gal nu rzac der nu na ya —nam.

⁴⁰ Orze' ornu blazh mniim de nde', orze' blyuum yaam lo dey gal nu gyi'm. ⁴¹ Orze' de yu ze' gabee wacheña lagy dey ti laab mi, tanta' nu yet lagy dey, nunu tanta' nu za nu ic dey. Orze' Jesuuz nam rab mi dey:

—¿A yu' ñuu la coz ni der don? —nam rab mi dey.

⁴² Orze' briic dey tub la' bel nu guuy lo boo gom.

⁴³ Orze' gush mi ñii. Orze' bdom ñii lo rgüii dela dey. ⁴⁴ Orze' gaze' nu nam rab mi dey:

—Coz nu bzaca, nde' mneē lo der lat nu gabee gusa dū der. Orze' dela coz nu cañ lo leey ni Moisees, nu dela coz nu cañ lat de riidz ni de yu nu mnii por cuen ni Ñgyoozh, gal nu dela coz nu cañ lo libr ni salmos nu nac ya, dela riidz ze' byu' niñ —nam.

⁴⁵ Orze' bicy mi nu gyet lag dey cuen de riidz ni Ñgyoozh. ⁴⁶ Orze' nam rab mi dey:

—Bi cañ nu ya, Mesías, biñ nu ca lo cuen nu cyid. Cañ nu rlagy ñi gata. Tees ornu za' dzi chon, orze' gyabaña'. ⁴⁷ Nunu rniiñ nu de mbecy rlagy ñi cha shaal dey riidz ni Ñgyoozh lo dela mbecy nu nac ya. Nii dey nu rlagy ñi ne' mbecy dela cyi nu

ricy yu, gun orze' Ñgyoozh gyicy sulagy mi ni dey. Gash dey Jerusaleeng. Orze' cha dey dutuub la gyishlombecy nu cha shaal dey riidz ze'. ⁴⁸ Orze' de ru nac der teshtig ni de coz nu guc ze'. ⁴⁹ Orze' ya gzuu neza Espiriit Yon ni Ñgyoozh nu cyid mi lat der gal nu Ñgyoozh uz na bi mne' ic mi nu cuic mim ni der. Tees de ru gyeñ der gyedz Jerusaleeng ii gashtal gyicy la Ñgyoozh gyibaa nu cyiiñ der. Orze' gaze' nu gruu der char —nam.

Jesuuz gup mi gyibaa

⁵⁰ Orze' gaze' nu Jesuuz bruu num dey gyedz Jerusaleeng. Guam num dey gal Betania. Orze' ze' pshes nañ yaam bdiiñ mi lo Ñgyoozh nu locyuub mi dey. ⁵¹ Orze' lat nu ni bicy mi bruu chum lo dey. Gaze' nu gup mi gyibaa yam. ⁵² Na ornu blazh nu briib zily dey mi, orze' bish cya dey yay par Jerusaleeng. Nunu tona' la bet lagy dey yay. ⁵³ Nunu de dzi la yu' dey nañ yu' nu driib zily de mbecy Ñgyoozh nu ryabic dey gyel mbecy nim.

**De riidz ni trat cub nu bicy nu Ñgyoozh mbecy:
Salmos; Proverbios
New Testament, Psalms and Proverbs in Zapotec,
Texmelucan (MX:zpz:Zapotec, Texmelucan)**

copyright © 2004 Wycliffe Bible Translators, Inc.

Language: Zapotec, Texmelucan

Translation by: Wycliffe Bible Translators, Inc.

Zapoteco, Texmelucan [zpz], Mexico

Copyright Information

© 2004, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament, Psalms and Proverbs

in Zapotec, Texmelucan

© 2004, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

f9c70e44-c99b-5c69-9f1e-e64901f95811